


# CÌKÈÈNÀ-KUMÒNA

## CYÀ PAATÈMÒ

 ... ànu mùvwà Mwanèètù Neville ùfila mamanyisha awu ne... Mwanèètù Moore ùwà wàmba ditùkù adi, wàkula bwà Nyumà wa Mukalenge, wàkabwela... ùbwela mu nzùbu. Yèyè ne: “Bìwva byà butùmbi menemene mu mùshindù wà ne mèmè kudyambidila ne Dyambwibwa dyènzèkì too ne pa ngààlu kukenzakana ki, mèmè kumòna bakwàbò basòmbe mwab’ewu,” ki mèmè ne, “to, kì ndyanji ànu kwenzeka to, bwalu pìikalabi ne bàcìdì mwab’ewu díbà adi ndi mumanye ne ncìdì ànu mwab’ewu.” Pa nàнку misangu mikwàbò Nyumà wa Mukalenge ùtu ùtùmvwija bilenga mùshindu awu.

<sup>2</sup> Tudi ne disanka dyàbùngì dyà kwikala ne balunda bààbùngì batùdì tumòna mu nzùbu emu. Bapite bùngì bwà kuteeta kubàtèèla’s. Ndi mfuma ku dimòna, Mwanèètù Carpenter, ubwela mu ciibi amu, muntu wàkatùsèlesha mèmè ne mukàjàànyì’s. Mwanèètù Carpenter, ùtu dibènesha dinène mu èkéleeziyà emu’s, ne ùtu dibènesha kutùdì mu njila wa mudimu wà bwambi, ne ùtu uyiisha myaba yònsò, pàmwè ne myaba yònsò nkòòng. Nènku tudi ne disànkà dyà kwikalaku nendè muneemu, kaa, ne bakwabo bùngì cyanààna’s.

<sup>3</sup> Mpindyewu kudi lukonko lukwàbò kaaba aka lùvwàbo bampèeshe makèèlèlè dilòdò awu ne:

**Mwanèètù Branham, virgo yìtaanu mikùtàkàne yà mu Maatàayi 25 mmibadiibwe bu bàshàadilè bàà Bisàmbà byà bendè anyì? Ndi ngumvwa ne virgo yìtaanu mikùtàkàne yàkasungidiibwa kàdi yidi ne cyà kupicila mu cikondo cyà dikenga dinène. Mmwómò anyì? Byòbi nàнку, ndekeelu waayi neikalè cinyi? Yidi mwà kwikala mikòòkò yidi mitàpulula ne mbuji mu Maatàayi 25:33 ne 34 anyì?**

<sup>4</sup> Mmwena tèdòlòji mulenga wa dikema bilondèshile cìndì... [Katùpà kàà mukàbà wà mèyi munda mutupu—Muf.]... ngeela meejì nàнку kàbidì’s, bwà ne mbàshàadilè, virgo mukùtàkàne awu’s ki bàdì bashààle bàà mu Bwàkabuulwibwà; bàà dimiinu dyà mukàjì bàdì balamè mikenji yà Nzambì ne biikale ne bujaadiki bwà Yesù Kilistò. Mukàjì kampànda neàngate ci—cipese cyà cilàmbà ne kucyàdija panshi; èè, mpindyewu, s’ki cidìye ukosela... anyi wàngacilapu citentwidì ne ucitèèka mwaba kanà wònsò udiye ujinga awu’s, mùshindù wikalaye mwà kucikosa awu’s. Nènku díbà adi cidìye mushiye mwaba awu aci’s ki cidibu bàbiikila ne bishàadilè, kàdi yèyè ùdi usungula bwà

kucikosela ku mwaba kampànda ku budiswilè bwà meeji èndè. Kàdi bìdi bishààle abi s'ki bìdìbo bàbìikila ne bishààdilà.

<sup>5</sup> Mpindyewu, bu nwènù mwà kumòna, kuvwa virgo yitaanu mikùtākàne ne yitaanu yà lungenyi; yònsò yìvwà virgo, myangacila ku cintu cìmwècimwè. Kàdi, ku disungula, Nzambi wàkasungula Mukàj'Èndè-musèla ku disungula kumpàlà kwà difùkà dyà dyulu ne buloba, kufùnda mènà ààbo mu Mukàndà wà Mwoyi wà Mwànà wa mùkòòkò mushebeya kumpàlà kwà difùkà dyà dyulu ne buloba; kumpàla mene kwà dyulu ne buloba kubangabi, Nzambi mu meeji Èndè, mwikale kàyi ne mikalu.

<sup>6</sup> Nènku misangu mikwàbò tudi tukwàta mudimu ne mwaku, wà “didyanjila-kulongolola,” kàdi ùdi bushùwà cilendwìshì mu cikondo cyà èkèleeziyà citùdimu ne mwoyi eci. Ncyà bushùwà menemene ne civwa ncintu cinène kale mu matùkù à bafwile diitabuuja, bwalu bàvwà bàcìitabuuja bushùwà. Kàdi cikaadi kule ne Cyòci aci mpindyewu, ku mmwènenu yà beena ne ànu mikenji ayi, dilongesha dyà beena ne ànu mikenji mu èkèleeziyà udi ulwa . . . Cìvwa cintu cìmpè, bwalu byònsò bikaavwa bishààle byà cyèna Calvinistes mu Angleterre mu mùshindù wà kabàciyì kàbìdì ne matabuluja to, ki John Wesley kulwaye uyiisha dilongesha dyà beena Arméniens dyàkacifikisha ku dicincika dyà maalu's. Misangu yònsò Nzambi neàcincike maalu's.

<sup>7</sup> Nànku dībà adi virgo mukùtākàne ewu's ki bàvwà kabàyi ne maanyi mu myèndù yàbo abu's, mùndì ngeela meeji ne yèyè's ki wàkiipaciibwa mu mīdimà ya pambelu mwikala myadi, ditwa dyà mikemu, ne disumakaja dyà mènù. Nènku nwènù baswe kufwànyikija aci, anyi mèyi ènù à kwìnshi kwà mabeji awu, necinwaluje cyàkàbìdì buludì ku dikenga dinène. Nènku ndi ngeela meeji ne bòbò s'ki bàdì bashààle paanyimà apu bwà kupicila mu dikenga dinène abu's. Nènku mwaba awu ndileesona ànu dyètu dyà menemene edi, bu twètù ne dībà dyà kubwelamu. Bu nwènù. . .

<sup>8</sup> Mpindyewu, vùlukàayi ne, ngàmbi dyàmbedi ne, mwaba unùdi nutèelejila mikàbà yà mèyi ayi ne: “Bintu ebi bìdi ànu bilondeshile mùshindù wùndì mèmè ngiitabuuja ne mmudibi mu bulelèlè's.” Nwamònu anyi? Mpindyewu, pìikalabi ntupàkànyi, ncyèna—ncyèna mumanye ne bìdi nànku to. Ndi . . . Nènku ndi ànu mwà kwamba cìndì mèmè ngiitabuuja. Nènku ncyèna ne meeji à kutapa ní nganyi ní nganyi ku mwoyi to. Tudi ne cyà kubitèeka ànu ku luseke patùdì tubwela apa, ne pashìishe kwangata cintu cìdì cyambiibwe aci, ne kucikenketa, bwà kumòna cyà bushùwà ne m'Mifùndu anyi to. Ki mùshindù mutàmbe bwìmpè wà kucyenza ngwòwò awu. Dībà adi . . . Bwalu mu ditùkù bu ditùdì ne mwoyi mpindyewu emu, mu ditùnga mùdì mupùmbulula mpàla ne nyimà ne emu ne emu kùdì bintu byà mishindù yònsò, èè, mbikolè bwà kufikisha bantu bulelèlè kudicyùmvwa, mùdìbo bàcyùmvwa mu cipaapu cyà buloba cìdì

kaciyi cyanji kulenga. Udi ubàmbila, bàdi baciitabuuja, ki mùshindù udici cyenda awu's.

<sup>9</sup> Kàdi, mpindyewu, ewu neàlwe ne meeji *kampànda*, ne ewu neàlwe ne meeji *kampànda*, nènku tudi ne èkèleeziyà yà cyena màngumba mitwè ku nkamà citèemà ne byà mu njila mishiilèshiiilàngàne, ne edi dilwishangana (ku dilongesha dyàdi) ne dikwàbò; nènku kùdi ne cyà kwikala muntu kampànda udi mu ntupàkànyì, ne muntu kampànda mu bulelèlè. Pa nàнку mpindyewu cijaadiki cimwèpelè cidiku, ncyà kudyàluja ku Bible; nwamònu's, kulekeela Bible ùkòsa. Mpindyewu, misangu yàbùngì, bantu bàtu beela dyumvwija dyàbò bòbò. Kadi twètù tudi tuteeta ne mwètù mwònsò, bwà kubenga kwelamù dyumvwija dyà buntu nànsha dimwè. NùCìbalààyi ànu mùdìCi amu, nwamba ne: “Ki mùdìCi.”

<sup>10</sup> Ne pashiishe mèmè nkààdikù mumòne misangu yònsò ne, bu nwènù mwà kwangata ànu cyàkambaYe aci, nebyenze ne bintu byònsò binwàngane ànu menemene ne Mifùndu's. Mbyenze ànu bu kusambakaja bitùpà byà cisolù pàmwè's, bìdi bikèngela kwanji kutangila citentwidi bangabanga ne wèwè kunwangaja bitùpà byà cisolù aci. Kabìyi nàнку to, ntu misangu yònsò ànu ngàmbe ne: “Udi mufwànyine kupeta. . . Mu mbòdi webè amu, udi mufwànyine kupeta ngombe munkaci mwà kudiila mashinde ku lusongo lwà mucì's.” Dìbà adi kî—kì ncifwànyine ànu kumwèka cijaalame nànsha.

<sup>11</sup> Nènku bu twètù ànu mwà kulekela Nyumà Mwímpè. . . Udi mufunde Bible nganyi? Nyumà Mwímpè wàkakwàta mudimu ne bantu ne kufundabo Bible. Dìbà adi kakuyi Nyumà Mwímpè to, nànsha wèwè mulonge tulaasà twà bishi, kwàdyàkuMùmvwakù to. Bwalu nànsha Yesù mene wàkasàkidila Nzambì bwà mùvwaYè muCisokòke beena lungenyi ne batàlame, kàdi kuCibuulwila bânà bu aba bàdi baswè kuyiila. Ne bayiidi bònsò bavwa bantu batàmbe kwikala kabàyi balonge kàlaasà anyì kabàyi bamanye mukàndà to pa kuumusha umwèpelè, ne mwine awu m'Pòlò. Nènku Pòlò wàkamba ne byàkamukèngela bwà kupwàye mwoyi byònsò bìvwàye mumanye abi bwà kupeta Kilistò. Pa nàнку kwambilayè èkèleeziyà wa beena Kolintò ne, yèyè “kààkalwa ne lungenyi lwà bantu ne muyiiki munène nànsha,” bwalu dìbà adi diitabuuja dyàbò—dyàbò divwa difwànyine kwikala mu lungenyi lwà bantu, kàdi yèyè wàkalwa kùdibo mu bukolè ne dileejiiibwa patòòke dyà Nyumà Mwímpè, bwà diitabuuja dyàbò dyàmònaku mwà kushindameena pa byenzedi byà Nyumà Mwímpè bilondèshile Diyì dyà Nzambì. Nènku ke mwaba awu utùdi tuteeta kushààla batàmbe kukùlàmina menemene, mpindyewu mene, bwalu kumpàla kwà lumingu kujika, anyì cikondo cyàmbà lumingu kujika, nenùcimònè, ki cyòci aci menemene civwaku, kaanshinga kà bwànda kakesè kàdi kopicila mu bikondo byònsò aku.

<sup>12</sup> Twasàkidilaayi bwà kuteeka mbôdi kuulu ndambù. Aci's cidi cimweneka citàmbe bwîmpè's.

<sup>13</sup> Mpindyewu, kaa, tudi . . . Mvwa njinga bwà twîkalakù naabi ànu mu movù wà mashika mujima emu's, bwà twamònakù ànu mwà kwangata Mukàndà mujima wà Bwàkabuulwibwà ne kuWùkenketa ànu cyanààna. Mmalongesha malenga à dikèma muntwamu. Nènku ndi mvùluka, ngeela meeji ne kukaadi bidimu makumi àbidi anyi makumi àbidi ne bitaanu, pacivwa èkèleeziyà muciiikale mupyamùpyà, twètù kutwadija umwe . . . ànu ne mbangilu wa movù wà bintu bimata, ne twètù kwàmba kushààlamu ne ku movù wà bintu bimata uvwa ulonda, twàbwela twàpatuka mu Mukàndà wà Bwàkabuulwibwà.

<sup>14</sup> Mpindyewu, ndi mvùluka mungààkangatà Mukàndà wà Yobò. Kaa, Mwanèètù Wright! Mémè kushààlapu mukùngùlù mule be too ne ndekeelu wa byònsò muntu mukàji kampànda kumfùndilaye unkonka, wàmba ne: “Mwanèètù Branham, kwènàku muswè kuumusha Yobò pa mushiki wà butù awu anyi?” Èè, mvwa nteeta kupatula cintu kampànda, bwalu ànu mwaba awu mene ke ùvwà bintu byònsò bikuupuka, pa mwaba awu mene; lwà pa mwaba mene ùvwà Nyumà wa Mukalenge mumutuulukile awu's, pashiishe pààkabanga mukenyi kupenya ne mikungulu kukungula, Nyumà kutuulukilayè mupròfètà ne kumònaye dilwa dyà Mukalenge. Nènku mvwa muswè kuumvwija aci menemene, ki bwà cinyi mvwa mumulame pa mushiki wà butù mukùngùlù mule, bwà—bwà twamòna mwà kutòokeshu bwalu. Nènku ndi mumanye ne bidi mwà kucyòkeshaku kakesè, ndambù. Mémè pàanyi, ntu mbinduluka's, pântù nguumvwa muntu kampànda wàtwà ànu mu nsampù wàtwà mu kaleji pa bwalu kampànda, pamutù pàà kuyaye ku cyena bwalu. Kàdi pàmwàpa Nzambi ngudi ulombola muntu awu bwà kiipacila kampànda bwà bwalu abu.

<sup>15</sup> Mpindyewu twàlukilàayi ku bàshààdilè aba, kumpàla kwà twètù kuumuka ku lukonko elu. Ndi ntekemena ne ndi mucitòokeshu. Eci . . . Ndi ngiitabuuja bulelèlè ne bàshààdilè abu mbasungùdiibwe kùdi Nzambi. Ndi—ndi nciitabuuja ne, Nzambi wàkasungula bàshààdilè kumpàla kwà difùka dyà dyulu ne buloba; ne ku “didyanjila-kumanya” Dyèndè. Kí ndiyi . . . Mpindyewu tàngilàayi *didyanjila kulongolola*, nwamònu's, bwalu mmwaku mukèsè ùdi utapa munkaci mwà bantu. Nwamònu anyi? Kàdi Nzambi, kumpàla kwà difùka dyà dyulu ne buloba, mu meeji Èndè manène adi kaayi ne mikàlù awu, kusungula Èkèleeziyà, kusungula Yesù, kusungula Èkèleeziyà, ne mwikàle mwà kudyanjila kwamba ku cibangidilu civwaci mwà kwikala ku ndekeelu. Yèyè . . . Piikalabi ne Yèyè kèna ne mikàlù to, kakwenaku cintu nànsha cimwè cidiYe kàyi mumanye to. Yèyè ùvwa mumanye dìnà nkupà yònsò uvwa mufwanyine kwikala pa buloba awu, ne misangu bùngi kaayi yivwaye mufwanyine kutuuta mipòdi. Mpindyewu, aci's ki mùshindù . . .

ne búngì bwà mafuta avwayi mifwànyine kupatula, ne búngì kaayi buvwayi mifwànyine kupatula pámwè. Ki cìdì kacyi ne mikàlù ncyaci, cìdì mu mùshindù wà kawùyì ne mikàlù to; udi—udi . . . kakùyì ànu mùshindù wà kuCyùmvwija to. Nènku Nzambì, ki cìdìYe ncyòcì aci, Nzambì wa kàyì mikàlù awu.

<sup>16</sup> Pa nàнку, bu nwènù mwà kumòna, Bible mmwambe ne mu matùkù à ndekeelu mùvwà mufwilakanyi ne Kilistò ùvwa ne cyà kulwa pa buloba awu . . .

<sup>17</sup> Mpindyewu tèèlejàayi ne ntema! Ki cilèma cìmwèpelè . . . Ngeela meeji ne yèyè ùvwa mwà kupeta millyò mu àanyi mayiisha. Kàdi bwà Mwanèètù wa balùme wa musinga mukolè Billy Graham, ditùkù adi, diyiisha dyà pabwàdì dyàkayishayè dyàlumingu dishàale adi, ne mwà cyà bushùwà ndyàmbidila ne cìvwa diyiisha dyà cikondo. Nènku . . . kàdi yèyè wàkamba ne “Sàtaanà ùdi mene useswisha Basungula.”

<sup>18</sup> To, Bible mmwambe ne: “Yèyè mmufwànyne kuseeswisha Basungula *bu ne* bìvwa mwà kwenzeka.” Kàdi kabyèna mwà kwenzekaku to, bwalu Nzambì wàkabàsungula kumpàla kwà difùka dyà dyulu ne buloba. Nwamònu anyi? Mwànà wa mùkòkò . . . Yesù Kilistò nguvwa Mwànà wa mùkòkò mushebeya kacya ku difùkà dyà dyulu ne buloba. Pàdi nànsha Nzambì mutèeke mu meeji Èndè, pàdiYe wàkula Dìyì adi apu, Dyòdì kadyèna mwà kushintulukaku nànsha, Dyòdì kadyènakaku mwà kushintulukaku nànsha to. Nwamònu’s, bwalu Yèyè—Yèyè kèna—Yèyè kèna ne mikàlù to, ne Mèyì Èndè neikalè mwà kwenzeka.

<sup>19</sup> Anji elàayibi ànu meeji, ànu mene . . . buloba butùdì basòmbèlepù dilòlò edi ebu’s n’Dìyì dyà Nzambì dimwènèshùbwè. Buloba ebu bwàkafwimbibwa ku bintu bìdì kabìyì nànsha bìmwèka to. Yèyè wàkamba ànu ne: “Kwikala,” pààbù kwikalabù. Mùshindù mwine ùdibi bipeepèle bwà Nzambì kondopa mubidi ùdi ùsaama díbà adi’s, pìikalabi ne Udi mwà kwenza bufùki ànu kudibwàkula cyanàànà. Nwamònu’s, Dìyì Dyèndè. Bu twètù ànu mwà kupetaku diitabuuja bwà kumòna cìdì Dìyì Dyèndè! Tudi batàmbe kuswikàkana ne buloba ne babwelakane mu meeji ètù mu mùshindù wà twètù . . . Kaa, ncyèna mumanye to. Tudi batàmbe kupacishiibwa ne malongesha búngì cyanàànà, batwa cisàlù cyà ku edi núnku, ne batwa cisàlù cyà ku cyàcyà núnku, ne—ne mbikatufikishe ku dikonyangajiibwa bònsò. Kàdi bu nwènù mwà kunyungisha cintu cyònsò mu kaabujimà kusùlulukaku, kwalukila bwà kumanya ne Yèyè ùdi Nzambì, ne Mèyì Èndè kaèna mwà kupangilaku to ànu mùdiYe kàyì mwà kupangila. Nènku pìikalabi Dìyì adi dipangila, díbà adi Nzambì’s mmupangile; kàdi pìikalabi Nzambì upangila mwaba awu . . . Yèyè kèna Nzambì to. Nwamònu anyi? Pa nàнку . . . Nènku nudi bavùlùke ne, Yèyè kèna mwà kwamba cintu *apa* ne cintu cikwàbò lwà *apa* to; Bikèngela àshaale ne dipangadika Dyèndè

dyà kumpàla bwà kwikala Nzambi. Pa nàнку, twètù tudi ànu tu- . . .

<sup>20</sup> Ne Yèyè mmutulòmbe cintu ànu cìmwèpèlè, bwà kwitabuujà ne cìdìYe mwambe aci m'Bulelèlè, ne Yèyè neàcifikishe ku dyanzeke. Kaa, bilenga kaayipu's wè! Uvwa mutèkèmene ne cintu cyà cìmpicìmpi cyenzeke; misangu mikwàbò bìkèngela ànu ndambù mukèsè wa diitabuujà. Kacyàkwenza cishìma to, kàdi bu wèwè ànu mwa kushààla mukwàtakù, necikupatule mu lutàtu; shààla wèwè ànu naaci. Ànu mwàkambaYe ne: "Lutete lwà mùtâdà, lùdì lutàmbe bukesè munkaci mwà nteta yònsò." Kàdi nukaadiku bamòne ne, mùtâdà wòwò kawàdyàkusambakanaku ne cintu nànsha cìmwè to. Kwèna mwà kusambakaja mùtâdà ne cintu nànsha cìmwè to, kawàdyàkusambakanaku to. Nènku wèwè ne diitabuujà, ànu ndambù mukèsè wa diitabuujà dìdì kadiyi mwà kusambakanaku ne bupidyà kanà bwònsò anyi bwena èkèleeziyà anyi mèyi maswika, shààla wèwè ànu ne Nzambi, shààla wèwè ànu naaCi, neCìkulòpòle ànu mu mafwima amu, cikupàtula buludi pambelu. Èyowà! Shààla wèwè ànu ne diitabuujà adi.

<sup>21</sup> Mpindyewu, cibangidilu, pàdì Nzambi. . . Bible mmwambe, mu Bwàkabuulwibwà, ne: "Mufwilakanyi ne Kilistò, mu matukù à ndekeelu. . ." Mpindyewu tàngilàayi èkèleeziyà eyi mùdiyi yònsò yenda yìdisanga. "Mufwilakanyi ne Kilistò, mu matukù à ndekeelu, neàseeswishe bònsò bàvwa pa buloba beena mènà àvwa kaayi mafùnda mu Mukàndà wà Mwoyi wà Mwànà wa mùkòòkò kacya ku difùka dyà dyulu ne buloba." Ndìbà kaayi dyàkafùndiibwa dìnà dyèbè mu Mukàndà wà Mwoyi? Kumpàla mene kwà twètù kwikala ne buloba, nuvwa basùngùdìibwe bwà kupeta Nyumà Mwìmpè mu cikondo eci.

<sup>22</sup> Mémè ndi mutwè ku cyà Eddie Perronet ne:

Ndi mwele lwongo lwà musùukà wànyì mu mwaba mutalale wà diikisha,  
Ncyàdyàkwendela ne mazuwa pa mbù mutomboke, wa mpatà ya kayìyi kwamba ayi kàbìdì to;  
Cipeepèlè cikole cìdì mwà kajuuka eku ne eku, cipeepèlè cyà cipupu cikolè,  
Kàdi mu Yesù tudi bakùbìibwe kashidi ne kashidi.

<sup>23</sup> Kakwèna cintu nànsha cìmwè cìdì mwà kutupandulula to (Nzambi kèna mwà. . . kàtu walukila pa Dìyi Dyèndè to. Nènku pùikalàYe kàyi ne mikàlù, ne ùkupà Nyumà Mwìmpè *mwab'ewu*, mumanye ne Yèyè neàkujimije lwà *mwab'ewu*, mmudimu wà mùshindù kaayi ùdìYe wenza awu's?), pawikala kuyi museeswishiiibwe mu dilabula dyèbè to, pawikala mupete Nyumà Mwìmpè. Kàdi tàngilàayi cìdì Bible mwambe, Efèsò 4:30 ne: "Kanùbungamiji Nyumà Mwìmpè wa Nzambi to,

unwàkatwibwà nendè citampi too ne...” Ditabuluja didi dilondà anyi? Aci cidi cyùmvwika cijaalàme anyi? “Udi mutwibwè citampi too ne ku ditùkù dyà bupikudi bwèbè!” Too ne dibà kaayi? Too ne ku bupikudi bwèbè.

<sup>24</sup> Angàtaayi dikaadika, nudyuja pa njanja, ne pàdidi dyùjibwa patapata...Mpindyewu, kabeena mwà kukanga dikaadikà adi to, bivwa bikèngela bwà mukòntononyi àpicile mwaba awu. Nènku ùdi ùnkòntonona, ne ùmòna ní kùdi cintu kampànda cidi cidilekele cikalà mwà kunyungakana. Dikaadikà cidi mwà kwikala...Dikaadikà didi mwà kwikala dyuja patapata, kàdi dyòdi diikale munda amu ne myaba yinyungakana, nebikèngele bwà wèwè kudipayulula cyàkàbìdi. Nènku s’ki lutatu ndwólù alu, bààbùngì bèètù kabeena bapeta Nyumà Mwímpè to; pàdi mukòntononyi ùfika, Ùdi ùpeta myaba yàbùngì ne bintu binyungakana, nudi numòna’s, pa nàнку Yèyè kààkudikàngakù to.

<sup>25</sup> Mwena tèlòji munène mmulwe kùndi ditùkù adi, anyi kí nditùkù adi, kukaadi bidimu bisàtù anyi binaayi, ki yèyè ne: “Ndi muswè nkukonkèku cintu kampànda.” Yèyè ne: “Abraham wàkiitabuuja Nzambi, ne bààkamubadilaci bu bwakàne.”

Mèmè ne: “Aci’s mbulelèlè, cyà bushùwà.”

Yèyè ne: “Ncinyi cikwàbò cidi muntu mufwànyine kwenza pa kuumusha kwitabuuja?”

Mèmè ne: “S’ki cyònsò civwàye mwà kwenza aci’s.”

<sup>26</sup> Yèyè ne: “Dibà adi kuyaaya ne cintakanyi cyà Nyumà Mwímpè eci pambèlù pa aci mpenyi’s?” Mpindyewu, s’nudi bamanye ne yèyè ùvwa Baptiste. Ki yèyè ne—yèyè ne: “Mpenyi paùdi ukafika ne Nyumà Mwímpè ewu?” Yèyè ne: “Muntu yèyè mwitabùje! Kasunsa kaùdi witabuuja, udi mupete Nyumà Mwímpè.”

Mèmè ne: “To, to. Mpindyewu, wèwè—wèwè udi wenza ne Mifundu yibengangane, pàabi Mifundu kayèna yibèngangana Yòyi miine to. Nwamònu anyi? Pòlò wàkabakonka ne: ‘Nukaadi bapete Nyumà Mwímpè kacya nwítabuuja anyi?’”

Ki yèyè ne: “Èè. . .”

<sup>27</sup> Mèmè ne: “Ncyà bushùwà ne Abraham taatù wa diitabuuja wàkafila. . . ùvwa ne mulari wà Nzambi ne mwitabuuje Nzambi, ne bààkamubadilaci bu bwakàne, kàdi Yèyè wàkamupa citampi cyà ditengudiibwa bu cimanyinu cyà ne Ùvwa mwakidile diitabuuja dyèndè.”

<sup>28</sup> Mpindyewu, piikalaYe kacya kavwa mwanji kukutwa citampi cyà Nyumà Mwímpè to, kacya Yèyè katu mwanji kwakidila diitabuuja dyèbè mu Yèyè to, udi ne yimwe myaba ne bintu bilekelela. Nwamònu anyi? Udi mufwànyine kwitabuuja, èyo, kàdi kùdi myaba ne bintu bilekelela bùngì cyanààna. Kàdi paùdi upatakaja bintu mu myaba milekelela ayi mudibi

bikèngela, dībà adi Yèyè ùdi ùkutwà cìtampì cyà Nyumà Mwímpè too ne ku ditùkù dyà bupikudi bwèbè. S’ki dishindika dyà Nzambì dyà ne mMwakidile diitabuuja dyùdi mùjikule mu Yèyè’s.

<sup>29</sup> Abraham wàkajìkula diitabuuja, ki Nzambì kwamba ne: “Nènkupèèshè cimanyinu mpindyewu cyà ne wèwè... ne Ndì mukwakidile.” Ne Yèyè wàkamupa cimanyinu cyà ditengudiibwa.

<sup>30</sup> Mpindyewu, paùdi wakidila Kilistò bu Musùngidi wà sungasunga ne uMwitabuuja ne uMulòmba bwà kukezula mwoyi wèbè, ne pashiishe pàdiYe wàlukila ne Nyumà Mwímpè ne ùkupèèsha cimanyinu cyà Nyumà Mwímpè, dībà adi udi mutwìbwe cìtampì too ne ku bupikudi bwèbè.

<sup>31</sup> Dikaadika edi edi, dyòdi ne bintu binyungakana... Paanyimà pàà dimana kupaya dyònsò ne bakange ciibi aci ne batwepu cìtampì, nènku ndi—nditwà cìtampì too ne kwàdi kuyààyàdi, kumpanyi yà njanja mmifwànyine kukukwacisha bwà matùkù èbè ònsò à mwoyi wèwè mwà kukosa cìtampì aci. Kabyèna mwà kukoshiibwa to. Ncitwà cìtampì too ne kwaci kuyààyàci; kì mbwà muntu yònsò udi mu njila wa njanja amu mufwànyine kucikangula bwà kutangila munda mwàdi amu, ne ku dikenketa ne kuditangilula, ne kwimansha ndambù wa bintu, anyi kusàkidilamu ndambù mukwàbò wa bintu to. To, to!

<sup>32</sup> *Ewu* èkèleeziyà neàmbè, èè, dīyī diswika adi ne: “*Eci kī ncīmpè to, cyàcyà kī ncīmpè to.*” Pàdi Nzambi ukupèèsha Nyumà Mwímpè, bwalu mbudikòse! Udi mumanye mwaba wùdi mwimanyine, udi mumanye cyàkenzekà, ne udi mutwìbwe cìtampì too ne ku ditùkù dyà bupikudi bwèbè, kwèbè kuyààyà bwà lwendu lwà pa buloba elu. Kaa, ekèlekèle! Abi’s bìvwa bikèngela kufikishabi muntu ku dipeta diitabuuja bwà kwitabuujae Nzambì, kujúuka ànu mu bukolè mu Nyumà Mwímpè.

<sup>33</sup> Mpindyewu, virgo yìvwà kayiyi mipete Nyumà Mwímpè ayi, (Nudi bavùluke anyi?) cintu cimwèpelè civwàbo bapangile mmaanyi mu myèndù yàbò. Ncyà bushùwà anyi? Bible mmwambe ne *maanyi* ncimfwànyì cyà “Nyumà Mwímpè,” kì bwà cinyi tutu tulaaba babèedi maanyi, ne bikwàbò, bwalu ncimfwànyì cyà Nyumà Mwímpè. Mpindyewu, nènku dībà adi pìikalàbi ne—pìikalàbi ne Nyumà Mwímpè kī mmulwe kùdìbo to, bòbò kabàvwa baMupete to. Nènku pashiishe pààkalwàYe, kwambabò... Mpindyewu, kùdi virgo yìvwà ne maanyi, kwambabo... .

<sup>34</sup> Nudi numòna’s, kwalukilabo mu cikondo cyà èkèleeziyà; kùvwà bàmwè bàà kudìbo muntwamu bàvwà bantu bìmpè kadi kabàvwa mu Bukènkè bwà mùtootò to, cìndi muswè kwamba, ne kabàvwa ne mukàbà wa mwèndù mutùkija mu maanyi to. Nwamònu’s, nènku ùvwà pambelu. Ùvwà mujime,



bàvwa batàpuluke. Pòlò wàkamba, mu ditùkù dyèndè ne: “Bààkatàpuluka neetù, byenze bu ne kabeena ne diitabuuja to.” Nwamònu’s, nènku kubashiyabo ne: “Baakuumuka kutùdì bwalu kabàvwa bàà ku twètù to.” Mpindyewu, byàkabanga kale mu cikondo cyà kumpàla cyà Efèso aci ne kutungunuka ne kubwela mu eci cikondo leelù ewu. Cintu cimwècimwè aci, cyònsò cyà ku bikondo abi, cyàkenzekamu cyàkalunguluka too ne mu bikondo ebi. Netondole cyòci aci mu katanci kakesè emu.

<sup>35</sup> Mpindyewu, mònaayi ne virgo ewu, nànsha nànkù, wàkabwela mu mwaba ùvwà myadi, ditwà dyà mikemu, ne disumakaja dyà mènù awu.

<sup>36</sup> Lekela ngàmbè bwalu ebu, wèwè mulunda wanyì munanga wa mushinga mukolè; bwalu pa ciibidilu ku èkèleeziyà eku, pântù ndwa mwab’ewu, Ntu ànu ndwa cyanàànà kaaba aka bwà kwenza disangisha dyà dyondopa ne kusambidila babèèdì, ne mu ditùnga dijima mwaba kampànda. Kàdi eci ncikondo, cìntù nngènza kunwambila kukaadi ntàntà mule ne, tükijàayi. Mpindyewu tudi bàswè—tudi bàswè kulwa ne kwikala ne meeji matòòke muntu ne lulamatu kùdì mukwèndè, bwalu tudi ku ditùkù dyà ndekeelu. Èyowà’s!

<sup>37</sup> Mpindyewu, ki mwaba ngwòwò awu unùdì nwènù ba-Nazaréens bàà mushinga mukolè ne ba-Pèlerins de la Sainteté bapangile mu dijidiibwa. Nwamònu anyi? Mpindyewu, nutukù bamanye ne Yudaàsè Mpongoloki uvwa ne nsòmbelu mwimpè too ne mwaba ùmwèumwè awu anyi? Yudaàsè ùvwa mwitabùùje Mukalenge Yesù bu Musùngidi, muMwitàbe bu Musùngidi. Ne yèyè wàkajidiibwa kàbìdì. Yèyè uvwa mujidiibwè, mu Yone 17:17, pàakamba Yesù ne: “Taatu, ùbàjidilè ku Bulelèlè, Dìyi Dyèbè m’Bulelèlè.” Ne Yèyè ùvwa Dìyi. Èyo!

<sup>38</sup> Mu Maatàayi 10, bààkapèèshiibwa bukolè bwà kwondopa babèèdì, kubiisha bafwè, kwipata badémóns. Ki kupàtukabo kuya mu bitùpà byònsò byà—byà ditùnga kàdi kwipatabo badémóns, ne kwalukilabo bènda bàsànka ne bèèla mbilà ne bàtùmbisha Nzambì. Ki Yesù kubambila ne: “Kanùsanki ne bwalu démons mminùkòòkèle to, kàdi nsànkaayi bwalu mènà ènù àdi mu Mukàndà wà Mwoyi.” Ncyà bushùwà anyi? Ne Yudaàsè ùvwa naabo, Yudaàsè ùvwa naabo, kàdi aci cìvwa cidimu ne ngondo yisambòmbò kumpàla kwà Yesù kupoopediibwayè pa nkùruse.

<sup>39</sup> Mpindyewu, pashiishe pàakafikàbi ku Mpenta, bwà Yudaàsè àpete Nyumà Mwimpè ne bikwàbò, yèyè kuleeja diikala dyèndè. Yèyè—yèyè kuvilaye Yesù, ne kushààlaye muMutungidi. Nènku ki mwaba awu menemene wàkalwa nyumà awu’s; ùfumina buludì mu Luther, Wesley, kufikisha èkèleeziyà awu ku dijidiibwa ne nsòmbelu wa bu virgo (bantu bakezuke, basukula, bàà cijila, balenga, batàmbe bulenga banùtuku kacya batwilangane naabu), kàdi pàkaadibi bikafika ku...

pàdibo baya ku dyakula dyà mu myakulu ne dipeta dyà Nyumà Mwîmpè, ba-Nazaréens, ba-Pèlerins de la Sainteté, ba-Méthodistes Badîshikamine, dîbà adi kwambabo ne: “Aci’s ndyabùlu.” Nènku ànu pa dîbà adi mene ke paùdi upenda Nyumà Mwîmpè ne utapuluka bwà kashidi; “Bwalu ewu yònsò wákula dîyì dibi bwà Mwânà wa muntu neáfwiidiibwe luse, kàdi ewu yònsò udi wakula bibi bwà Nyumà Mwîmpè kàadyàkufwiidiibwaku luse to.”

<sup>40</sup> Vùlukààyì ne, bayiidi bònsò bàvwa bààkula mu myakulu. Yesù Kilstò wàkafwà pa nkùruse, wààkula mu myakulu. Uh-hum. Pa nànkù pawikala kùyì mwà kupetangana naabo mwaba ewu to, kwikala naabo kalolo mwab’ewu, nebikale munyì bwà mwaba awu? Bwàbo bóbò. . . Piikalabi ne bóbò aba mba-démons, s’ki muvwàbò pààbo. Pa nànkù nudi numòna mwaba ùdici cileeja diikala dyàci anyi? Ke mwaba ulwalwà virgo awu, musukula bu bakwàbò abu, ne nsòmbelu mukezuke. Nèngàngatè èkèleeziyà yà cyena kale yà ba-Nazaréens, ba-Pèlerins de la Sainteté, bàdì biitabùùjè menemene dijidiibwa abu, kwèna mwà kufunkuna munu pa kantu mu nsòmbelu yàbo to; bakezùke ne mwàbo mwònsò. Ncintu cîmpè be mutùdì bònsò bàfwànyine kwikala ne nsòmbelu wa mùshindù awu. Ncyà bushùwà, bikèngela ànu wèwè kwikala nendè.

<sup>41</sup> Mpindyewu, tudi bamanye ne tudi ne bantu búngì cyanàànà mu beena Mpenta bu batentudi. Aci’s ncyà bushùwà. Kàdi paùdi ànu umòna ndola wa mafi, udi mumanye ne awu’s mmwenzela pa wa mwîmpè, wa mulelèlè. Ncyà bushùwà. Nènku kùdi—kùdi Nyumà Mwîmpè mulelèlè, Mulelèlè udi wakula mu myakulu ne uleeja bimanyinu ne maalu à kukèma, ne nkacya ànu ku Mpenta too ne leelu. Pa nànkù bìdì bikèngela bwà twètù kwikala ne batentudi. Bìdì bikèngela bwà twètù kwikala ne mukàjì mubì udi kàyì mwîmpè to, bwà kufikisha mukàjì wa bushùwà ku dikenka. Bikèngela twikale ne mèbà a bufùku, mîdimà mifîike, bwà kuleeja ne muunya ngwà butùmbi. Ncyà bushùwà. Nènku bikèngela bwà ùsaamè, bwà wèwè kusànka bwà mubidi tumatuma. Nènku cidi mmukenji wà cîmpè ne cibi; nènku cidi—nènku citukù misangu yònsò, ne neciikaleku misangu yònsò, bwà pàcidiku ànu cikondo apa.

Mpindyewu, pa nànkù, ki mwaba ngwòwò awu udi èkèleeziyà mukafike’s.

<sup>42</sup> Mpindyewu, Yesù kàakambaku ne “Mu ditùkù dyà ndekeelu,” mu Maataàyì 24, “ne nyumà yibìdì ayi neyìikalè mifwànàngane menemene mu mùshindù wà bifwànyine kuseeswisha ne Basungula mene bu ne bivwa mwà kwenzeka anyi”? Uh-hum. Kàdi ewu uvwa musungula kacya ku difùkà dyà dyulu ne buloba awu ùdi ne Mwoyi wà Cyendèlèlèlè. Mwoyi wà Cyendèlèlèlè, kwèna mwà kuumukaKu to. Ngwà Cyendèlèlèlè ànu mùdì Nzambì amu, kwèna mwà kulekela kwikalaku to ànu mùdì Nzambì kàyì mwà kulekela kwikalaku amu. Ncyà

bushùwà. Bwalu udi citùpà cyà Nzambì, udi mwânà wa balùme ne wa bakàjì wa Nzambì, mwoyi wèbè mmushintùlùdìibwe ne udi citùpà cyà Nzambì, udi ne Mwoyi wà Cyendèlèlè. Kaa, mèmè's ndi muMunange. Kàdi wèwè?

<sup>43</sup> Mpindyewu, muntu kampànda ùwva mumpèèshe kabeji mwab'ewu, cidi ànu lukonko lukesè cyanàànà. Katwàkwangata dîbà dyàbûngì mpindyewu bwà kukàndamuna to. Nènku vùlukààyi ne, musangu wònsò wunùdì ànu nwela lukonko lukesè, Nènteetè ne mwanyi mwònsò bwà kufikaku bu mèmè mwà kukùmbana. Kàdi eci civwa ndukonko lwà mushinga mukolè:

**Muntu kampànda uvwa muswè kumanya ní mbibì bwà bakàjì kufilabo bujaadiki, anyi kwimba, anyi kufila mikenji mu myakulu, kwandamuna mikenji ayi, anyi cipròfetà kampànda, mu èkèleeziyà.**

<sup>44</sup> To, kí mbibì to, cidi. . . pàdibi ànu ne bìdi byenzeka mu bulongame. Nwamònu anyi? Èkèleeziyà ùdi mu bulongame, ne ànu pàdi. . . Mùshindù mulelèlè, wà bushùwà wà kucyènza wùdi bwà aba bàdi bàakula mu myakulu ne bikwàbò, mikenji yàbo yìdi yìfidìibwe kumpàla kwà diyiisha dyà ku cyambilu, kabiyiku mu ciine cikondo aci to; bwalu Nyumà Mwîmpè udi ùkwàta mudimu mu kaaba kàmwè ku musangu, bu mwàkambà Pòlò amu. Kàdi bakàjì bàdi ne mapà à cipròfetà, ne bàdi ne mapà à myakulu ne dyandamuna, ne bikwàbò byònsò pa kuumusha ànu kwikala bayiishi. Kabèna ne cyà kwikala bayiishi to. Mbakàndikìibwe bwà kuyiisha mu maèkèleeziyà, ncyà bushùwà, kwangata mwaba awu, anyi kwikala mulongeshi anyi cintu kanà cyònsò mu èkèleeziyà. Kàdi bwà pa bìdi bitangila mapà, mukàjì ùdi naawu ònsò, ùdi mwà kwikala ne dimwè anyi dyònsò dyà ku mapà à nyumà citèemà bilondèshile Kolinto wa Kumpàla 12, ne kakwena cidi cikandika bwà mukenji wendè kupatukawù pa kaaba kàawù nànsha. Nudi numòna's, mukenji wònsò udi windila cikondo cyàwù.

<sup>45</sup> “Kwòkò kwikale muntu udi wakula mu myakulu, kakùyì mwandamunyi to, ashààle mupuwe too ne pààpetekaku mwandamunyi.” Nwamònu anyi? Ne mikenji eyi yìdi yìfidìibwe, pa ciibidilu, ànu kumpàla menemene kwà disangisha kutwadijadi, dîbà adi mupròfetà, anyi, muyiishi awu, udi mupròfetà wa Dipungila Dipyadìpyà awu, muyiishi, pàdiye ùpatuka apu Nzambì ùdi ùbanga kukwàcila mudimu mu yèyè amu, nwamònu's, dîbà adi pàdiye mumane kujikija dîbà adi mikenji yìdi yìbanga, mukwàbò, ànu kumpàla menemene, bìdi misangu yònsò ànu mu bulongame, misangu yònsò; kàdi mukàjì ùdi ne bukenji.

<sup>46</sup> Lùdì lulonda, ndi muswè ànu, kwangata ndambù wa dîbà bwà kwandamuna elu, nèmbalè mutù wa bwalu:

NKUDIMWINU UMWE WA BIBLE WA MIITABUUA ÀSATU ÒDI ÒBANGA. Washington, dyà matùkù 15 à ngondo wa kaswà-mansènsè. Bamanyi bàà mabàla bàà cyena Kàtòlikè, beena Mishòònyi ne beena Yuda bàdi munkaci mwà kukwàta mudimu bu kasumbù mbabangishe nkudimwinu mupyamùpyà wa cyàpàmwè wa Mifundu udi mwà kwikala mujààdikiiibwe bu Bible wa nsangilu mwindilandila.

<sup>47</sup> Kùdi bikwàbò bintu mwab'ewu bìndi njinga kulonga ndambù kumpàla kwà mèmè kufila dimanyisha dyà bwalu abu. Mu ngàakwilù mukwàbò, nudi numòna's ànu menemene citùdi twamba, ànu menemene cidi Mufundu wàmba ne necyènzeke mu matùkù aa, ne bintu nebidiswike pàmwè bwà kwenza cimanyinu cyà nyama wa lwonji's. Menemene. Mbacitèète, ne bakwatepu mudimu, kàdi mpindyewu mbapete mpungà mulenga mutàmbe wa kacya bwà kucileeja, bwalu cidi ànu mu byanza byàbò bóbò. Nènku ke kabingilà kàndi ntwàdila mayiisha à cipròfeta aa, mbwalu ndi ngeela meeji ne mpa dîbà menemene.

<sup>48</sup> Nènku kwòkò muntu kampànda udi mufwànyine kwalukila dilòòlò dyònsò, netùteete bwà kubanga kumpàla kwà dîbà ne kupàtuka kumpàla kwà dîbà. Nènku mèmè nciyi mujikije cyena-bwalu aci to, dîbà adi nèmmanyishè pààcyabu mu dindà. Twètù katùyi bajikije ditèeka dyà cishimikidi cyà mvensa wa 19 to, mvensa wa 9 too ne ku wa 20 dilòòlò edi, netùcibangishe mu dindà pa dîbà dikumi jaaaja. Netùnùmanyishe ku ndekeelu kwà masangisha, mùshindù utwàfikaku.

<sup>49</sup> Nènku dîbà adi màalaba dilòòlò netwikale pa èkèleeziyà wa Efèsò, mbangilu, tukenketa mu malòòlò mwandamutekète awu: Efèsò, Cikondo cyà Èkèleeziyà wa Efèsò; ne cyà Seemùnà; ne Peegàmò; ne Twatilà; ne Sàadi; ne Filàdèlèfiya; ne Laòdikiyà, mu dyàlumingu dilwalwà edi.

<sup>50</sup> Nènku mudibi ne masàngà manène à ngolo aa mmaadija mu njila amu, mbikolè bwà mèmè kuumushapu byanza too ne ku ciine cikondo aci. Mvwa ànu ngàmòna mwaba awu, mwikale ngumvwa Nyumà udiisha munkaci mwà cisàmba, bìdi byenza ne ndyumvwe ànu mwà kutupika ne lubilu lukolè menemene ne—ne kwambaku cintu kampànda pa byòbì abi's; kàdi ndi ànu ne cyà kudikandaku ne kubitèeka mu cikondo cyàbì ne pa dîbà dyàbì. Pa nànkù wèwè mupangile mwà kulwa bufuku, ikala mutwishiibwe bwà kupeta mukàbà wà mèyi awu anyi mùshindù kampànda ùdi mwà kuCibakula, bwalu ndi muswè bwà kuyawù myaba yònsò. Ne ndi mwenze eci bwalu ndi ndyumvwa mulombòdiibwe kùdi Nyumà Mwimpè bwà kwenza nànkù; ki kabingila kàmwè kàndi ncyenzela. Nènku mèmè, bu ne ncivwa ngeela meeji ne ncifwànyine kukwacisha èkèleeziyà to. . . Nènku mu ditùkù edi, vùlukàayi ne, dîbà dilwalwà àbidi àdi panshi aa ditwikala katùyi mwà kwenza masangisha aa to, nènku bikèngela nùènzè mpindyewu patùcidi ne dîbà dyà kuèza

apa. Nwamònu's, katwèna bamanye ne ndìbà kaayi diikalàbo mwà kwimanyika cyòci eci to, mpindyewu.

<sup>51</sup> Nènku dìbà adi nekwikale didìsanga munkaci mwà maèkèleeziyà ne nebàdisange pàmwè, nebénze mutù wà nsangilu wa maèkèleeziyà, mwine awu ngunùkaadi nendè ne nzùbu munène wa Nations Unies ewu ne dingumba dyònsò didimù. Nènku nebiàngelele anyì bwà kwikala wa ku òmwè dyà ku màngumba awu anyì kwikala mwediibwe pambelu. Nènku's ki cikondo cidi cikèngela bwà twètù kuleeja citùdi ne kwikala batwishiiibwe ne tudi bamanye, kì ndicinka dyà maalu to, kàdi bamanye EMU MMÙDÌ MUKALENGE WAMBÀ mùdi mwimanyine. Èkèleeziyà mukesè ewu ùtu misangu yònsò ànu wa banyaàbanyà, nkasùmbù kakesè menemene kàdi... kaanshinga kakesè kàà bwändà, byenze bu—mwonji mukunze ùdi upicila mu Bible emu, kàdi's ng'Èkèleeziyà misangu yònsò. Nènku mbìmpè twikale bacivùluka.

<sup>52</sup> Mpindyewu ànu kaabwalu kakesè kàà dyela nsèke kumpàla kwà twètù kubala cyàkàbìdi. Mu dindà emu twètù kwangata Bunzambi bwà Kumutù kwà bwònsò bwà Dibuulula dyà Yesù Kilistò, mùvwa Nzambi muMubuulule kutùdi mu dindà emu bu Bunzambi bwà Kumutù kwà bwònsò: NDI Munène awu (kì *Mvwa* anyì *nèngùkale* to), NDI, misangu yònsò. Nènku tudi tumòna mu nshapità wa 1 wa Bwàkabuulwibwà ewu, wa Bwàkabuulwibwà... Ndibuulula dyà cinyi? Yesù Kilistò. Cintu cyà kumpàla cidiYe ùDibuulwila kaaba aka ncinyi? Nzambi wa mu Dyulu. Kàyi nzambi mu busàtu to, kàdi Nzambi umwe. Nzambi umwèpelè, ne Yèyè ùdi ùDibuulula mùshindù awu mu nshapità wa mbangilu wa Bwàkabuulwibwà. Nènku ùcyàkula misangu yinaayi mu nshapità wa 1 bwà kakwìkadi ntùpàkànyì nànsha. Cintu cyà kumpàla cidi cikèngela bwà wèwè kumanya, ncyà ne: Yèyè kì mmupròfetà to, Yèyè kì kaanzambi kàà—kàà kànàkànà to, Yèyè kèna nzambi wa mùshindù mulondèle to, Yèyè ùdi Nzambi! Yèyè ùdi Nzambi. Nènku ki bwà cinyi Dibuulula dyàkapàtuka, ne twètù tucidi ànu tutungunuka naaDì dilòlò edi ànu nàнку bu mutùdi tupeta mùshindù Yèndè mwandamutekète yà bwikadi Bwèndè.

<sup>53</sup> Nènku, kaa, Nzambi àtùkwacisheku patùdi tulongesha Méyì aa apa. Ndi—ndi—ndi mucìlongèle mu mmwènenu wa maalu-malonda, kadi ndi mwindile too ne pàngààbandà mu cyambilu emu bwà disonsodiibwa. Bwalu ndi ndyumvwa ne tudi basòmbe pamwè mu myaba yà mu Dyulu mu Kilistò Yesù, ne Nyumà webè, citùpà cyèbè, ludimi lwà kapyà (Nyumà Mwimpè) udi pa wèwè apu ulwa pa mukwàbò, ne mukwàbò ne kùdi mukwàbò, Ùdi ùteemesha Mubidi munène wà Nzambi awu ne Ùwùlakusha kapyà, nènku's ki mwaba ùdi mabuulula's... .

<sup>54</sup> Mpindyewu, cintu citùdi twamba eci, lukonko elu lùvwa lungeela ne: “Bivwa bikèngela bwà bakàjì...ne bikwàbò anyi?” Kì cyòci aci menemene cyàkabweja èkèleeziyà mu

cimvundu cyèndè ku cibangidilu, bàwba buumùshe butùmbuke bwònsò kùdì batèèleji ne babùtèèke mu cyambilu. Kàdi Nzambì n’Nzambì wa batèèleji. Ùdi ùkwàcila mudimu mu muntu ne muntu, Ùdi ne mwoyi mu mwoyi ne mwoyi wònsò mùdìYe mwà kubwela amu. Ùdi usangana bantu bàdi ne mapà abu ne ùkwacila mudimu mu bóbò. Mpindyewu, dyabùlu yèyè kàyi mwà kubàbakwila pa cintu cimwèpelè to, dībà adi ùdi ulwa ne ubavwija nsangilu munène wa bintu cyanààna ne ùnyemesha bantu. Bu mwàkambà Pòlò ne: “Panùdì nudìsangisha, nwènù bwònsò baakule mu myakulu, ne udi kàyi mulongèshìibwe kubwelayi munkaci mwènù, yèyè kààkwambaku ne: ‘Nudi bapàle! Bakùtàkana anyi!’? Muntu kampànda wàkula mu myakulu, ne *cikampànda* ne *cikansanga* kaciyi mu bulongame to, ne bikwàbò byònsò, abi kabyàkukumbanaku to. Kàdi,” mwàkambaye, “nènku muntu yèyè wamba cipròfetà ne usokolola bwalu busokòme bwà mu mwoyi, dībà adi neàmbe ne: ‘Bulelèlè Nzambì ùdi neenù.’” Kàdi muntu yèyè wakula mu myakulu ku dibuulula kampànda ne ùfila dyumvwija dyàci, cintu kampànda bwà kwibaka èkèleeziyà, dībà adi èkèleeziyà mujima mmwibakìibwe ku cyòci aci. Cintu kampànda ciikalà mwà kwakula ne Nzambì wàkula mu myakulu yitùdì katùyì bamanye to ne ùcifila kùdi ewu ne ùcàndamwina kùdi mukwàbò, ne wamba cintu kampànda cidì cyenzeka menemene ànu mudici cyamba amu, dībà adi nudi ne Nyumà wa Mukalenge munkaci mwènù. Nènku, kaa, tùdyènzejaaayi bwà cyòci aci, balunda bàanyi; tù—tùlamàayi kapyà aku ànu kàteemà’s.

<sup>55</sup> Mpindyewu, kumpàla kwà twètù kubaalula...nsangilu munène wa Mufundu ewu, ndi ndikonka ní mbifwànyineku kwikala bitàmba kunùcyòkesha bu twètù mwà kujuukila kuulu bwà kwololaku mibidi yètù bwà tusunsa tukesè cyanààna patùdì tusambila apa.

<sup>56</sup> Nzambì wa Bukolè bwònsò wàkabiisha Mukalenge Yesù ku bafwè ne kutùleejaYe (paanyimà pàà bidimu cinunu ne nkàmà citèemà) bu Nzambì wa mu Dyulu ùdi kàyi mwà kupangila, tudi tuKusàkidila bwà ciine eci ne bwà Bwikadi Bwendè pàmwe neetù ku ditùkù ne ku ditùkù mu lwendu lwètù lwà ku ditùkù ne ku ditùkù. Nènku tudi ne disànkà dyàbùngì dyà kumanya ne mu dībà edi dyà cibwejàkàji didi bàà pa buloba kabàyi bamanye cyà dyanza, mbaditwe mu kumbula biinà mu buloba, ne badikolesha mu ngumbu yà nshàamenda, kàdi, Éyi Nzambì wa yààyà, kabeena mwà kusokoma ciji cikolè cyà Nzambì to. Kùdi bwanga ànu bùmwèpelè—bùmwèpelè, Mukalenge, nènku tudi ne disànkà dyàbùngì bu mutùdi baBwitàbe: “Pàngààmònà Mashi Nèmpicilè pamutù pèènù.” Kaa, mùshindù mwine utùdì ne disànkà bwà dikùbiibwa dikumbanyine dyònsò adi dilòlò edi dyà Mashi à Mwànà wa mùkòkò wà Nzambì, Mwakwidi Munène, mwimane mu Butùmbi dilòlò edi mwikale wùtwàkwila pa dijikula dyètù.

Tudi ne disànkà dyàbùngì dyà kwikala Nendè munkaci mwètù dilòòlò edi, Mwakudi munène awu, Nyumà Mwímpè munène awu, mufidi munène wa dilaabiibwa awu, mufidi munène wa Mwoyi awu.

<sup>57</sup> Nènku mpindyewu, Mukalenge Nzambì, ànu bu mûndì mubiikile bantu aba kaaba aka mwinshi mwà musàkà ewu dilòòlò edi emu, ne tudi badisangishe kaaba aka bu èkèleeziyà anyì citùpà cyèndè, katwèna badisangishe mu dîna dyà tabernacle ewu anyì mu dîna dyà muntu kanà yònsò ewu to, kàdi mu Dîna dyà Yesù Kilstò. Swaku bwà Nyumà uvwa ne bukòokeshi mu mubidi Wèndè ne meeji Èndè, ne ùMukontonona awu, àbweleku munda mwètù dilòòlò edi ne ùmwijè Dîyì ne ayiisheku Dîyì, ne àDìpèèshèku myoyi yètù yìdì ne nzala eyi patùdì baMwindile apa. Bwalu tudi tulòmba nùnkù mu Dîna Dyèndè ne bwà butùmbi Bwèndè. Amen. (Sòmbelàayi pànshì.)

<sup>58</sup> Mpindyewu bwà nwènù bàdì ne Bibles yènù abu, buulùlaayi ku nshapitá wa 1 wa Bwàkabuulwibwà nubangile ku mvensa wa 9; crayons yènù ne mabeji, nènku nènteetè bwà kunùpèèshakù matùkù ne bikwabo pàndì ngenda nya apu.

<sup>59</sup> Mpindyewu, eci mu bushùwà bwà bwalu cìdì...Mu dîndà emu cìvwa citambe kwikala diyiisha, mwikale ntèèka cishimikidi pa Bunzambì, bwà Dibuuulula; Nzambì mwikale mubuulùdìbwe mu Kilstò. Mbanganyi bàdì bàCìitabuuja? Nzambì wàkabuuludiibwa mu Kilstò, Yèhowàh mubuulùdìbwe mu Kilstò. Mpindyewu mpenyi pàdibi bìkèngela bwà Nzambì kubuuludiibwaye? Mu Èkèleeziyà Wèndè, pàmwè ne cisàmbà Cyèndè, munda mwètù. Nyumà umwèumwè awu, byenzedi bimwèbimwè abi, dimwèneshiibwa dimwèdimwè adi, dinanga dimwèdimwè adi, difwilangana dyà luse dimwèdimwè adi, mwoyi mule ùmwèumwè awu, kalolo, lutùùlu, ditalala, luse, byònsò bìvwa mu Kilstò abi bidi mu Èkèleeziyà. Vùlukàayi ne, lamàayi eci mu meeji ne: cyònsò cìvwa Nzambì aci Yèyè wàkacipòngolola mu Kilstò (Yèyè ùvwa kaabujima kàà Bunzambì mu mùshindù wà mubidi), ne cyònsò cìvwa Kilstò aci Yèyè wàkacipòngolola mu Èkèleeziyà. Nzambì kumutù kwètù, Nzambì neetù, Nzambì munda mwètù. Busàtù bwà Nzambì mu umwe, Nzambì mumwèneshiibwe mu mishindù yisatu mishìilàngàne: Taatù, Mwànà, Nyumà Mwímpè.

<sup>60</sup> Dibuuulula kuleejadi ne Yèyè kèna nzambì yisàtu to, anyì ne mMukosa mu bitùpà bisàtu to. Kàdi Yèyè ùdì Nzambì umwèpelè uvwa Nzambì mu matùkù à buuTaatu, Yèyè ùvwa Nzambì mu matùkù à buuMwànà, Yèyè ùdì Nzambì mu matùkù à cipungu cyà Nyumà Mwímpè, Nzambì umwèumwè awu. Kì nyisatu mishìilàngàne to, kí mbantu bàsàtu to, kí mbuumùntù búsàtu to. Yèyè m'Mupersona ùmwèpelè, buumùntù bùmwèpelè. Kwèna mwa kwikala buumùntù kùyi muntu to. Bàmwè bantu kwambabo ne: "Yèyè kèna bantu bàsàtu to, kàdi's Ùdi buumùntù búsàtu." Kanwena mwà kupandulula aci to; bwalu piikalaYe ne

buumùntù, Yèyè's mmuntu; bikèngela ikale muntu bwà kwikala ne buumùntù's. Pa nàнку Yèyè ùdi Mupersonà ùmwèpelè, buumùntù bùmwèpelè; umwèumwè awu makèèlèlè, leelù, too ne kashidi; Alpha, Omega; Ewu wàkadiku, udiku, ne wâlwa awu. Kaa, Yèyè's udi ànu BYÒNSÒ. Mémè ntu munange aci's.

<sup>61</sup> Tàngilàayi ngiikadilu Wendè, nsòmbelu Wendè, byenzedi Byèndè. Bivwà ne cyà kwikala bìmwènèshìibwe mu tabernacle ewu mene, ànu mwàkadibi mu ditùkù Dyèndè amu. (Ncyèna ngàmb'eci bwa kuditambisha to; Nzambì mmumanye aci.) Kabìyi ànu apa to, kàdi mu buloba bujima. Ndi ne disànkà bwà mùdìbi nàнку. Dìbà adi tudi bamanye patùdi biimanyine bwalu tudi ne Nyumà umwèumwè awu munda mwètù, ùntemuka neetù ne ùleeja ne Yèyè ùdi kaaba aka. Kì ntwètù to, n'Yèyè; katwena mwà kwenza bintu abi to, n'Nzambì. Pa kuumusha aci, mu beena maalu à mamanya, Yèyè mmwanyishe bwà cimfwànyi Cyèndè kukwaciibwaci fòto. Neetù, munda mwètù, mu nyungulukilu wetù, pamutù pèètù, munda mwètù, ùkwàta mudimu munda mwètù ne pambelu pèètù. Kaa, bilenga kaayipu's wè!

<sup>62</sup> Bavwa ne ciibidilu cyà kwimba kaamusambu kakesè ne:

NDI wàkaakula ne Mòsà mu cipuka cilàkuka  
Kapyà awu,  
NDI Nzambì wa Abraham, Mùtootò ùdi  
Ùkenka wa mu Dìndà awu.  
NDI Cilòngò cyà Shalòna, kaa, udi mwambe ne  
Ndi mulwile penyì?  
Nutuku bamanye Taatù wanyì, anyì nudikù  
mwà kutèèla Dìna Dyèndè anyì?  
Kaa, nudi nwamba ne Ndi nganyì, anyì nudi  
nwamba ne Ndi mulwile penyì,  
Nutuku bamanye Taatù wanyì, anyì nudiku  
mwà kwamba Dìna Dyèndè anyì?  
NDI Alpha, Omega, mbangilu ne ku ndekeelu,  
NDI bufùki bujimà, ne Yesù ki Dìna adi.

<sup>63</sup> Kaa, mùshindù mwine ùdibi bilenga bilayà's wè, Dibuuulula adi! Mpindyewu, vùlukayi ne, kwèna mwà kuDipetela kùdi beena teòlòji to, kaDìtu dilwa mùshindù awu to. NeDìlwe ànu bu dibuuulula. Dibàtiiza dyà mu màyi, dyenzeka mu Dìna dyà Yesù Kìlistò, dìdi mwà kufidiibwa ànu bu dibuuulula. Yesù ne Nzambì bìikale Muntu umwèumwè awu dìdi mwà kulwa ànu bu dibuuulula. Bible mujimà mmwibakila pa dibuuulula. Èkèleeziya mujimà mmwibakila pa dibuuulula. Maataàyi 17 ùdi wàmba ne: "Bwalu mémè Ndi mwambe ne: 'Pa lubwebwe elu (dibuuulula dyà nyumà) Nèngiibakilèpu Èkèleeziyà wanyì, ne biibi byà iferno kabyèna mwà kuMutàmba bukolè to.'" Tudi beela muntu kanà yònsò kadyòmbo bwà kutùleejaye, mwaba kanà wònsò, mu maalu-malonda anyì Mifundu, mùvwàku muntu mubàtiijilbwe



mu dìnà dyà “Taatu, Mwànà, Nyumà Mwímpè” pakuumusha èkèleeziyà wa Kàtòlikè too ne ku ditùkù dyà Martin Luther. Pashiishe èkèleeziyà wa Mishòònyi, ùvwa . . .

<sup>64</sup> Ne bwalu bubì bwònsò, tèèlejàayi, patùdì tubwela mu bikondo byà èkèleeziyà apa, bubì bwònsò bùvwa mu èkèleeziyà wa dyàmbedi abu, mbudifinde mu ùvwa ulonda awu. Kutungunuka ànu ne kuya too ne ndekeelu wa byònsò cikafika too ne ku ditombokela Nzambì mu ditùkù dyà ndekeelu. Bubì bwònsò kacya ànu bwàtungunuka ne kudifinda mu èkèleeziyà yònsò, dìnà kasùmbù kakesè kwònsò kàakabanga aku. Byenze bu mu Genèsè, mwoonji wà mvinyo awu, kubangawu kwenda kukola, kukonyangalawu munda mwà èkèleeziyà ne kupatuka mu matùkù à ndekeelu aa. Kabyèna bikèmesha to pàdì Bible mwambe ne: “Bàà disànkà ng’aba bààpanduka mu ditùkù adi.” Èyowà’s, mukalenge, bààpanduka bintu byònsò ebi.

<sup>65</sup> Mpindyewu lombaayi Nzambì bwà . . .patùdì twakula pa Dibuulula apa, Mulòmbaayi bwà kunùpèèsha dibuulula dyà Cyòci eci. Bwalu Cìdi mwà kumanyika ànu ku dibuulula, ne nudi mwà kusùngidiibwa ànu ku dibuulula. Wèwè udi ne dimanya dyà Cyòci aci, mu mùshindù wà mamanya à mu mutù, kàdi kwèna mwà kusùngidiibwa to pàdìCì kaciyi cikubuulwibwe nànsha. “Muntu nànsha umwe kèna mwà kubiikila Yesù ne n’Kilistò to, ànu ku Nyumà Mwímpè.” Aci’s ncìdì Bible wàmba. Muntu nànsha umwe kèna mwà kwamba ne Yesù ùdi Kilistò pàdiye kàyi mupetè Nyumà Mwímpè nànsha. Mmufwànyine kwamba ne: “Mpaasàtà ngudi wamba nànkù, Bible ke udi wamba nànkù.” Abi’s mmalelèlè. “Èkèleeziyà ngudi wamba nànkù.” Aci’s ncilelèlè. Kàdi kwèna mumanaye wèwè mwine to pàdì Nyumà Mwímpè kàyi mukubuulwileCì wèwè to, ne Yèyè mulwe munda *mwèbè*. “Muntu nànsha umwe kèna mwà kubiikila Yesù ne n’Kilistò to, ànu ku Nyumà Mwímpè.” Kì nku dimanya to, kì nku mamanya à mu mutù nànsha.

<sup>66</sup> Mmunyi mwikalabo mwà kwenzeja Bible bwà . . .Bateeta kuMukama, kuMuvwija wa beena Yuda, wa beena Kàtòlikè, ne beena Mishòònyi, pààbò bashiilàngàne ànu mùdì muunya ne bufùku. Mvwa ngeela meeji ne beena Yuda bavwa bamanye cyà cimpè kutamba aci; ngeela meeji ànu ne pàmwàpa ndìbà dyàci bwà kulwa, mwaba ùdici ne cyà kubwela cyònsò mu ditombokela dinène dyà Nzambì edi. Pa nànkù, ne bintu byònsò vùlukàayi ànu ne, twètù katwèna mwà kuciimanyika to, kàdi cintu cimwèpelè citùdì mwà kwenza nkumwagalaja Bukènkè pambelu pàapa, pàmwàpa kudifila twètù biine bu bafwile diitabuuja ne kukwàta njila kuya, nànkù ke mùshindù ùmwèpelè utùdì mwà kucyenza. Kàdi bààbùngì nebiikale ne cyà kwenza nànkù. Nànkù awu’s ki mùshindù awu ùdì Bible mutèekiibwe ne bintu bitùdì tukabwelamù abi’s. Mèmè nciyi mutàngile bimpè to, nèm̀bwelèmu.

<sup>67</sup> Mpindyewu, cintu cyà kumpàla mu Mukàndà wà

Bwàkabuulwibwà, ùdi ùbanga ne Cìdi n'Dibuulula dyà Yesù Kìlistò, cìdiYe aci. Mpindyewu, Yesù Kìlistò ùdi Nzambì wa Bukolè bwònsò. Bwà aci's tudi bamanye. Mbanganyi bàdì baciitabuuja? Ambaayi ne: "Amen." [Disangisha didi dyamba ne: "Amen."—Muf.] Yèyè ùdi Nzambì wa Bukolè bwònsò, ne Ùdi ne Dìna dimwèpelè. Dìna adi ki dìnà dimwèpelè didi difidiibwe mwinshi mwà Dyulu kunùdi ne cyà kusùngidiibwa, Yesù Kìlistò. "Bàdi baDìciina bwà cinyi ku ciina cyà màyi?" ki cidi cinkemesha mèmè aci's. Uh-huh. Nwamònu anyi? Mbwalu nyumà awu wàkadifinda lwà mu Cikondo cyà Seemùnà aci; ne kudifindadi buludi too ne mu cikondo cinène cyà mîdimà aci, ne kucivwija dilongesha, kutungunuka ne kulwa naaci too ne ditùkù dyà ndekeelu edi. Mpindyewu, tângilàayi ànu maalumalonda ne Bible patùdi twenda tulonga lumingu elu apa, mùdici—mùdici cipatula bintu abi.

<sup>68</sup> Mpindyewu cintu cidi cìlondà. Cyàkapeebwa Yone kùdi Kìlistò, ku mwanjèlo, bwà kufidiibwa kùdi (cinyi) Cyèndè? èkèleeziyà, bwà kuCibuulwila èkèleeziyà Yèndè. Nènku mìtootò mwandamutekète mu cyanza Cyèndè yivwa baamisànjeela mwandamutekète bàà èkèleeziyà mwandamutekète. Ne muntu yònsò wìkaleku ne Mukenji, neàcìpete, Mukenji mulelèlè ùmwèùmwe wàkabanga ku cibangidilu awu.

<sup>69</sup> Ne byòbì biine kàbìdì, patùdi tufika mu myaba yà ndòndò ayi, bwà kumòna mùshindù ùdi Nzambì mubweje bintu ebi, s'mbilenga byà dikema. NeCikweleshe ànu mbila's. Mwya ngènta, ncìbala, ne pashiishe nyunguluka katanci kakesè ne ndila mwadi, ngalukila ne nsòmbela kàbìdì panshi, pashiishe nyunguluka katanci. Mwikale ne disànkà dikolè pa kumanya ne: Mmuniy muvwaku Nzambì mwà kwikala ne luse kutùdi bwà kutùfikisha ku dimòna cintu aci mu dìbà ditùdi ne mwoyi edi? Mòna's, mbyenze ànu bu mwàkambà Yesù ne: "Muntu wàkapanyisha byònsò bìvwàye naabi bwà kusùmba dibwa dyà mbongò kampànda." Udi upanyisha maalu à buloba, ne bintu byà pa buloba, ne byònsò bìdi byà cintu cikwàbò kanà cyònsò, bwà kupeta Eci. Ncyà bushùwà, ela lwongo lwèbè lujima ànu pa Cyòci aci. Cintu's n'lwongo lwà musùkà bwà kumòna dibuulula Dyèndè dyà Dìyi Dyèndè.

<sup>70</sup> Mpindyewu, ewu yònsò udi uCibala awu mmubènèshìibwe. Ncyà bushùwà anyi? Kàbìdì tuvwa bambe mu dindà emu ne, pawikala kùyì mwà kubala to, ewu yònsò udi umvwa bàCibala awu, mmubènèshìibwe. Mpindyewu, Cìdi cìbanga ne dibènesha kùdi aba bìkàla mene basòmbe ne bàCitàèleja cìbadiibwa, ne mmulawu kùdi ewu yònsò wadìdinga kuteeta bwà kusàkidilaKu kantu kampànda anyi kuKùumushila kantu. Dìbà adi pìikalà Bible ubuulula bitòòke tòò ne Yesù uvwa Nzambì wa Bukolè bwònsò, dìbà adi dyàkabi kùdi ewu wìkala mwà kucyùmushaku. Èyo. Ndibuulula. Ewu yònsò wadìdinga kusàkidila cintu kampànda. . . Nsangilu mujimà wa—

wa Bwàkabuulwibwà; m'Mukàndà wà ndekeelu wà Nzambì, Mèyi Èndè à ndekeelu, Dyèndè dyà ndek-. . .Ne dibuulula dyònsò dìdì dilwa bibèngangane ne Cyôci aci, ndyà cipròfetà cyà mashimi; kî n'Nzambì to, bwalu eci m'Bulelèlà.

<sup>71</sup> Nènku, vùlukàayi ne, ewu s'ke mukàndà ùmwèpelè mu Bible wàkaleejà Kilistò ne mmwitabe, Yèyè mwine. Anji elàayibi meeji pa bwalu abu's! Mukàndà ùmwèpelè, ndibuulula dyà Yèyè mwine. Mukàndà ùmwèpelè ùvwaYe mutwepu citampì Cyèndè, ne mutèèke mabènesha Èndè ne milawu Yèndè. Mabènesha kùdì aba bìikalà mwà kuWàkidila, mulawu bwà aba bìikalà kabàyi mwà kuWàkidila.

<sup>72</sup> Mpindyewu—mpindyewu tudi tukafika ku cisanga cyà Paatèmò mpindyewu bwà kubanga, mvensa wa 9. Cyà kumpàla, tudi bàswè kwamba ne cidi. . .Mutù wa bwalu wa eci ùdì ne: *Cikèèná-kumòna cyà Paatèmò*. Byàkenzeka panyimà pàà lufù lwà Yesù, pankaci pàà cidimu cyà 95 panyimà pàà lufù lwà Yesù ne cyà 96. Mwaba wùvwà mu cisanga cyà Paatèmò. Cidi cisanganyibwa mu kilòmèètà makumi anaayi ne mwandamukùlù ku mpengà kwà Asie Mineure, ku wesètè, bitàngilangane ne èkèleeziyà wa Efèso, mu Mbù wa Égée ku mikàlù yà Méditerranée. Ki mwaba udici cisanganyibwa awu.

<sup>73</sup> Elaayibi meeji's! Mpindyewu, kaacisanga kakesè kasanganyibwa mu ntàntà wa kilòmèètà makumi anaayi ne mwandamukùlù ku mpengà kwà Asie Mineure, mu Mbù wa Égée. Anu bitàngilangane ne èkèleeziyà wa Filàdelè-. . . anyi èkèleeziyà wa Efèso, mwaba wàkafidiibwa Mukenji wà kumpàla, mùvwà Yone mpaasàtà amu ciine cikondo aci. Mu ngaakwilù mukwàbò, wàkatàngila buludi ku esètè ne yèyè ùvwa ùtàngila buludi ku èkèleeziyà wendè, kuumukila mwaba ùvwàye ùsanganyibwa awu. Nènku Mukenji wà kumpàla ùvwa mutùmina èkèleeziyà wendè, uvwa uleeja cikondo cyà èkèleeziyà. Èyo, cikèèná-kumòna aci cyàkafidiibwa kùdì Yone Munsantu wa Nzambì, yèyè uvwa mpaasàtà wa èkèleeziyà ku Efèso pa ciine cikondo aci.

<sup>74</sup> Ngiikadilu kaayi uvwa cisanga aci dîbà adi's? Cívwa cisanganyibwa penyì, ne mu ngiikadilu kaayi? Èyo, ncimanyike mu maalu-malonda bu cisanga cyà mabwe cyùle tètè ne nyoka, tumìnyimìnyì, misodya, ne bikwàbò. Kùdì kilòmèètà makumi anaayi ne mwandamukùlù mu nyungulukilu wàci, ne cyùle tètè ne mabwe. Mu matùkù à Yone amu, bàvwa bàkwàta naaci mudimu bu Alcatraz. Mwaba ùvwa Mfùmù wa bukalenge bwalàbale bwa Loomo wutuma benzavi, benzavi bèèbè bàà menemene abu, bàvwàbo kabàyi mwà kulama mu buloko ne bikwàbò to, bavwa mwà kubeela muntwamu mu cisanga aci bwà kufwàbo; babàlekela muntwamu too ne mùvwàbo bàfwa.

<sup>75</sup> Lukonko: Cívwa cyenze ne Yone àsanganyibwemu ncinyì? Muntu wa difwàna dyà Nzambì, muntu mwakàne, muntu wa

luumu lwîmpè, wa ngiikadilu mwîmpè, kàyi mu ndululu ne muntu to, bwà cinyi muntu ewu uvwa muntwamu? Bible mmwambe ne: “Bwà Dĭyi dyà Nzambì ne bujaadiki bwà Yesù Kilistò.”

<sup>76</sup> Mpindyewu tudi ne mmwènekelu awu. Cisanga cyà Paatèmò, mu Mbû wa Égée, mu ntàntà wa kilòmèètà makumi anaayi ne mwandamukùlù ne còte, kilòmèètà yàmba kutwa ku makumi anaayi ne mwandamukùlù mu nyungulukilu wàci, ne mabwe, cyùle tètè ne misodya ne tumìnyimìnyì ne bikwàbò, kàdi cishiyà nzùbu wa lukanu (bu mùdi Alcatraz). Pàdibo bapeta mwena lukanu udibo kabàyi mwà kulamina mu buloko emu, bàdi. . . nàniku mwenzavi wa wenza bwòwà wa mùshindù awu, bàdi bamwela mu Alcatraz.

<sup>77</sup> Ki mpindyewu kwangatabo Yone munsantu wa Nzambì ewu. . . wa ndekeelu ku bayiidi abu, ne umwèpelè wàkafwà lufù lwà kaluyi lwà ku byanza byà muntu awu. Yone, kumpàla kwà kuyaye mu cisanga amu, bààkamufùnda ne “mmuloji,” ne kumusabishabo mu cipànza cyà màfutà munda mwà mèbà makumi àbidì ne anaayi, kaàyi amwenzela bwalu to. Kwena mwà kupatula Nyumà Mwîmpè mu muntu mu dimusabisha pèkù nànsha. . .? . . . Kumusàbisha munda mwà mèbà makumi àbidì ne anaayi mu cipanzà cyà mafuta, kaàyi amwenzela bwalu nànsha bùmwe to. Kì bòbò ne, kabingila kàdi beena—beena Loomo bafila, kàvwa ne: “Yèyè ùvwa muloji, ne wàkakika mafuta awu.” Cidì meeji à musunya mwà kudifwanyikijila’s wè! Mpindyewu, nudi numòna’s, pàdibo batùbùikila ne “babadi bàà meeji à bantu, ne batempi bàà mbùkù, ne Beelèzèbulà,” nudi numòna mwaba wùdi nyumà wa kale awu ùfùmina anyi? Kàdi nudi numòna kùdi Nyumà mulelèlè ùfùmina anyi? Mbikondo byà èkèleeziyà. Nwamònu anyi? Mèbà makumi àbidì ne anaayi, ùsàba mu mudilu mukolè, màfutà àtùtuka, kàdi kaàyiku nànsha àmulenga to. Kaa, mùshindù mwine uvwa Nzambì mumunyungulukile mu Yèyè ne Nyumà Mwîmpè Wendè’s. Mudimu Wendè kawùvwa mujike to.

<sup>78</sup> Bààkamutèèka mu cisanga amu mundà mwà bidimu bibidì bulubulu. Nènku pàvwa Nzambì mumupatule mwab’awu pàà nkàayendè apu, kufùndaye Mukàndà wa Bwàkabuulwibwà ànu mùvwa Mwanjèlò wa Mukalenge mumubuulwileci. Ne pashìshe mbyenze ànu bijika, yèyè kwalukila mu musoko wàbo ne kushààla mpaasàta wa èkèleeziyà mu Efèso. Ne wàkafwa ne wàkajikiibwa mu Efèso, Yone wa Nzambì.

<sup>79</sup> Kaa, mmwènekelu kaayipu mpindyewu’s wè! Èyo, èkèleeziyà dībà adi mu bukòkeshi bwà Yone, anyi mu dikèngeshiibwa dinène, Yone ùdi ùfùnda mvensa wa 9:

*Mèmè Yone, udi kàbidì mwanèènù. . . mu dikèngeshi-. . . ne nyààneenù mu makèngeshiibwa, ne mu bukalenge ne mu lutùulu lwà Yesù Kilistò,*

*mwawa nsanganyiiibwa mu cisanga cidi cibiiikiidiiibwa ne Paatèmò, bwà dîyi dya Nzambi, ne bwà bujaadiki bwà Yesù Kilitò.*

<sup>80</sup> Mu ngaakwilu mukwàbò, yêyè wàkangata Dîyi dya Nzambi ne ùvwa ùDijaadika, ne Divwa n'Dîyi dya Nzambi, ke Kilitò kwalukidila mu yêyè ne kujaadika ne yêyè ùvwa mu bulelèlè. S'ki bwalu mbwòbù abu. Dîyi dya Nzambi munkaci mwà kumweneshiibwa munda mwèndè, dijaadika ne yêyè ùvwa musadidi wa Nzambi. Dîbà adi kabàvwaku mwà kuvila Aci to, ki kukengelabi bwà bôbò kumwambila ne yêyè “mmuloji.” “Wàkakika màfutà ne kaàvwa mafwànyine kumwenzela bwalu to, ne wàkakika bantu ne kabàakondapiibwa nànsha, ne yêyè ùvwa mutempi wa lubùku uvwa kàyi mwà. . . Muntu kampànda wa mubi, nyumà mub-. . . nyumà wa cikisu.” Nènku ki bwà cinyi bàakamwela pambelu apu, beela meeji ne ngwa njiwu bwà kwikalaye munkaci mwà kasumbù kàà bantu kasungùlùke aku's. Kàdi yêyè ùvwa ànu mutùngùnuke ne diswà dya Nzambi, ne Nzambi ùvwa ne kiipàcila mu ngiikadilu yònsò awu.

<sup>81</sup> Kavwa mwà kukwàta nendè mudimu to, ne makèngeshiibwa ónsò awu ne bikwàbò, bwalu bansantu bavwa balwa ne: “Kaa, Mwanèètù Yone, netwènzè cinyi bwà *cikampànda*? Ne netwènzè cinyi?”

<sup>82</sup> Yone ùvwa mupròfetà, tudi bamanye aci. Ne muvwabo beela nkonko eyi, ki Nzambi kwenza ànu ne Bukalenge bwalabàle bwà cyena Loomo bumwangate ne bumwele pambelu apu mu cisanga amu. Ki yêyè ne: “Mpindyewu, lwàku, Yone, ndi muswè nkuleeje cintu kampànda ciikalà mwà kwenzeka.” Wa ndekeelu wa ku bapostòlò, kakùcivwakù kàbidi mukwabo wa kuCifùnda to pa kuumusha Yone. Ki kumwelabo pambelu apu mu cisanga cyà Paatèmò kutwadijila panyimà pà lufù lwà Yesù ku cidimu cyà 95 too ne ku cidimu cyà 96 panyimà pà lufù lwà Yesù. Nènku yêyè KuWùfùnda, ne kwambaye ne:

*Mèmè. . . ndi mwanèènù, nyààneenù mu dikèngeshiibwa, . . .*

<sup>83</sup> Mpindyewu, yêyè kààkaakula bwà Dikènga Dinène to. Aci kacivwa Dikènga Dinène to, ne kadyèna dilwa kùdi Èkèleeziyà to. Dikènga Dinène nedilwe kùdi beena Yuda, kí nkùdi Èkèleeziyà to. Pa nàнку kacivwa Dikènga to, Dikènga Dinène adi.

<sup>84</sup> Mpindyewu mvensa wa 10:

*Mwawa mu Nyumà mu ditùkù dya Mukalenge, ki mèmè kuumvwawa paanyimà pàànyì apu. . . dîyi, . . . dya mpungi,*

*Mwawa mu Nyumà mu ditùkù dya Mukalenge, . . .*

<sup>85</sup> Mpindyewu, kwèna mwà kwenza cintu cimpè nànsha cìmwè paùdi kùyi mwanji kubwela mu Nyumà to; Nzambi kèna mwà kukwàta neebè mudimu to. Udi—udi—udi—udi. . . Diditacisha

dyèbè dyónsò didi—didi ànu mu cijèngù paùdi kùyì mucyenze mu Nyumà to. “Mémè ngimba, nèngimbè mu Nyumà. Mémè nsambila,” mwàkambà Pòlò, “nènsàmbilè mu Nyumà.” Ne pashìshe kwòkò cintu kampànda cidi cìlwa kùndi cyà cìmpè, bikèngela cìikalè cimbuulwila kùdi Nyumà ne cishindika kùdi Dìyì (cimwènèshìbwe ku bipeta bìdici cifila).

<sup>86</sup> Mpindyewu bu mùdi, mu ngaakwilu mukwàbò, mémè mwambe ne, Yesù Kilistò wàkalaya mu Dìyì Dyèndè ne mémè mwà kunyingalala, mubatìjìibwe mu Dìnà dyà Yesù Kilistò, nèmpetè dipà dyà Nyumà Mwìmpè. Cintu cyà kumpàla cyà mémè kwenza nkunyingalala. Mbacimbuulwile ne mbulelèlè. Dìbà adi ubàtìjìibwè mu Dìnà dyà Yesù Kilistò, dìbà adi bipeta bìdi ne: Mémè nèmpetè Nyumà Mwìmpè.

<sup>87</sup> Pìikalabi ne ndi nsaama, ne Yèyè wàkalaya ne bu mémè mwà kwitabuujja ne kulombaku bakùlù bàà èkèleeziyà bwà kundaababo maanyì, bansambidila, disambila dyà diitabuujja nedisùngile mubèèdi. “Mukalenge, ndi ngiitabuujja. Ndi ndonda mèyì Èbè à kulonda, mukùlù ànsambidile, andaabè maanyì.” Aci’s ncikosè bwalu, tungunuka ànu cyanàànà, nkujike—nkujike menemene.

<sup>88</sup> “Kaa,” mùdi wamba, wèwè “kwena muumvwe dishìlangana to, nànsha nànkù.” Yesù kààkalediibwa, pààkaMushipa Nzambi kumpàla kwà difùka dyà dyulu ne buloba, pàvwaYe—pàvwaYe Mwánà wa mùkòòkò wà Nzambi, mushipa kumpàla kwà difùka dyà dyulu ne buloba to. Kàdi mu meeji à Nzambi Yèyè mwine, Yèyè ukaavwa mumane kwenza. Ne mémè ncivwaku dìbà adi to, anyì wèwè kuvwaku to; kàdi mu mukàndà wà Nzambi, pìikalabi ne mènà ètù avwamù, àvwa matèèkiibwemu kumpàla kwà difùka dyà dyulu ne buloba.

<sup>89</sup> Pàdi Nzambi wàmba cintu kampànda, cidi ne cyà kwenzeka. Dìbà adi panùdi nukuumbaja mishingà yà Nzambi, vùlukàayi ànu ne, Nzambi neàDìmwènèshè ne neàtàngile bwalu bwà bikwàbò bìdi bishààla abi, tungunuka wèwè ànu ne kuya, mmudimu mumana kujikija. Kaa, aci kí ncilenga anyi? Kaa, èkèlekèle, elanganaayibi meeji! Ambila ànu Nzambi...Ne Nzambi mmwambe ne: “Enza *cikampànda*, ne Nèngènzè *cikansanga*.” Èè, mémè mukenze *cikampànda*, bikèngela Yèyè kwenza *cikansanga*.

<sup>90</sup> Mpindyewu, dyabùlu ùdi wàmba ne: “Wamònu’s, Yèyè’s ùdi unengesha.”

Aci kacyèna ne cìdici cishintulula to. Dànyèlè wàkasambila musangu kampànda ne kupitaku matùkù makumi àbìdì ne òmwè kumpàla kwà Mwanjèlò kufikaye kudiye, kàdi kààkateketa mu mabòko nànsha, ùvwa mumanye ne Yèyè neàlwe nànsha byà munyì, ki kwindilaye ànu cyanàànà too ne pàakafikaYe kuntwaku. Ki mmwènenu nyèyè awu. Kaa, ki paùdi upeta diitabuujja mpòpò apu. Mpindyewu bìdi bikèngela

bwà twètù kuumuka mu cyôci aci, tudi bafwànyine kuditwa lùkàsà mu disangisha dyà dyondopa, kî mmwômò anyi? Ncyà bushùwà. Èyowà, dyà diitabuujà's. Kàdi tudi bàswè disangisha dyà dyondopa dyà musùukà, bwà kwondopa cidi munda, bwalu dyôdi adi ndidi dinenga, udi upeta Mwoyi wà Cyendèlèlèlè. Mwoyi wà Cyendèlèlèlè kawùtu ujimina anyi ukulakaja nànsha, ùdi ushààla, ùshààla wà mwomùmwe.

<sup>91</sup> Mpindyewu, yêyè wàkabwela mu Nyumà kumpàla kwà nî ncinyi kwenzekaci. Cintu cyà kumpàla cyàkenzaye, yêyè uvwa mu cisanga cidi cibikiidiibwa ne Paatèmò (bintu byònsò byàkenzaye ebi), ke yêyè ne: “Mèmè kuumvwa Dîyi,” ne bintu bikwàbò byònsò ebi. Kàdi kumpàla kwà nî ncinyi kwenzekaci, ùvwa mu Nyumà. Nènku bu nwènù mwà kumòna aci mu Bible wenù, Nyumà ne dileetà dinène, Nyumà Mwimpè's. Amen! Yêyè wàkabwela mu Nyumà. Kaa, ndi ngeela ànu meeji ne abi's mbilenga byà dikema:

*Mwa mu Nyumà mu ditùkù dyà Mukalenge, . . .*

<sup>92</sup> Mu ditùkù kaayi? Ditùkù dyà Mukalenge. Mpindyewu, kùdi dikòkàngana dinène. Twánjàayi ànu kuditalajakù, bwà katanci kakesè cyanààna.

<sup>93</sup> Mpindyewu, bu mutwám̀bì mu dindà emu ne, bamwè mbambe ne dibuulula, dyà Maatàayi Munsantu 17, divwa “Peetèlo.” Èkèleeziyà wa Kàtòlikè wàkamba ne: “Yêyè wàkiibakila Èkèleeziyà Wendè pa Peetèlo; yêyè nguvwa paapà wa kumpàla.” Mmuni mùvwàye mufwànyine kwikala paapà kàdi muselangane? Nwamònu anyi? Ki yêyè ne: “Peetèlo wàkaya ku Loomo, wàkajikiibwa kwàka.” Pashiishe ngambilaayi mwaba ùmwèpelè, mu maalu-malonda anyi mwaba kanà wònsò, ùvwaku Peetèlo kacya muye ku Loomo. Nwamònu anyi? Pòlò wàkayaku, kàdi kî m'Peetèlo to. Eyo.

<sup>94</sup> Pa nànkù tudi tusangana ne tusumbù twònsò etu ne bikwàbò, bikaadi ànu bidifindemu. Nwamònu anyi? Kàdi, ne bantu leelù ewu bàdi. . .kwònsò kúyaayà, bàdi. . .Èkèleeziyà munène kampànda ùdi ne musonso kampànda ùvwà mu cyanza Cyèndè awu. Nudi bamanye ne mmisonso búngì kaayi yidibo naayi, misonso myena diinà eyi, leelù ewu yivwa mu. . .? Dikumi ne citèemà. Bàdi ne mifùba, bàdi ne—bàdi ne tupese twà mìzàbì, nènku yidibo balenga ne bambula mu byanza. Nènku katwèna—katwèna ne bintu abi to, katwèna naabi dijinga to. Kilistò ùdi ne mwoyi! Yêyè ùdi munda mwètù, kî mmisonso kampànda to, anyi kapese kàà nkùruse, anyi kapese kàà mufùba, anyi cintu kampànda nànsha. Yêyè ùdi Nzambì udi ne mwoyi, mwikàle ne mwoyi munda mwètù mpindyewu, ùDimwènesha Yêyè mwine. Tudi ne kantu kàmwèpelè kàà civùlukilu, s'ke Didya dyà mèèsà à Mukalenge, bu civùlukilu cyà lufù Lwèndè. Kàdi bwà Kilistò Yêyè mwine, Udi neetù ne munda mwètù mene. Nènku s'ki cintu

citùdi bàswè kuleeja (butùmbi bwà Nyumà Mwîmpè) kùdi bàà pa buloba. KuMuleeja too ne pàdi Bukènkè bùyà. Èyo.

<sup>95</sup> Mpindyewu, kùdi...Pa nàнку, nudi numòna's, twètù kwangata luseke lukwàbò lwà njila alu. Nudi bamanye ne ntu misangu yònsò ànu nteeta kwikala eci, ne Mukalenge wetù ùtu misangu yònsò mucìmbuulwile; kùdi luseke lùmwè luya ne mwà nàka, ne lukwàbò luseke luya ne mwà nàka, kàdi ànu lwà munkacinkaci mwà njila amu's ke mùdi Bulelèlè. Nukaavwaku bamòne Yeshàayi, mwaba ùdiYe mwambe ne nekwikale cibeeba anyi? Yeshàayi 35. Nènku nudi bavùlùke mùvwà bânà bèètù bàà mushinga mukolè ba-Nazarées ne ciibidilu cyà kwimba musambu awu, nudi bamanye's, "*Cibeeba cyà Cijila. Cibeeba cyà Cijila.*" Mpindyewu, bu nwènù mwà kubala Bible wenu bìmpè, kî mmwambe ne "cibeeba cyà cijila to." Mbambe ne: "Nekwikale cibeeba ne *njila*, ne nebàmubiikile," kî nne ncibeeba cyà cijila to, kàdi "*njila* wa cijila." Ne mmutwangaji ùdi ùjikija cyambilu cyèbè aci. Nwamònu anyi? "Neciikale cibeeba ne *njila*, ne nebàmubiikile ne *njila* wa cijila," kî ncibeeba cyà cijila to.

<sup>96</sup> Nwamònu's, njila ùtu wibakiibwa, *njila kampànda*...Njila mwîmpè ùtu wibakiibwa, citùpà cyà citambe kutumbuka citu munkacinkaci, bwalu bìdi bìkoka bùcyafu bwònsò ku nseke yònsò yibidi. Ki cyòci aci. Pàdi muntu ulwa bulelèlè kùdi Kilistò, ùdi ne mèsù èndè mabangameena pa Kilistò. Yèyè mwikale ndambù ne disaluka, neikale mukoleshi wa maalu. Yèyè mwikale ndambù ne mashika, neadisangane ku luseke lukwàbò elu ne kwikala ànu cipèndànsupù cyètu eci, lwàlwa luseke; nwamònu's, byèndè byà mu mutù abi. Kàdi cintu cyà mushinga cidì ànu munkacinkaci mwà njila amu, ne Nyumà mukumbane munda mwèbè, ùkulama ne luuya ne ku mudimu. Amen! Ne mwikale mumanye bikumbane mwà kwikala mudilame mu dikòòkela dyà Nyumà, bwà kutentemuka ànu mùdi Nyumà wenda uya amu; kî nkumudyànjidila anyi kushàadila paanyimà to, ànu mùdi Nyumà utentemuka amu.

<sup>97</sup> Èkèleeziyà wa Kàtòlikè mmwambe ne: "Dibuulula adi divwa m'Peetèlo."

Èkèleeziyà wa Mishònyì mmwambe ne: "Ùvwa n'Kilistò."

Kàdi Bible ùdi ùlongesha ne: "Civwa n'Dibuulula dyàkapèèshàYe (Nzambi mumupèèsha's) dyà Kilistò."

"Wèwè udi Kilistò, Mwànà wa Nzambi udi ne mwoyi."

"Udi mubènèshiiibwe wèwè Simona, mwànà wa Yona, kî mmusunya ne mashi bìdi bikubuulwile eci to, muntu nànsha umwe, seminèrè nànsha umwe, anyi cisòmbedi cyà badyàmbike balùme nànsha cìmwè, cintu nànsha cìmwè, kî ncikulongèsheCì to. Kàdi Taatù Wanyi udi mu dyulu ngudi mukubuulwileci. Wèwè udi Peetèlo, pa lubwebwe elu Nèngiibakilèpu Èkèleeziyà Wanyi, ne biibi byà iferno kabyèna mwà kuMutàmba bukòlè to."



<sup>98</sup> Mpindyewu tudi tukafika mwaba mukwàbò apa ùdibo ne mmwènu yibìdì. Mpindyewu, ndi mwà kwikala mutùpàkane; byòbì nànkù, Nzambì àmfwileku luse. Kàdi nêmbenganganè ne ba-Adventistes du Septième jour bàdì bàmba ne: “Divwa nditùkù dyà mwandamutekète divwayemù adi, ditùkù dyà Mukalenge adi.” Bânà bèètù bàà ba-Adventistes du Septième jour, ne bààbùngì bàà kùdìbo, bàdì bàmba ne cìvwa nditùkù dyà nsabatu dyàkabiikilàye ne ditùkù dyà Mukalenge. Èkèleeziyà wa beena Kilistò ùdì ùdìbìkila, ditùkù dyà Mukalenge adi ne: “Dyà—dyàlumingu, ditùkù dyà kumpàla.” Nènku tudi tumòna misangu yàbùngì ne—ne èkèleeziyà wa beena Kilistò, leelù ewu, beena Mishòonyì abu, bàdì baleedilakù bu “Ditùkù dyà Mukalenge, dyàlumingu’s.” Aci kacyèna mu mifùndu to. Dyàlumingu divwa ditùkù dyà kumpàla dyà lumingu mu Bible, kî nditùkù dyà Mukalenge to. Nènku kadìvwa ditùkù dyà mwandamutekète, dyà nsabatu to. Kî mbifwanyine kwikaladi dimwè dyà ku matùkù awu to bwalu byàkangata Yone bidimu bìbìdì bwà kufùnda Dibuuulula. Divwa nditùkù kaayi adi’s? Nkufwànyine kwikala matùkù à mwandamutekète awu bùngì cyanàànà ne matùkù à kumpàla mu cikondo aci’s.

<sup>99</sup> Bible, Dibuuulula adi dyàkafùndiibwa mu cidimu cyà 95 panyimà pàà lufù lwà Yesù too ne ku 96, bidimu bìbìdì. Divwa nditùkù dyà Mukalenge. Ditùkù dyà Mukalenge didi menemene ànu cididi dyamba aci, nènku’s ki cìvwàdì. Yone wàkangaciibwa mu Nyumà mu ditùkù dyà Mukalenge. Edi nditùkù dyà muntu, kàdi ditùkù dyà Mukalenge nedilwe. Patùdì tulondesha Mifùndu netùjandule ne yèyè ùvwa mu ditùkù dyà Mukalenge, mwambwibwe mu Nyumà ne mwangaciibwe mu ditùkù dyà Mukalenge. Amen! Ncyà bushùwà. Nwamònu’s, yèyè ùvwa mu ditùkù dyà Mukalenge. Bible ùdì wàkula bwà ditùkù dyà Mukalenge. Tudi tufikaku mu katancì kakesè emu, ne Mifùndu yàbùngì.

<sup>100</sup> Cintu cyà kumpàla, ditùkù dyà nsabatu, mutùdì twakula bwàdì, ditùkù dyà nsabatu kî nkulama ditùkù kampànda to. Katwèna ne mukenji bwà kulama diisambòmbò bu nsabatu to. Katwèna ne mukenji wà kulama ditùkù dyà kumpàla bu nsabatu to, mu Dipungila Dipyadìpyà. Bible mmwambe, mu Ebèlu nshapità mwi4 ne: “Bu Yesù mwà kwikala mubàpèeshe diikisha, Kavwa mwà kwikala mwakule paanyimà bwà ditùkù dikwàbò nànsha.” Ncyà bushùwà. Kàdi kùcìdì kushààle diikisha, anyì dilama dyà nsabatu, bwà cisàmbà cyà Nzambì. Bwalu twètù bàdì biitabùùje, kàbìdì, tudi babwèle mu diikisha Dyèndè; tudi tujikija midimu yètù bu mwàkajikijà Nzambì Yèndè.

<sup>101</sup> Tàngilààyì’s wè! Kaa! Mukalenge àtumbe. Ndi mubange kudyumvwa ànu bìmpè be, nkààdì ndìdyanjidila mèmè mwine.

<sup>102</sup> Mònaayi, mu ditùkù dyà nsabatu. Nzambì wàkafùka buloba mu matùkù àsambòmbò, ne ditùkù dyà mwandamutekète Wàkabwela mu diikisha ne kàakapinganaku kàbìdì bwà

kufwimba buloba nànsha. Pashiishe kucipèèshaYe bantu bu civùlukilu. Bwalu kanwèna mwà kucilama mpindyewu to, bwalu panùdi nulama nsabatu kunweku apu, luseke lukwàbò lwà buloba lùdi cyàkàbìdi mu dyàlumingu. Nwamònu anyi? Pa nànkù ciwwa cileeja ne ciwwa bwà cisàmbà kampànda, cipòòlo ne cikondo bwà Izàlèlèlè. Kàdi dībà adi kùcìdi kushààle dilama dyà nsabatu bwà cisàmbà cyà Nzambì.

*Bwalu twètù bàdi . . . bààkiitabuuja bwà kubwela mu diikisha Dyèndè, . . . nànsha mùvwà byenzedi . . . (Ndi munkaci mwa kutèèla Ebèlu, nshapità mwi4) . . . nànsha mùkaavwà midimu mijikè kacya ku difùkà dyà dyulu ne buloba.*

*Bwalu yéyè wàkaakula mu mwaba kampànda . . . mu ngaakwìlu ewu, . . . ditùkù dyà mwandamutekète . . .*

*Nènku kàbìdi, yéyè wàkakosa ditùkù kampànda, wàmba mu Davidi, . . . (nwènù bàdi bafunda, Ebèlu 4)*

*Kàbìdi, yéyè wàkatèèka ditùkù kampànda, wàmba mu Davidi ne, Leelù ewu, paanyimà pàà ntàntà mule; mùdìbi byumvwika ne, Paùdi umvwa . . . anyi mwambe ne: Paùdi umvwa dīyī dyèndè, kupapishi mwoyi wèbè to.*

*Bwalu bu Yesù mwà kwikala mubàpèèshe diikisha adi, (ditùkù) . . . yéyè kawwa kwikala mwakule pashiishe bwà ditùkù dikwàbò to.*

*Kàdi kùcìdi kushààle . . . diikisha (anyi dilama dyà nsabatu) . . .*

<sup>103</sup> Mwaku ewu “diikisha.” *Nsabatu* mmwaku wa pabwawu kutùdi, ùdi ùmvwija ne “diikisha.” Mmwaku wà cyena Ebèlu ùdi ùswa kwamba ne ditùkù dyà “diikisha”, ditùkù dyà nsabatu; kwenji mudimu to, ikisha.

*Bwalu bu Yesù mwà kwikala mubàpèèshe diikisha, . . . yéyè kàvwakù mufwinyine . . . kwikala mwakule bwà ditùkù dikwàbò to.*

*Kàdi kùcìdi kushààle . . . diikisha (anyi dilama dyà nsabatu) kùdi cisàmbà cyà Nzambì.*

*Bwalu twètù bàdi babwele mu diikisha dyèndè abu, . . . tudi twikisha ku . . . midimu yètù, bu mwàkiikishà Nzambì ku yèndè amu.*

<sup>104</sup> Katwênaku tukupingana mu ditùkù dyà lumingu didi dilonda bwà kudibangulula kàbìdi to, tukaadi babwele mu Diikisha. Pàvwa Yesù wàkula pa masànkà, Wàkamba ne: “Nwàkuumvwa bàà kale bàmba ne: ‘Kushipyanganyi.’ Mèmè ndi nnwambila ne, ewu yònsò, udi ukwacila mwanààbò ciiji kakùyi bwalu to, ukaadi mumane kumushipa. Nwakuumvwa bàmba, kùdi bàà kale abu ne: ‘Kwendi masandi.’ Aci’s mmukenji. Kàdi Mèmè ndi nnwambila ne, ewu yònsò ukaatangidi mukàji bwà

kumwalakana wàmanyi kwenda nendè masandi munda mwà mwoyi wèndè.” Mmwômò anyi?

<sup>105</sup> Pa nàнку bintu byònsò ebi bivwa mbivùlukilu, ànu bimanyinu patupu, maalu à kukema, bindile cikondo cilelèlà cìvwà cilwa. Mpindyewu, pàkajikijà Yesù cyòci aci, Maatàayi 11, (masànkà), Wàkamba ne:

*Lwàyi kùNdì, nwènú bònsò bàdì bàkwàta mudimu mukolè, bacyòke, ne bambule majitu makolè, nènku Mémè nènnùpèèshè diikisha dyà misùukà yènú.*

*Ambulaayi cikookedi cyànyì pa mèmè, ne nungeyèmène; bwalu Mémè ndi mupole ne mupwekele. . . (mmwômò anyi?)*

*Lwàyi kùndì, nwènú bònsò bàdì bàkwàta mudimu mukolè ne. . . bambule majitu makolè, ne mémè nènnùpèèshè diikisha dyà musùukà wènú.* (“Pawikala mukwàte mudimu ditùkù òmwè, matùkù dikumi, bidimu bitaanu, bidimu makumi àsàtu ne bitaanu, bidimu makumi ataanu, bidimu makumi citèèmà, ne ukaadi mucyòke ne muzengele, lwàku kùNdì, Nènkupèèshè Diikisha. Nènguumushe bujitu bwònsò bwà mpèkaatù abu pa wèwè, ne kubwela munda mwèbè, ne kukupa diikisha dipwàngàne ne disankishiibwa.”)

<sup>106</sup> Mpindyewu, diikisha adi ncinyi? Twǎnjìbi—twǎnjìbi kutangila eci kakesè, tumòne ne bwalu bùdi cinyi. Bàmwè bàà kùdibo bàdì bamba ne: “Mòna’s, nda ukashàale wa mu èkèleeziyà.” To! “Funda dìnà dyèbè mu mukànda.” To! “Èè, dibatiiza dyà mu màyi dyà mùshindù kampànda.” To! Twǎnjìbi ànu kubùtàngila bwà kumòna ne bwalu bùdi cinyi. Nudiku bàswè kwenza aci mwab’ewu mene patùdì bindile apa anyi? Netùmòne kwàkaya Yone. Mmu ditùkù dyà mùshindù kaayi mwàkayàye?

<sup>107</sup> Pààkafwà Yesù pa buloba apa, ne mudimu Wèndè kujikawù, Yèyè wàkabwela mu mwaba kampànda.

<sup>108</sup> Mpindyewu twàlukilàayi ku Yeshàayi nshapità wa 28, ku mvensa wa 8. Ngeela meeji ne mmwômò, mpindyewu, Yeshàayi 28:8. Nènku túbalaayi, Yeshàayi 28, mupròfetà mwikàle wàkula bidimu nkàmà mwandamutekète ne dikumi ne bibìdì kumpàla kwà kwenzekaci. Mpindyewu, mbanganyi bàdiku baswè kumanya cidi nsabatu mulelèlà, cidi diikisha dilelèlà? S’ki cyòci eci. Mpindyewu, mwaba wùdì mupròfetà mucyàmbè ngwòwò ewu, nènku mémè nènnùleejè mwaba wàkenzekaci. Tàngilàayi, Yeshàayi 28:8:

*Bwalu bònsò. . . (mupòfetà wàmba cipròfetà cyà matùkù aa)*

*Bwalu mèsà ònsò mmùle tènte ne bilùshì ne bukooya, (bantu bangata mèsà à Mukalenge, biikale banwa mfwankà ne maala ne bàshima ne biibà) . . . mu mùshindù wà ne kakwèna mwaba mukezuke to.*

Nganyì wàlongeshayè dimanya? . . .

Nganyì ùdi mwà kulongesha dimanya leelù ewu's?

<sup>109</sup> Mbanganyì bavwa bumvwe Billy Graham leelù ewu? Cìvwa diyiiisha dilenga divwaye muyiishe pa ne, mmunyì mùdi bantu mwà kwitabuujà dishima ne kutungunuka ànu mu dishima adi ne—ne kudìbingisha mene ne beela meeji ne bavwa benza cìvwa cijaalame. Bantu bàà beena Àmèrikè bàngata, mwàkambayè, bàmba ne: “Kasengulu kàà muntu wa lungenyi, ne mucì wa mfwanka wà munù wa mfwanka,” biitaba dimwè dyà ku mashimi à dyabùlù, kàdi pamutù pàà kumuvwija mukutakane, cyònsò cidìye aci, bwà kunwa cintu bu nàнку kàdi kuteeta kumuvwija muntu wa lungenyi. Yèyè's mmupàle ànu bwà kumunwa aku, pàdì . . . pàdìye mùle tènte ne lufù ne kansèrè ne bikwàbò byònsò, kàdi ùcidi ànu umupwita umubweja mu bisùlusùlu byèndè amu. S'mmukùtakane. Kî—kî—kasengulu kàà muntu wa lungenyi to, ne cintu bu nàнку kacituku to. Muntu wa lungenyi kàtu ulenga cintakanyi aci to.

<sup>110</sup> “Kakùyi maala à Oertel 92 to, kakwen mwoyi to,” anyì cintu bu nàнку. Pambelu pàà Kilistò kakwèna Mwoyi nànsha wà kànà to, s'ki Mwoyi mulelèlè wà cyà bushùwà ngwòwò awu. Cidi cìfikisha balùme ne bakàjì ku dinwa cintakanyi aci ncinyì? Mbwalu bàdi bateeta kusankisha nyòòta yidì munda amu yìvwa Nzambì mutèekemu ayi bwà kwikala ne nyòòta Yèndè, kàdi bàdi bateeta bwà kuyisankisha ne maalu à pa buloba. Nènku ki bwà cinyì tudi ne bintu abi. Ki bwà cinyi bantu bàtu benza maalu mùshindù awu, bwalu bàdi bateeta kumana nyòòta yidì munda mwàbò bwà Nzambì ayi, nènku dyabùlu ùdi ùbapa lufù pamutù pàà Mwoyi.

. . . mèsà ònsò mmùle tèntè ne bilùshì . . .

<sup>111</sup> Balombodi bàà èkèleeziyà, bikwàbò byònsò, bàdi bàakula bwàcì ne: “S'mbimpè bwà kupicishaku ànu dîbà dilenga ndambu.” Cintu bu nàнку kacituku to!

*Nganyì wàlongeshayè dimanya? ne nkùdi nganyì kwikalayè mwà kwenza . . . kuumvwija dilongesha? kùdi aba bàcidi bafùmina ku dilekela dyamwa mabèèle, ne bafùmina ku dyumuka ku mabèèle. (Mpindyewu katucyèna kàbìdi bânà bàà mu mabòko to.)*

*Bwalu bìdi ne cyà kwikala kanungu pa kanungu, kanungu pa kanungu; kalongo pa kalongo, kalongo pa kalongo; ndambù apa, ne ndambù pàpa:*

*Bwalu ku mishiku yidì yikukuminà ne mu myakulu mikwàbò nkwàkwilaye ne cisambà eci.*

*Cyakambilaye ne: Edi s'ki... (cinyi? dilama dyà nsabatu!)... diikisha munùdi mwà kufikisha bazengele... ("Lwâyi kûNdi nwênù bônso bàdi bazengele ne bambule majitu makolè.") ...mwà kufikisha bazengele bwà kwikisha; nènku eci's ki cyashima: nànsha nànkù kabàakaswa kutèèleja nànsha.*

112 Aci cyàkenzekà dîbà kaayi? Bidimu nkàmà mwandamutekète ne dikumi ne bibidi paanyimà pàakashikama mishiku yìwya yìkùkumina pa bantu mu Ditùkù dyà Mpenta ne bônso bàakuujiibwa tètè ne Nyumà Mwîmpè ne kubangabo kwakula mu myakulu mikwàbò ne, Nyumà Mwîmpè kwangataye myoyi yabo ku bokòokeshi, ne kulekelabo bintu byàbo byà pa buloba abi. Pashùshe kubwelabò mu Diikisha ne Kilistò. Pòlò wàkamba, mu Ebèlu nshapità mwi4 ne: "Twètù bàdi babwèle mu diikisha Dyèndè tùkaadi bamane kulekela byenzedi byònsò byà pa buloba bu mwàkenzà Nzambì mu ditùkù dyà bufùki Bwèndè, Yèyè wàkabwela mu diikisha Dyèndè, ne twètù tudi tubwelamu Nèndè paanyimà pàa byenzedi byètù byà pa buloba bimane kujika." Ke Nsabatu webè wa cyà bushùwà, ne mulelèlà nyèyè awu's.

113 Pa nànkù Pòlò wàkambwibwa ne wàkabwela mu Nyumà wa Nsabatu awu, ne wàkatuntumunyiibwa kùdi Nyumà Mwîmpè too ne mu ditùkù dyà Mukalenge.

114 Tudi ne mvità bwà cinyi? Tudi ne ndululu bwà cinyi? Ditùnga didi dilwishangana ne ditùnga bwà cinyi? Yesù wàkalwa, Mfùmù wa Mwoyi, ne bààkaMushebeya.

115 Mu mbingu mikesè emu, anyi mene ànu mpindyewu, nekwikale milongo yà ngulungu ne Baataatù Noël ne—ne tungonga twà tudila ne bintu byà mishindù yònsò bilembeleja, biine abi s'mmushingà wà cimpàngaanu. Ncintu cyà èkèleeziyà wa Kàtòlikè. Bantu biikale báfuta mishinga minène ne bàshintakajilangana matabishi ne bintu byà mùshindù awu, s'mbumpàngaanu! Noël's nditùkù dyà dikuukwila.

116 Nenku byòbì mene, Kilistò kààkalediibwa mu ditùkù dyà makumi àbidi ne dítàanu dyà ngondo wa ciswa—munène to. Kabivwa mwà kwikala nànkù to. Bu nwênù bafwànyine kwikala mu Yùdaaya, tukùnà ntùle tètè ne nèjè, bibi bitambe ne mùdibi kunweku eku. Mulela mu ngondo wa cisanga nkàsu pàdi bufùki bwònsò butoloka.

117 Mpindyewu, kàdi's ncilèlè cyàbo bòbò. Kàdi bwà cinyi—bwà cinyi tudi twenza bintu abi's? Bwalu tudi tulonda bilèlè byà bantu pamutù pàa mikenji yà Nzambì. Bòbò... Cintu bu nànkù kî ncifwànyineku kwikala ne bwalu to, kàdi mbadivwije ànu ditùkù dyà bungèndààmùshingà cyanàànà's. S'mbundu be, bundu bwàbù bòbò bwà kwenza bintu byà mùshindù awu. Mushingà wà cimpàngaanu's wè! Ndîbà kaayi dikaatuku Taatù Noël ne cyà dyenza ne Yesù? Ndîbà kaayi

dikaadiku kalulu kàà Paasàkà anyi nzòòlo anyi. . . kafiita mpenci wa diikala dyà mùshindù kampànda anyi cikampànda, anyi kàlulù kakesè kàà mùshindù kampànda katòòke kiikaleku ne dipetangana kampànda ne dibìikà dyà ku lufù dyà Yesù Kìlistò? Kanwenaayiku numòna mùdì bangèndààmùshingà. . . ?

<sup>118</sup> Ki bwà cinyì bàdi bàsùmbisha mikàndà yà kale yà bidùndadùnda eyi, ne fòtò yà manyaanu, ne yà bushààdile, ne bintu byà mùshindù awu, mbwalu ngiikadilu wa bantu ùdi ùjinga bikolè bintu byà lukutukutu bu nàнку awu. Mbwalu kùdi cintu cìdì kaciyi mu cyòci mu mwoyi, kacya kabàtukù babwele mu Diikisha adi ne Nzambi ne biikishe ku bintu ebi to. Pàdìbo babwela mu cyòci aci ne bapeta Nyumà Mwìmpè, dìbà adi kwàbò nkujike ne maalu à pa buloba ne bintu byà pa buloba.

<sup>119</sup> Nzambì kumutùntumunaye. Kaa, mpindyewu, ncyèna ngeela meeji ne wàkangaciibwa bu Pòlò nànsha, mubande mu dyulu dísààtu ne mumòna bintu. Èyo, Nyumà Mwìmpè wa mushinga mukolè awu wàkenza kukaadi ndambù wa mbingu, mwaba ewu, tumònebi's. . . Mu ngaakwilu mukwàbò, Mwawa ne bwòwà bwà lufù, ki Nyumà Mwìmpè kungangata e kundeeja ne cìvwalù. Nukaadi bùmve bujaadiki abu. Pashìishe pangààkalukila ne: "Dìbà adi, lufù, kalonda kèèbè kàdi penyì?" Mutùntumuna bwà kumòna ànu cìvwa dyàmwamwa dyà ridò. Wàkangaaluja bwà kunwambila ne dyàmwamwa adi katwàkwikala mikishi ne nyumà to, tudi bantu balùme ne bakàji, nsonga, katùyì tufwà, katùyì tusaama, ànu dyàmwamwa dyà cilùlù cikudika aci. Lufù kalwèna ne cìngà cyà kukwenzela to ànu kukupulumuna ne mu Mwaba awu.

<sup>120</sup> Mpindyewu, Yone wàkatùntumunyiibwa mu cisanga cyà Paatèmò aci, mu Nyumà, too ne mu ditùkù dyà Mukalenge. Èdi nditùkù dyà bantu, bantu bàdi bàlwangana mvità, kàdi ditùkù dyà Mukalenge nedilwe piikala makalenge aa mwà kuvwijiibwa makalenge à Mukalenge wetù ne à Kìlistò Wendè, pashìishe nekulwe Bukalenge bunène bwà bidimu cinunu. Ditùkù dyà Mukalenge, ditùkù dyà dilwa Dyèndè, cilumbulwidi Cyèndè, ki cìikalà ditùkù dyà Mukalenge adi.

<sup>121</sup> Èdi nditùkù dyà bantu, ki bwà cinyì bàdi banùdyula ne banwenzela bìdìbo baswe kwenza abi, kàdi nekùlwè cikondo. . . Bàkubiikila. . . bàdi bàkubiikila mpindyewu ne, "munsantu mubunguluki wa mu malaba ne mukoleshi wa maalu," kàdi kùlwalwa cikondo, nwamònu's, cìikalàbo kabàyi mwà kwenza nàнку to. Nebeele mbila batwa mikemu ne bapona ku makàsà èbè. Bible mmwambe, mu Maalàki 4 ne, nenwèndeke mene nè pa butù paanyimà pàà bòbò bamane kwoshiibwa; kabwàkubàshiila nànsha muji anyi ditàmbà to. Ki cyòci aci menemene cìdì Bible wàmba ne: "Baakane nebendelè pa butù bwà beena lwonji." Ncyà bushùwà menemene. Kakwàkubashààdila muji anyi ditàmbà to, cintu nànsha cimwè cyà kwalukidilapu. Kwàbù nekwikale kujike. Mpindyewu edi nditùkù dyà muntu

(midimu yà muntu, byenzi byà muntu, èkèleeziyà wa muntu, mmwènenenu yà muntu), kàdi ditùkù dyà Mukalenge dilwalwà.

<sup>122</sup> Mpindyewu, yéyè ùwva mu Nyumà mu ditùkù dyà Mukalenge. Èyo, nènku cintu cyà kumpàla cyàkuumvwaye pàvwaye mu Nyumà mu ditùkù dyà Mukalenge... Mpindyewu tudi ku mvensa wa 10:

*...mu Nyumà mu ditùkù dyà Mukalenge, ki yéyè  
kuumvwa...dîyî, bu...mpungi,*

<sup>123</sup> Mpindyewu, katupicishiku lusumwinu nànsha lùmwè to. Byòbì bikèngela bwà twètù kutùungunuka naaci màalabà, tudi mwà kwenza nànkù, nwamònu's. Muntu kampànda wàtàngilaku dîbà, bwà ncilù kujikija pashiishe nànsha.

<sup>124</sup> Èyo, mpindyewu: "...ùwva mu Nyumà mu ditùkù dyà Mukalenge." Mpindyewu vùlukàayi ne, cintu cyà kumpàla cidi cikèngela bwà wèwè kwenza ncinyi? Kubwela mu Nyumà. Mmunyi mwikala mabuulula aa mwà kulwa kunùdi? Bwelaayi mu Nyumà. Mmunyi munwàpeta Nyumà Mwimpè? Bwelaayi mu Nyumà. Bwelaayi mu Nyumà!

<sup>125</sup> Paùvwa ngènzàmpèkààtù ne uya ku dija dyà maja, s'uvwa ubwela mu nyumà *awu*. Kaa, ekèlekèle, s'uvwa utwadija kutuuta bikàshi ne utuuta makàsà panshi, ne udyela udyàkidila, ne wela cifulu cyèbè panshi apu, ne unyunguluka eku ne eku, wenza maalù à lukutukutu's. S'uvwa mu nyumà waci. Nudiku mwà kudifwànyikijila muntu wetù ewu, munangi wa maja wa kalàndààmùsèngà, uya ku dija dyà maja, wàmba ne: "Èè, nènku's nudi bônso nupicila mu cikondo cimpè be, ngeela meeji's."

"Kaa!" mudibo bafwànyine kwamba. "Wèwè kuyi muswè kuja to, pàtukà mwab'ewu!" Nwamònu anyi?

<sup>126</sup> Ndabi ku dinaya dyà ndundu, muntu kampànda àdìdingebi òbeshè, anyi cintu kampànda cikwàbò, wèwè kushààla musòmbe mutàngile, kàdi kwamba ne: "Èè, ngeela meeji ne abi's mbimpè be." To, kwèna mufwànyine kwikala munangi wa ndundu to, kwèna mufwànyine kwikala wa cyà bushùwà... kwèna mufwànyine kwikala mu nyumà wa ndundu to. Pàdì ànu muntu wòbeshà, udi ulandapuka kàdi kwela cibingu ne: "Yoyòyò! Ekèlekèlée! Twòbeshi's wè!" Ubakula cifulu cyà muntu kampànda ku mutù kwèndè aku mùshindù *ewu*, kakuyi muntu nànsha umwe ùkwela dîyî to.

<sup>127</sup> Dìbà adi mu èkèleeziyà paùdi ubwela mu Nyumà, ùjuuka wèla lubilà ne: "Butùmbi's wè! Àlèluuyàh! Mukalenge atumbe's wè!"

Muntu kampànda ukudimuka, wàmba ne: "Munsantu mubunguluki wa mu malaba." (Kaa, Mwanèètù Wood...)

<sup>128</sup> Nènnweleku lukonko. Patwikale bansantu babunguluki bàà mu malaba ne mbwalu tudi twenza nànkù, dîbà adi bòbò abu's mbabunguluki bàà mu malaba *bakooyike* mwab'awu.

Mbipiciibwe ne mêmè mwikale munsantu mubunguluki wa mu malaba (Ki mmwômò anyi?) pamutu pàà kwikala muntu mukoooyike's. Ekèlekèle! Cyà bushùwà's! Babunguluki bàà mu malaba bakooyike abu.

<sup>129</sup> Mpindyewu, yêyè ùvwa mu Nyumà. Ùkaavwa mubwele mu Nyumà, dîbà adi maalu àdi abanga kwenzeka. Ne pashiishe mmwenze ànu ubwelamu, kuumvwaye mpungi. Mpindyewu, mpungi ùtu misangu yònsò ànu ùmanyisha diseemena dyà cintu kampànda. Byenze bu panudi nulwa... Mfùmù kampànda—kampànda wenda useemena, nebadidisha mpungi. Pààseemena Yesù, Yêyè neàdidisha mpungi. Ncyà bushùwà anyi? Pàvwa Yòzefù upatuka, bàvwa badidisha mpungi. Nènku mpindyewu cintu kampànda cidi munkaci mwà kulwa kumpàla eku, Yone kubwela mu Nyumà ne kuumvwaye mpungi. Kuumvwaye mpungi, ki kukudimukaye bwà kutangila civwa paanyimà pendè pààkuumvwaye mpungi awu; paanyimà pàà yêyè mumane kubwela mu Nyumà.

<sup>130</sup> Pàmwápa ùvwa munkaci mwà kuja maja, ùtùpika, unyeemakanangana eku ne eku kwà cisanga cyònsò aci aku. Ùvwa munkaci mwà kupicila mu cikondo cimpè, ùvwa mu Nyumà. Pa nàнку, ki yêyè... Aci cidi mwà kuumvwaye cyà cinyangakaja cijila, kàdi ncyèna ncyamba mu mùshindù awu to, nwamònu's. Ùvwa mwà! Aci's cidi... èè, yêyè's uvwa mufwanyine kwikala wenza nàнку. Ngeela meeji ne ùvwa munkaci mwà kupicila mu cikondo cimpè mu Nyumà, ànu ùtùmbisha Nzambi, bwalu aci's ke cyàkenzeka menemene pààkabatùlukila Nyumà bwà musangu wa kumpàla. Pààkabapwekela Nyumà Mwimpè, bàakatetuka bu balùme ne bakàjì bakwàcike maala, ne kwenzabo maalu bu bakwàcike, ne bakukumina. Nènku kubiikil-... bàtungunuka ànu nàнку awu mu mùshindù wà ne bantu bààkamba ne: "Bantu aba mbùle ne mvinyo mupyamùpyà." Mùshindù awu ngwàkenzabo musangu wà kumpàla, pa nàнку Nyumà kulwa cyàkàbìdì, pàmwápa ùvwa mwenze mùshindù ùmwèùmwè awu. Nwamònu anyi? Kakwèna cintu cipyacyipà pa bwalu ebu—ebu to, eci ntèndeleele *wa kale*. Èyowà.

<sup>131</sup> "Mu Nyumà mu ditùkù dyà Mukalenge." Mpindyewu, tudi tucyùmva. Mpindyewu ncinyi? Mpindyewu, civwaye wenza ncinyi? Yêyè wàkatuntumunyiibwa mu cisanga amu mpindyewu, mu Nyumà, too ne mu ditùkù dyà Mukalenge òò. Nènku mmwenze ànu ubwela mu ditùkù dyà Mukalenge anyi, kuumvwaye mpungi. Ncinyi ciine aci? M'Muntu kampànda wenda useemena. Munène kampànda munkaci mwà kuseemena. Mpungi udila, Kampànda nyêyè awu ulwa! Kutàngilaye! Alèluuyàh! Mpungi:

*Wamba ne: Mêmè ndi Alpha ne Omega, wa kumpàla ne wa ndekeele:...* (kabiyi dimanyisha dyà muntu mwibìdì anyi muntu mwisàtù to, kàdi Muntu umwèpelè



awu)...*Ndi* byònsò bibìdì *Alpha ne Omega*,...  
 (“Bangabanga ne Mémè kukuleeja ní ncinyi ní ncinyi,  
 Ndi muswè kukumanyisha ne Ndi nganyi!”)

<sup>132</sup> Dibuulula dyà ditambe bunène ku ònsò m’Bunzambì, Bunzambì bwà Kumutù kwà bònsò bwà Mukalenge wetù Yesù Kilistò. Kwèna mwà kufika pa cishimikidi cyà kumpàla paùdì kùyì mwitabuuje aci to, kupatukila apu... Ki cyàkamba Peetèlo ne: “Nyingalalaayi, bwà nushiishè kumònà Bunzambì. Nubatijiibwe mu Dìna dyà Yesù Kilistò bwà dilekelediibwa dyà mpèkaatù yènu, ne dîbà adi ùdi pabwîpì ne kubwela mu Nyumà.” Cintu cyà kumpàla cidì cikèngela bwà wèwè kumanya m’Bunzambì bwà Kilistò. “Mémè ndi Alpha ne Omega! Ndi A ne Z, kakwena mukwabo pakuumusha Mémè to. Mvwa ku cibangidilu, Nèngiikalè ku ndekeelu. Mémè ki Yèyè wàkadiku, udiku, ne wâlwa awu, wa Bukolè bwònsò.” Anji elààyibi meeji pa Cyòci aci! Ki cyàkamba mpungi ncyòci aci.

<sup>133</sup> Watàpa ntààla wadimuka Yone! Udi mubwele mu Nyumà, cintu kampànda necikubuuludiibwe. Ncinyi ciine aci? Mpungi ùdi ùdila, cintu cyà kumpàla ne: “Ndi Alpha ne Omega.” Dyà kumpàla dyà ku mabuulula ònsò. (Kaa, ngènzàmpèkàatù, inama, nyingalala mpindyewu kumpàla kwà dîbà kwikaladi dimane kupita.) “Ndi Alpha ne Omega.” Ki cintu cyà kumpàla cyàkamumanyishàYe, ne Yèyè uvwa nganyi. (Udi wenda useemena ewu nganyi’s? Ewu m’Mfùmù Yesù anyi? M’Mfùmù Nzambì anyi? M’Mfùmù Nyumà Mwîmpè anyi?) Yèyè ne: “Ndi Cyònsò aci! Ndi A ne Z. Mémè ki cibangidilu ne ndekeelu. Mémè ki Udi kàyì úfwa to, Wa Cyendèlèlè awu!”

<sup>134</sup> Ànu paanyimà ndambù tudi tuMumòna mu mmwenekelu Yèndè mwandamutekète, tàngilàayi cidìYe dîbà adi’s. “Mémè ndi cibangidilu ne ndekeelu. Ndi Alpha ne Omega, wa kumpàla ne wa ndekeelu. Mvwaku bangabanga ne kwikalaku wa kumpàla; ne paanyimà pàà kakùciyi wa ndekeelu, Nèngiikalè ànuku,” mu ngaakwilu mukwabo. “Wa kumpàla ne wa ndekeelu!”

...*ne, Cyùdì umòna aci, cifunde mu mukàndà, ne utume...kùdì èkèleeziyà mwandamutekète yidì mu Ashe; ku Efeso,...Seemùnà,...Peegàmò,... Twatilà,...Sàadi,...Filadèlèfiyà, ne ku Laòdikiyà.*

<sup>135</sup> Èyo, dyà kumpàla kwà mabuulula wònsò m’Bunzambì bwà Kumutù bwà Yesù Kilistò. Udi ne cyà kumanya ne Yèyè nganyi paùdì umvwa Dìyi adi. Èyo, Dìyi dimwèdimwè dyàkadila pa Mukùnà wà Sinaayi adi, Dìyi dimwèdimwè dyàkadila pa Mukùnà wa Dikudimuka dyà mpàla, Dyòdì dimwèdimwè adi: “Umwe bu Mwànà wa muntu.”

<sup>136</sup> Mpindyewu tàngilàayaaku mu mvensa udi ulonda ewu. Èyo:

*Ki mémè kukùdimuka... (Nshapità wa 12 mpindyewu.)*

137 Netwikale mwà kushiya èkèleeziyà eyi bwà katanci kakesè cyanààná, bwalu lumingu lujimà lulwalwà elu mpa èkèleeziyà eyi. Nwamònu's, pa nàнку netwikale ànu mwà kupìcilapù.

138 Kàdi Yèyè kwamba ne: “Aba. . .Nènnùlombòlè bwà kutuma Mukenji wùndi nnuleeja ewu.” Nganyi? “Mémè ki wa kumpàla ne wa ndekeelu. Mémè ki Wa Kumutù kwà bònsò awu. Mémè ndi Wa Bukolè bwònsò awu. Ne ndi mulwè bwà kunwambila ne ndi nnupa Mukenji mutumina èkèleeziyà mwandamutekète. Ndi muswe bwà nwènu kuWùfùnda, kuWùlongolola.” Nwamònu anyi? “Ne èkèleeziyà mwandamutekète yìdi mu Ashe.” Mpindyewu, yìvwà ng'èkèleeziyà cikondo aci miikale ne ngiikadilu munda mwàyì uvwa uleeja bikondo byà èkèleeziyà bivwa ne cyà kulwa.

139 Mpindyewu:

*Ki mémè kukudimuka bwà kumòna dìyì òvwà dyàkula naanyì adi. Nènu mumane kukudimuka, mémè kumòna tùndeyì twà ngòlò mwandamutekète;*

140 “Tùndeyì twà ngòlò mwandamutekète.” Mpindyewu, cìdi. . .Nkudimwinu wa Roi Jacques, unùdi nendè pàmwàpa anyi mu Scofield anyi—anyi pàmwàpa mu Thompson Chain, anyi yimwè mikwàbò, kì mmu yòyì mwab'awu to. Kabyena byàmba ne bitèekedi byà myèndù to, bìdi byàmba ne byambudi byà myèndù; biimanyinyi byà myèndù, ngeela meeji, ki mwaku mujaalame, mwìmpè ùdi mwamba mu nkudimwinu wa mbangidilu. Nwamònu's, mu ngaakwilu mukwàbò, bitèekedi byà myèndù mwandamutekète byà ngòlò ebi bivwa ng'èkèleeziyà mwandamutekète. Yèyè ùdi wàmba pashìishe ndambù, mwandamu-. . .mu mvensa wa 20 emu, “Bitèekedi byà myèndù mwandamutekète byùdi umòna ng'èkèleeziyà mwandamutekète.” Pa nàнку, nudi numòna's, bu cyòci kandeyì, kàvwa mwà kwikala kabutuke lukasa ne kwoshike kwònsò, ànu mu katanci kakesè cyanààná. Kàdi kì ntùndeyì to, cìdi nci—nciimanyinyi cyà mwèndù. Cìdi cicipatula bu ciimanyinyi cyà mwèndù. “Mumane kukùdimuka mémè kumona muntu mufwànàngàne ne Mwànà wa muntu mwimane munkaci mwà. . .munkaci mwà biimanyinyi byà myèndù mwandamutekète.”

141 Mpindyewu—mpindyewu tàngilàayi. Kandeyi nkafwanyine kubutuka, nkafwanyine kwenguluka, kakùvwaku kufwanyine kushàalaku kantu to, mu mèbà makesè kavwa kafwanyine kwikala kapyè kabutuke. Kàdi ciimanyinyi cyà mwèndù, ciimanyinyi cyà mwèndù cyòci's cìdi nùнку ewu, . . .

142 Mwab'ewu, twàngatàayi—twàngatàayi Mufùndu mwab'ewu, twà—twàngatàayi Zekàayi 4:1, dìbà adi tudi pàmwàpa mwà kupeta mu Zekàayi amu citùdi baswè aci's. Zekàayi 4.1, ne ndi ngeela meeji dìbà adi ne pàmwàpa mu cyòci eci netwikale mwà—mwà kupatwilamù pàmwè citùdi tujinga aci. Ncyèna mwà

kupeta Zekàayi mu Sefànyà to, mmwômò anyi? Èyo. Èyo. Bible wanyì wa kale ùkaadi musunsuke yònsò. Zekaayi 4:1, tèèlejaayi ne ntèmà mpindyewu, angàtaayi cimfwànyì cilenga mwaba ewu:

*Nènku mwanjèlò . . .*

<sup>143</sup> Mupròfetà, mpindyewu, ànu bidimu nkàmà yitaanu ne dikumi ne citèemà kumpàla kwà Kilistò:

*Nènku mwanjèlò wakaakula naanyì awu kulwaye kàbìdì, ne kumbiishaye, bu muntu udibo babiishe ku tulu, (Mpindyewu mupròfetà ùdi mu cikèèná-kumòna.)*

*Ki yèyè kungambila ne: Udi umòna cinyi? Ki mèmè ne: Ndi mutàngile, kàdi kumòna citèèkedi cyà mwèndù (Mpindyewu, mwaku ùmwèumwè awu mmukùdimuna ne “ciimanyinyi cyà mwèndù.”) cyònsò cyà ngòlò, ciikale ne nzàbà kwìnshi. . . ku mutù kwàcì, (Aci’s civwà mwèndù.) ne myèndù yààcipu mwandamutekète, ne mbungu mwandamutekète ku myèndù mwandamutekète eyi, yìdì pamutù pàà nzàbà awu: (Nwamònu’s, bikondo byà èkèleeziyà bìmwebìmwè bìdì munkacì mwà kulwa abi. Nwamònu anyi?)*

*Ne micì yìbìdì yà olèvà ku luseke lwàcì, . . . (Mpindyewu, mmùshindù kaayi wà. . . Civwabo bèèla mu myèndù ayi bwà kulamayi kadilu mu cikondo cyà Bible ncinyi? Kùdikù muntu mumanye anyi? Maanyi. Maanyiià mùshindù kaayi? Maanyi à olèvà.) . . . micì yìbìdì yà olèvà. . . (Ncinyi ciine aci? Dipungila Dipyadiyà ne Dikulukulu; mbibìdì bìdì biimane ku luseke kwàcì aku’s.) . . . ùmwè ku dyàbalùmè dyà nzàbà aku, ne mukwabo lwà ku luseke lwà ku dyàbakàji aku.*

*Ki mèmè kwandamuna ne kwakula ne mwanjèlò uvwa wakula naanyì, kwamba ne: Mbinganyì ebi, mukalenge wanyì?*

*Ki mwanjèlò uvwa wakula naanyì awu kungandamuna kungambila ne: Kwèna mumanye cìdì—cìdì bintu ebi anyi? Ki mèmè ne: To, mukalenge wanyì.*

*Nènku kungandamunayè ne kwakula naanyì, wàmba ne: Eci n’díyì dyà MUKALENGE kùdì Zèèlubabèlà, dyàmba ne: Kì nku bukolè, kì nku dikàndà to, kàdi nku nyumà wanyì, mudi MUKALENGE wa bilwilu wàmba. (Yèyè neàlujulule Yelusàlemà.)*

<sup>144</sup> Mpindyewu, citèèkedi cyà mwèndù ncinyi? Nciimanyinyi cyà mwèndù. Kàdi mònaayi mudìbì bilenga’s wè. Mwab’ewu, pààkakudimukàye, wàkamòna Ewu uvwa mufwànàngàne ne Mwànà wa muntu mwab’ewu mwimane munkacì mwà biimanyinyi byà myèndù mwandamutekète byà ngòlò, bìdì byumvwija bikondo mwandamutekète byà èkèleeziyà

bicilwalwà. Ne lubungu lwônsò, anyi—anyi ciimanyinyi cyà mwëndù, civwa citwa mu lupànzà lunène lwà maanyi alu. Nènku mu maanyi awu's ke mùvwà mubanda too ne ku kaamwëndù kakesè kàà mwenekelu wa pabwàkù kàvwà kashikika ne mukàbà munda amu ne mukàbà awu ùvwa mulembeleja mu maanyi amu. Nènku mu ntàntà yônsò . . . Bàvwa bapongolwela maanyi lwà ku lusongo lwà ciimanyinyi aci, avwa ùja lushibàshibà lunène lwà munkaci alu, ne dyàpa dinène adi, nènku avwa apongoloka too ne mu nshibàshibà, mùshindù ewu. Nènku mwëndù ùdi ne mukàbà mulembejamù awu, lubungu elu—elu munda mwà . . . utungunuka ne kuteema kapyà muunya ne bufùku. Kabìvwakù bikukèngela kuwùteemesha nànsha, kawenàku ùjima nànsha; bàdi batungunuka ne kupongolwela maanyi mu lubungu lunène alu. Nènku biimanyinyi byà myëndù bìdi bipatukila pambelu mùshindù ewu abi, bivwa ne myëndù mitèekela lwà ku lusongo kwàbi aku's. Mukàbà wà mu mwëndù ùdi upweka mùshindù ewu, upatwila mwoyi wàwù eku. Kaa, mùshindù mwine udibi bishìilàngàne ne kàndeyi's. Mùshindù mwine ùdibi bishìilàngàne's! Ncimanyinyi cyà mwëndù, ne cidì munkaci mwà kukoka maanyi.

<sup>145</sup> Mpindyewu, biimanyinyi byà myëndù ebi, kapyà kàvwà pa biimanyinyi byà myëndù ebi mu Dipungila Dikulukulu. Pàvwàbo bateemesha mwëndù umwèpelè, kàbàvwa mwà kuteemesha mwëndù ùvwa ulonda ne kapyà kavwàbo naaku mu cyanza to. Bàvwa bateemesha mwëndù umwèpelè, pashìishe bawàngata bwà kuteemesha naawù mwëndù mukwàbo, pashìishe bawàluja panshi. Nènku bateemesha ewu mwëndù, ne pashìishe bawàngata bwà kuteemesha ewu mwëndù ne kapyà kàmwèkàmwè kavwàbo babangile naaku ku ntwadijilu aku. Kaa, ndi ntekemena ne kacýèna cinupita mutù to. “Yesù Kilistò umwèumwè awu makèlèlè, leelù, too ne kashidi,” kapyà kàmwèkàmwè aku (Nyumà Mwímpè) kateemesha yônsò wa ku maèkèleeziyà awu munda mwà bikondo.

<sup>146</sup> Yesù kàakambaku mu Yone Munsantu 15 ne: “Mémè ndi mwonji wa mvinyo, nwènu nudi matamba anyi?” Mpindyewu, Yèyè ke Mwonji wa mvinyo munène, twètù tudi matamba. Mpindyewu, mwonji wa mvinyo kaùtu ukwama mamuma to . . .

<sup>147</sup> [Katùpà kàà mukàbà wà mèyi munda mutupu—Muf.] . . . udi mwà kwangata mucì wà madimà, mwenze bu mucì wa orange, ne udi mwà kwapulaku—kwapulaku di—ditàmbà, èè, ndi mufwànyine kwamba ne, mucì wa mbòmà, kàdi kwondola kaaba kakesè mu mucì wa orange nènku kusomekamu mucì wà mbòmà awu, newùkole. Udi uye lwà eku wangata ditambà dyà mucì wà didimà dyà mpusu bwà kudìsomeka mu mucì wà orange, nedìkole, anyi wangata mucì wà grenade, nènku uwàngata, anyi, cimuma cyà didimà kanà dyônsò eci, anyi mandeleenyi à màtwile mbidi anyi mandeleenyi manène, cyônsò cyà ku bimuma byà madimà abi, kàdi kubisomeka mu mucì

ewu, nènku nebiikadile ne mwoyi ku mwoyi wà mucì wà orange awu; kàdi kabyàkukwama bimuma byà orange nànsha. Nebikwame bimuma byà mbòmà, nebiikwame mandèleenyi à manène, nebiikwame bimuma byà mpusu, kàdi bìdi bitancila ku mwoyi wà mucì wà mvinyo mulelèlè, kàdi mwonji wà mvinyo awu wòwò mwà kupatula mwonji mukwabo wà mvinyo... ditàmbà dikwabo, nebiikale ne mwoyi ùmwèùm wè ùdi munda mwàwù awu, nebiikwame cimuma cyà orange. Bwalu, kwònsò kwònsò eku, mu muji wàwù amu mmuci wà orange, kàdi mikwàbò yìdi mwà kupetela mwoyi ku wòwò awu padìbi ànu ne nngiikadilu wa didimà. Kàdi kabyèna mwà kukwàma mamuma à ku mucì wà bangabanga awu to, bwalu kayèna yà ku cibangidilu to.

148 Mùshindù awu ke ùdi èkèleeziyà. Mbondole mwonji wa Mvinyo ne basomekemù ba-Presbytériens, ba-Méthodistes, ba-Baptistes, ne bikwàbò byà mùshindù awu. Wùdi wùkwama mamuma à ba-Baptistes, mamuma à ba-Presbytériens, mamuma à ba-Méthodistes, kàdi bu wòwò mwà... mucì awu wòwò ànu mudidinge mupatule mwonji mukwàbò wa mvinyò, newikale mwonji wà mvinyò wà mùshindù ùmwèùm wè wàkaputula Wu mu Ditùkù dyà Mpenta: Mwonji wà mvinyò wà ku cibangidilu awu! Newàkule mu myakulu ne newikale ne bukolè ne bimanyinu byà Kilistò mubiishìibwe ku bafwè mu wòwò. Bwà cinyi? Bwalu ùdi unwina ku mushimì wà ku cibangidilu mùdìwu mukunyiibwe. Mu bulelèlè, kí nne mukùnamù to, kàdi mmulediibwemù! Mukalenge àtumble's wè! Kaa, ekèlekèlè! Ncìwwa mukweleku meeji to piine apu.

149 Nwamònu's, bakwabo aba mbasomekamù; badi babàsomeka mu mucì, pa nànu bàdi bakwama mamuma à mùshindù wàbò bòbò biine. Kabèna mwà kwangata *Eci* to. Kabèna biitabuuja *Aci* to, bwalu kacya kabàtukù bamanyePù kantu nànsha kàmwè to. Kàdi bòbò balediibwe mu Mwoyi ùmwèùm wè wàkapàtuka mu mucì awu, kí cintu cimwèpelè ncyòcì aci cidìbo mwà kukwàma, m'Mwoyi wà ku muji awu's.

150 Ntakù myèndù yònsò eyi yìdi yikumbana mu nzàbà umwèpelè munène bikolè awu, cikwacidi cinène menemene cimwèpelè, ne citèema bishiilàngàne... anyi byambudi byà myèndù mwandamutekète bishiilàngàne bipatukilamù. Nènku pàdìbi bipatukamù apu, bònsò bwà ku makènkè awu bùwwa búsunyina mu mushimì munène wà mwoyi wàwù. Nènku bukènkè bwàwù bùdi nànu bwalu kandeyi kààbù nkatukija mu cipanza cinène aci. Kaa, cimfwànyì cilenga kaayi cyà ùmwè wà ku mìtootò mwandamutekète ayi (cìwwa cileeja cyòcì aci's) ne mwoyi wèndè mwikale ulakuka kapyà ne Nyumà Mwímpè mwab'ewu. Nènku cidi... Ku diitabuuja ùdi ulakuka ne kapyà kàà Nyumà Mwímpè, ne mwoyi wèndè nkandeyi, anyi kí nkandeyi nànsha, kàdi mmukàbà ùdi mubweja mu Nyumà Mwímpè (mu Kilistò), ne ku mukàbà awu aku ùdi ukòka

Mwoyi wà Nzambi bwà kupeesha èkèleeziyà wendè Bukênkè. Kaa, cimfwanyi kaayipu's cyà mwena kwitabuuja mulelèlà's wè! M'Bukênkè bwà mùshindù kaayi bùdiye ufila's wè? Bukênkè bwà mùshindù ùmwèùm wè buvwaku pàwwa kandeyi kàà kumpàla kateema apu.

<sup>151</sup> Pààkabangà cikondo cyà kumpàla cyà èkèleeziyà, cìwva ng'Efèsò. Pòlò, mwanjèlò wa èkèleeziyà awu, ùmwè wà ku mitootò. Kùdi mitootò mwandamutekète yidi yùmvwija banjèlò mwandamutekète, “misànjeelà mwandamutekète.” Lumingu elu ndi mwà kwangata Mufundu ne maalu-malonda ne kunujaadikila ne cintu ne cintu cyà ku byòbì ncilelèlà mu mwanjèlò yònsò, ne mwanjèlò yònsò ùwva ne Bukênkè bùm wè bùm wè abu. Ncyà bushùwà. Ne pashùshe ànu pankacì pàà bikondo ebi, Kampànda munène udi ne cyà kulwa awu.

<sup>152</sup> Mònaayi, mpindyewu bàdi bakòkela ku cipanza cinène cyà Maanyi eci, Bukênkè. . . mwoyi mmutùkija munda mwà Kilistò. Udi mufwè, ne mwoyi wèbè mmusokoka mu Kilistò kupicila ku. . . anyi musokoka mu Nzambi kupicila ku Kilistò, ne mutwibwe citampi kùdi Nyumà Mwímpè. Kakwenaku mùshindù nànsha mukèsè wà kukuuumushaku to. Mmunyi mùdi mwà kucyenza? Kakwèna muntu nànsha umwe udi mwà kukwenzela bibi to. Ditengu dyà mwoyi wèbè didi dilakuka kapyà ne Nyumà Mwímpè; kaa, dilakuka kapyà, difila Bukênkè. Ditengu dikwàbò dyà mwoyi wèbè ndizabika penyì? Munda mwà Kilistò. Udi mufwè ne musokoka mu Kilistò, Nyumà Mwímpè, mwikale ùjika mwaba awu bwà ne. . . dyabùlu kèna mwà kukulengaku to. Amen! Yèyè ùdi mwà kwela nshiba ne kwenza mutooyi. Nànsha lufù lwine kalwèna mwà kukulengaku to: “Wèwè lufù, nàlonda kèèbè kàdi penyì? Bucimunyi wèbè bùdi penyì's? Twasàkidila kùdi Nzambi udi utùpa bucimunyi mu Mukalenge wetù Yesù Kilistò.”

<sup>153</sup> Ndekeelu wa mvensa ewu, tumubalaayi:

*Nènku mumane kukùdimuka, mèmè kumòna bitèèkedi byà myèndù byà ngòlò mwandamutekète;*

*Ne munkacì mwà bitèèkedi byà myèndù byà ngòlò mwandamutekète bu. . . Mwànà wa muntu, . . .*

<sup>154</sup> Èkèlekèlè! Nuvwaku bamòne anyi? Mitootò, bitèèkedi byà myèndù, myèndù. Cidi cyumvwija cinyi? Eci cidi cyumvwija cinyi? Bwà ne cipungu citùdimu ne mwoyi eci ncikondo cyà bufùku, tundeiyi ne makènkè ne mitootò bìdi byumvwija ne mbufùku. Kàdi mùtootò wùtu wènza cinyi? Wùtu wùleeja bukênkè bwà dībà too ne pàdi dībà dipingana. Dìna dyà Mukalenge dibèneshiibwè's wè! Nènku mwambi mulelèlà wa Nzambi kàtu uleeja bukênkè bwà torche, kacì kàà alameetà kampànda, anyi cizubu kampànda cyòsheka to; ùdi ùleeja nsèsà yà ngòlò yà Kilistò kùdi Èkèleeziyà, ne “Yèyè ùdi umwèùm wè awu, ne Udi ne mwoyi, ne Yèyè ùdi ùnkenkeshila.” Amen! Ki

Bukênkè bùdiye ùleeja abu. Mùtootò wùdi wùleeja bukênkè bwà díbà, nwamònu's, pa nàнку tudi tuleeja Bukênkè bwà Mwànà wa Nzambì. Wènza cintu cimwècimwè cyàkenzaYe aci, ùfila Bukênkè. Bukênkè bwà mùshindù kaayi? Bukênkè bwà Èvànjeeliyò kùdi bòbò abu.

155 Mpindyewu twánjàayi kuMujooja kàbidì ndambù, patùdi twangata mvensa wa 13 ewu apa:

*Nénku munkaci (amu's ki munkacinkaci) mwà bitèekedi byà myéndù byà ngòlò bu...Mwànà wa muntu, muvwale muzàbì mutwè too ne ku makàsà, ne musenyena lwà pa cyàdì ne mukàbà wà ngòlò.*

156 Mpindyewu s'ki cingà cijaadiki eci cyà ne dilongesha edi ndilelèlè dyà ne civwa mmu ditùkù dyà Mukalenge. Nukaavwaku baMumòne anyi? Kàvwa mwakwidi mu ciine cikondo aci to, anyi Kàvwa mfùmù to, Ùvwa nzuji. Mònaayi, mwakwidi, mwakwidi munène, pàvwaye ùbwela mu mwaba wa cijila anyi ùbwela bwà kwenza mudimu, ku mudimu, ùvwa ùdiswikila lwà mu cimònu. Muswikile mukàbà wèndè awu lwà mu cimònu, byumvwija ne ùvwa munkaci mwà kukwata mudimu; kàvwa muwùswikile lwà pa makaaya nànsha. Kàdi s'ki Yèyè udi ùpatuka ewu, wenda upatuka ne mukàbà muswikila lwà kuulu eku, mwikale ne cibwikilu cyà pa makaaya Èndè apu; cisenyena lwà pa cyàdì, pa mabèèle, ne mukàbà wà ngòlò, cisenyena lwà kuulu eku. Ncinyi aci's? Ndumbùlùlà, nzuji. Nzuji ne cibwikilu cyèndè cyà pa makaaya, cisenyena lwà kuulu eku, kaciyi lwà kwinshi bu mwakwidi nànsha. Nwamònu's, aci's cidi cilleeja ne Yèyè kacivwa mu bwakwidi Bwèndè mpindyewu to, Yone wàkaya too ne mu ditùkù dyà Mukalenge ne kuMumòna ùlwa bu nzuji.

157 Nudi nwitabuuja ne Yèyè n'nzuji anyi? Tubalààyaaku Yone Munsantu 5:22, ne lukasa lwònsò, netùmonè ne Yèyè mmulumbulwishi anyi kí mmulumbulwishi. Yone Munsantu 5:22:

*Bwalu Taatù kèna ùlumbulwisha muntu nànsha umwe to, kàdi wàkafila dilumbulwisha dyònsò kùdi Mwànà:*

158 Ncya bushùwà anyi? Yèyè's ki nzuji, Nzuji wa Kumutù kwà bònsò. Ne Yone ùdi ùleeja ne Yèyè kavwa mu ditùkù dyà cipròfetà Cyèndè to, bu mupròfetà, anyi Yèyè kàvwakù mubwele mu matùkù à bumfùmù Bwèndè abu to, kàdi Yèyè ùvwa mu ditùkù dyà Mukalenge bu Mulumbulwishi. Mpindyewu, mbanganyi bàdi bamanye ne mwakwidi yèyè ne mukàbà, ne mwonji mulembeleja mu cimònu cyèndè bìdi byumvwija ne ùvwa ku mudimu? Muntu kanà yònsò udi ubala Mpungila ayi, udi mumanye Dipungila Dikulùkùlù, mmumanye aci. Pàdi mwakwidi musenyene mukàbà lwà apa, ùdi ku mudimu, mmusadidi. Kàdi Yèyè ùvwa musenyene lwà kuulu eku, nzuji.

159 Tutungunukàayi ndambù ne kubala:

. . . mukàbà wà ngólò . . . ùvwa . . . lwà pa cyàdì . . .

<sup>160</sup> Ncyà bushùwà, lwà kuulu eku, Ùvwa Nzuji.

Mpindyewu netùbalè mîshindù mwandamutekète yà butùmbi bwà Mupersona Wèndè. Kaa, ekèlekèle! Eci's cidi cingelesha mbilà kumpàlà kwà mèmè kufikakù. [Katùpà kàà mukàbà wà mèyi munda mutupu—Muf.] Mònaayi! Kaa, eci's ncintu cilenga cyà dikema. Tèèlejàayi ànu cyanààna:

*Ne mutu Wèndè . . .*

<sup>161</sup> Mpindyewu tàngilàayi, Ùdi ne bintu mwandamutekète, bìdiye utèèla mwab'ewu: Mutù Wèndè, nsuki Yèndè, mèsù Èndè, makàsà Èndè, Díyi Dyèndè, bintu mwandamutekète bìdiYe ùtèèla mwab'ewu ebi, mîshindù mwandamutekète yà butùmbi bwà Yesù Kilstò. Ngánjibi kuCìbala:

*Mutù wèndè ne nsuki yèndè bìvwa bitòòke bu myòsà yà mùkòòkò, mitòòke bu nêjè; . . . mèsù èndè àvwa . . . ndimi yà kapyà;*

*. . . makàsà èndè bu mùdì . . . cyamu cyà kabanda cyà cìfinunuke, bu ne avwa mwoshìlbwè mu cìkùtù cyà kapyà; ne òyi dyèndè . . . bu òyi dyà màyi àbùngì.*

*Nènku mu . . . Nènku ùvwa ne mìtootò mwandamutekète mu cyanza cyèndè cyà dyàbalùme: ne mukana mwèndè muvwa mupatuka mwelè wà mvità mutwisha ngwengwengwe nseke yìbìdì, ne kwìsù kwèndè kùvwa bu mùtu dìbà dikenka mu bukòlè bwàdì amu.*

<sup>162</sup> Cìkèèna—kumòna kaayipu's wè! Cìvwaye mumòne mwab'ewu ncinyi? Mwàna wa Nzambì mutùmbishìlbwè, ne cimfwanyi. Mpindyewu, twikalàayi—twikalàayi ànu badìlongolole mpindyewu.

<sup>163</sup> Kaa, ekèlekèle, mvwa ngeela meeji ne tukààvwa dìbà citèemà's, kàdì's tucìdì ànu dìbà mwandamukùlù's. Ncyèna nànsha mwànji kubanga to. Èyo. Mbìmpè's. Mpindyewu, ndi nguuvwa bibì be bwà mùdì bânà bèètù aba kacya biimana kuulu's, bìdì bìm̀b̀indulula bwà kubamòna biimane, nudi mumòna's, bwalu ndi mumanye ne mikòlò yàbo's yìdì munkaci mwà kusaama. Bu ne mvwaku ànu ne mîshindù mukwabo bânà bèètù wanyi, wà cintu kanà cyònsò cìndì mufwanyine kwenza, nùnkù's ndi mucyenze bushùwà. Mpindyewu, ndi muswè bwà eci cìnùfike menemene's. Nènku nwimaneku ndambù mukesè wa dìbà ne Nzambì ànufuteku bibanjike, ki disambila dyànyi adi.

<sup>164</sup> Mpindyewu—mpindyewu mònaayi, cintu cyà kumpàla aci, mpindyewu tudì tumòna ne, mutu Wèndè ne nsuki Yèndè bìvwa bitòòke bu myòsà yà mùkòòkò. Mutù Wèndè ne nsuki Yèndè bìvwa bitòòke bu myòsà yà mùkòòkò. Mpindyewu, aci kí mbwena kwamba ne mbwalu Yèyè ùvwa muntu mukùlákàji, kí cyàkenzà nànkù to. Aci kí ncivwa cyenzeje ne bìikale



nàнку to. Kavwa mutambe kukùlakaja bwà kwenza nàнку to. Yèyè úvwa . . . Cívwa mbwà dilabula ne dikumbana Dyèndè ne lungenyi Lwèndè. Bwalu Yèyè ngwa Cyendèèlèlè, ne wa Cyendèlèèlè kèna mwà kwikala ne cikondo to. Nudi bumvwe anyi?

<sup>165</sup> Twǎnjǎâyibi kukudimuka, nènku nètwi—nèt wikale mwà kuMumòna mwab'ewu mu nùнку, nènku netùjandule cidiYè wikalangana. Mpindyewu, tubuululàayi mu Danyèlè 7.9, bwà katanci kakesè cyanààna, nudi numòna cimfwanyi cimwècimwè aci mu Danyèlè mùdiYè ulwa bu . . . mwab'ewu kùdi Mukulumpe wa bikondo. Ne pàmwè ne bantu bònsò, bamanyi bàà mabala bàà Bible, mbamanye menemene mwaba wutùdi tuya batàngile bwà mpindyewu mene. Danyèlè 7, ku mvensa wa 9; nèmbangilè ku wa 8:

Nènku *mémè kutàngila lusèngù alu, ne, mònaayi ne, kwàkapátuka . . . kaalusèngù kakwàbò kakesè, kumpàla—kumpàla kwàkù kùvwa nsèngu yìsatu yà kumpàla yàkajoomonyiibwa; nènku, mònaayi, mu lusèngu elu amu muvwa mèsù bu . . . à muntu, ne mukana mwikale mwakula maalu manène.*

Ki *mémè kutàngila* too ne *mwàkaadijiiibwa nkwasà yà butùmbi panshi, . . .*

<sup>166</sup> Mpindyewu tèèlejǎayi. Tèèlejǎayi ne ntema, mpindyewu. Nudiku mwà kungumvwa lwà paanyimà pààpa anyi? Ambaayi ne “Amen,” panwikala mwà kungumvwa. Mémè kwebeja mukàjàànyì paanyimà pààpa. Ngeela meeji ne cikolokolo eci cidi . . . cidi cyumvwika bikolè apa, kî mmwòmò anyi? Mpindyewu, ndi ngeela lubila lukolè be, ngeela meeji, ku eci nùнку's.

<sup>167</sup> Èyo, mpindyewu Danyèlè 7.9:

Ki *mémè kutàngila* too ne *mwàkaadijiiibwa nkwasà yà butùmbi panshi, ne Mukulumpile matùkù kushikamaye, mwena bilàmbà bìvwà bitòòke bu nêjè abi, ne nsuki yà mutù wèndè yìvwa bu . . . myòsà mikezùke: (Mukulumpile matùkù.) nkwasà wèndè wa butùmbi úvwa bu ludimi lwà kapyà lukolè, ne nkatà yèndè yìvwa yìlakuka kapyà.*

Ne misùlù yà kapyà—yà kapyà yìvwa yìpweka ne yìpatukila kumpàla kwèndè: ne binunu ne binunu bìvwà bìmukwàcila mudimu, ne dikumi . . . misangu binunu dikumi bìimane kumpàla kwèndè: ne cilumbuvidi kutwadijaci, ne mikàndà kukangudiibwayi.

<sup>168</sup> “Nsuki mitòòke!” Bònsò . . . muntu yònsò ewu mmumanye ne ki banzujì bàà kale mu matùkù à kale. Ànu muvwa banzujì bàà cyena Anglais ne ciibidilu cyà kuvwala kafulu kàà nsuki katòòke. Mbanganyi bàdi bavùluke aci? Banzujì bàà kale bavwa bàvwàla kafulu kàà nsuki katòòke bwalu bàvwa . . .

Kàdi's ki Yéyè ewu, ùleeja cyàkàbidì ne Yone ùkaadi mu ditùkù dyà Mukalenge, yéyè kuMumòna bu nzuji. Amen! Kàyì bu mwakwidi to, kàyì bu mfùmù to, kàyì bu mupròfetà to, kàdi bu nzuji. Taatù (N'Yone Munsantu 5:22) mmufile dilumbulwisha dyònsò kùdiYè. Nènku Yéyè ngudi nzuji mpindyewu, mmulwe bwà kulumbulwisha matùnga. Kaa mutùdì tujungà ditùku ditwàMumòne mùshindù awu's we! Nsuki Yèndè yìvwa mitòòke bu nêjè, Danyèlè wàkaMumòna ulwa kùdi Mukulumpile matùkù. Mutàngilaayi mùdiYè utuutakaja bibìdi ebi pàmwè's. Eyo:

*...ne cilumbulwidi kubangaci, ne mikàndà kubuuludiibwayi.*

*Ki mèmè kutàngila dībà adi bwa...Ki mèmè kutàngila dībà adi bwà dīyì dyà myaku minène—minène yìvwa lusèngù... (To, mèmè ndi mu mwaba ùdi kawùyi wòwò to, kī mmwòmò anyi?)*

169 Danyèlè 7:9, èyowà, ki twètù bāfikipù aba:

*...ne nkàta yèndè...*

*Ne musùlù wà kapyà upwekelamù ne ùpatukila... mu...yéyè: ki makumi à binunu kulwawù bwà kumukwàcila mudimu,...*

*Ki mèmè kutàngila dībà adi bwà dīyì dyà myaku minène yìvwa lusèngù alu lwàkula: ki mèmè kutàngila mene too ne mwàkashipiibwa nyama wa lwonji awu, ne mwàkabutudiibwa mubidi wèndè, ne kufidiibwawù mu—mu ndimì yà kapyà. (Uhm!)*

*Nènku bwà cìdì citàngila nyama mikwabo ayi, yôyi yònsò bàakayinyenga bukòòkeshi bwàyi, (aci's ki makolè ònsò ne makalenge à Bisàmbà byà bendè ìkala mwà kubùtudiibwa) kàdi myoyi yàbò yàkaleepeshiibwa bwà cipoolù kampànda cyà cikondo.*

*Ki mèmè kumòna mu cikèènà-kumòna cyà bufuku, nènku, mònaayi, muntu mufwanangane ne Mwànà wa muntu ùlwa mu...mavuba à mu dyulu,... (Tudi baMumòne ulwa munyi mu dindà emu, mu mvensa mwi3? Ùlwa mu mavuba à dyulu, Mwànà wa muntu.) ...muntu mufwànàngàne ne Mwànà wa muntu ùlwa mu mavuba à dyulu, ne yéyè wàkahwa kùdì Mukulumpile matùkù awu, ki kumuseemejabo pabwìpì kumpàla kwèndè.*

*Nènku kwàkafidiibwa bukòòkeshi kampànda, ne butumbi, ne bukalenge, ne bantu bònsò, matùnga,... myakulu, byàkakèngela bwà kumukwàcila mudimu: bukòòkeshi ebu mbukòòkeshi bwà kashidi, bwikala kabùyi mwà kupita to, ne bukalenge bwèndè nebwikale... bukalenge bwèndè bwikala kabùyi mwà kubutudiibwa.*

170 KulwaYe kùdì Mukulumpile matùkù uvwa ne nsuki mitòòke bu myòsà yà mùkòòkò awu. Ki Yone kukudimuka e kumònaye muntu mufwànàngàne ne Mwànà wa muntu mwimane munkacì mwà bitèèkedi byà myèndù byà ngòlò mwandamutekète, mwikale ne nsuki mitòòke bu nêjè, Nzuji awu's! Kàyì musenyene lwà mu cimònu nànsha, kàdì musenyine lwà pa cyâdì, lwà kuulu eku, nzuji's wè! Mwikale ne cibwikilu cyà makaaya cyà nzuji pa makaaya Èndè apu, kwimanaYe ne mukàbà wà ngòlò, mukezuke, wa cijila, mukezula, ùvwa mukwate bwakane Bwèndè. Cibwikilu Cyèndè! Ùvwa mubwikila too ne ku makàsà. Tàngilàayi mishindù mwandamutekète yà dimweneshiibwa dyà buumùntù Bwèndè ne butùmbi.

171 Mpindyewu, ngeela meeji ne, mvensa wa 14:

*Yèndè nsuki. . . Mutù wèndè ne nsuki yèndè bìvwa bitòòke bu myòsà yà mùkòòkò, mitòòke bu nêjè; ne mèsù èndè àvwa. . . bu ndimi yà kapyà;*

172 Mutù, nsuki; “mèsù àvwa bu ndimi yà kapyà.” Anji elàayi meeji's! Mèsù àvwa musangu kampànda mavwijibwe bitaayitaayi ne binsonji byà buntu, mpindyewu mmashàale ndimi yà kapyà. Mu cijji n'Yèyè awu mwimane mwaba awu bu nzuji ne cijji. Bwà cinyi udi muMubenge? Kaa, ngènzàmpèkàatù wa yààyà, anji elabi meeji bwà bwalu ebu! Anji elabi meeji pa bwalu abu, wèwè cidimba cyà èkèleeziyà cyà civumvu! Anji elabi meeji pa bwalu abu, wèwè mwena Kàtòlikè, Baptiste, Presbytérien, mwena Mpenta! Anji elabi meeji pa bwalu abu, wèwè mwena Kàtòlikè! Byàkakèngela bwà virgo Màriyà webè awu kubandaye ku mpenta ne kwàkidilayè Nyumà Mwìmpè, ne kutetuka ne kwenza maalu bu muntu mukàjì mukwacike maala. Mamwèndè mene wa Kilistò byàkamukèngela bwà kupetaye aci kumpàla kwà yèyè kwanyishiibwa mu Dyulu. Mmunyì munwikalà nwènu bakàjì mwà kufikaku ne cintu kampànda cishàadile ku aci? Anji elàayi meeji pa bwalu abu, nwènu balùme, muntu ne muntu wa kunùdì!

173 Nsuki Yèndè, ne mèsù èndè àvwa musangu kampànda mavwija bitaayitaayi kùdì binsonji byà buntu, kàdì ndi muswè bwà nwènu kumòna cintu kampànda bwà mèsù awu. PacivwaYe pa buloba, àvwa mavwijibwe bitaayitaayi kùdì binsonji bu muntu, bwalu Yèyè wàkadila ku lukita lwà Lazàrò. Cyà bushùwà! Mùle tètètè ne dyumvwilangana dyà luse; luseke Lwèndè lwà buntu. Ùvwa muvwàle, Ùvwa Nzambì muvwàle buntu, bwà kuumusha mpèkàatù. Kàdì nànsha nànkù paanyimà pàà buntu abu, Ùvwa ne cintu kampànda paanyimà Pèndè apu cìvwa mwà kutàngila buludi mu mwoyi wa muntu ne kumanya byònsò bidì bimutàngila. Bwà cinyi? Kuvwa cintu kampànda paanyimà Pèndè apu, nànsha muvwaYe muvwale mubìdì wa cifwàkà.

174 Kàdì kabàvwa bamanye ne ùvwa nganyì to. “Wèwè kùyì

mwitabuuye to,” mwàkambaYe, “ne Mémè ki Yèyè awu, neufwe mu mpèkaatù yèbè.” Ncyà bushùwà. “Mémè nciyi ngenza byenzedi byà Taatù Wanyì to, dībà adi kanùNgiitàbùùjì to; kàdi Mémè ngenza byenzedi byà Taatù Wanyi, dībà adi itàbùùjaayi byenzedi panwikalà kanùyi mwà kungiiitabuuya Mémè.” Kaa, mùshindù mwine ùvwaYe ùteeta kubatwadila Mukenji, dibuulula’s wè! Mufwànyine kupwekesha mèsù mu mwoyi wa muntu, kumanya byònsò bìwà bimutàngila. Mùshindù ùndi ngeelapu meeji’s wè! Mèsù àvwa musangu kampànda matàngile too ne dyàmomwà dyà mikùnà awu, makùngamangana ne lutatu, ne mafwànyine kudila bu muntu, kàdi nànsha nàнку mafwànyine kwangata Nyumà wa Nzambi paanyimà pàà cikhèenà-kumòna cyà buntu aci mwaba awu ne kumòna bintu byònsò; bintu bivwaku, bintu byàkadiku—byàkadiku abi, ne bintu bivwa mwà kulwa abi. Kudyanjila kwamba ndekeelu kacya ku cibangidilu, mbwalu Nzambi uvwa paanyimà pàà mèsù à buntu awu. Lekelabi Nzambi abwele mu nsòmbelu webè ne akukòntònonebi, nènku Yèyè neàkuleeje maalu àcilwalwà. Bwalu kacyena kàbidì wèwè to, n’Nyumà Mwimpè munda mwà nsòmbelu webè amu utangidila mu mèsù à cifwàkà awu bwà kubakula bintu.

<sup>175</sup> Kaa, butùmbi kùdì Nzambi’s wè! “Mémè nèmpongololè Nyumà Wanyì pa musunya wònsò, ne bânà beenu balela balùme ne bakàjì nebàmbè bipròfetà, bansongàalùme bèenù nebàmòne bikèenà-kumòna, bakulakaji bèenù nebàloote bilòòta.” Àlèluuyàh! Misangu mikwàbò bìvwa bìkèngela bwà Yèyè kukulàadika tulu bwà Wàmòna mwà kutàngidila ku wèwè aku, kàdi’s Yèyè neàkuleeje bushùwà misangu yàbùngi. “Bansongàalùme bèenù nebàmòne bikèenà-kumòna, bakulakaji bèenù nebàloote bilòòta; pa basadidi Bàànyì balùme ne bakàjì Mémè nèmpongololè Nyumà Wanyì.” Kì ne: “Pa balami Bàànyì ne bampaasàtà to, kàdi pa Bàànyì...” “Pa ewu yònsò udi muswè, pa mubidi wònsò, Mémè nèmpongololèpu Nyumà Wanyì.” Nudi nudikonka ne mbwà cinyì ndi ncyàmba ne mbila mùshindù ewu, kàdi’s cilwalwa mu bikondo byà èkèleeziyà ebi.

<sup>176</sup> Kaa, s’ki Yèyè awu mwaba awu, mèsù awu. Kàdi, vùlukàayi ne, dīngà ditùkù, mèsù avwa mavwija bitaayitaayi ne binsonji awu, mèsù awu neimane ku cilumbulwidi. Mpindyewu mmenze bu ndimi yà kapyà yitwa eku yitwa eku pa buloba bujima, ne kawkèna cintu nànsha cimwè cidì cyenzeka cidìYe kàyì mumanye to. Kaa, ekèlekèle, mbikwata pa mikàbà yà mēyì. Abànda apwèka pa buloba atàngila munyungakeenu wònsò, ajingululà meeji ònsò, mamanye kantu ne kantu kaùdì munkaci mwà kwenza, mapàngadika à mu mwoyi, cyùdì ujinga kwenza aci. Yèyè mmucimanye cyònsò. Yèyè mmumanye ne udi muMunange. Yèyè mmumanye ne meeji èbè mmajalame, bwà kuMukwacila mudimu. Yèyè mmumanye byònsò pa bwalu abu. Nènku ciikaleku ncinyì pawimana ditùkù adi piikala mpèkaatù

yònsò mwediibwe patòòke kumpàla Kwèndè, ne Yèyè mwimane mwaba awu ku Cilumbulwidi cyà ku Nkwasa Mutòòke?

177 Nzambi, ungeepuleku ku mwaba awu! Ncyèna muswè kumòna aci to. Pàapatuka Nzambi mukwate ciiji awu ne midilu yìpenya mu mèsù Èndè, ne bwakane, kafulu katòòke kàà nsuki kumutù Kwèndè mùshindù awu, ne mèsù Èndè apenya ne kapyà àdi mamanye meeji ònsò à mu mwoyi wèbè, ne cyònsò cyúkaadiku mupàngàdike bwà kwenza aci. Nsokòkèku mu Lubwebwe lwà Bikondo lupanda bwànyì mèmè! Mukulumpe awu ùvwa ne ciibidilu cyà kwimba ne: “Pààkwata buloba bwònsò ebu kapyà, imana ku luseke lwànyì. Imana ku luseke lwànyì, ne ulekeleku cyàdi Cyèbè ciikale musàamu wànyì. Nsokòkèku mu Lubwebwe lwà Bikondo.” Nzambi, ncyèna muswe cilumbulwidi Cyèbè to. Mèmè ncyèna muswe bwà Cyèbè. . . Cìndi nkeba n'luse Lwèbè, Mukalenge. Mpèeshèku luse Lwèbè, kí ndilomba Dyèbè dyà bujaalame to. Mpèeshèku ànu luse Lwèbè cyanààna. Kì mmikenji Yèbè to, nànsha ùmwè. . . Mpèeshèku ànu luse cyanààna, Mukalenge, ki cyònsò cìndiku mwà kulòmba ncyòci aci. Ncyèna ne cyà kulwa naaci mu mabòkò àànyì to (Ncyèna mwìmpè to, ncyèna ne pa bwàsà to), ànu ku Nkùruse Webè cyanààna nkùndì kacya ngákùlàma. Mukalenge, ki cyònsò cìndi pàànyì mumanye ncyòci aci: Kampànda wàakalwa bwà kwangata kaaba kàànyì.

178 Tàngilàayi mmwenekelu mwandamutekète yà buumùntù Bwèndè mpindyewu yà mupersona Wèndè, nènku nenùmòne cyàkenza Ye.

*Mutù wèndè. . . ùvwa mutòòke ànu bu nêjè; bu myòsà yà mukòkò, ne nsuki mitòòke; ne mèsù èndè àvwa bu. . . (twànjìbi kumòna túng). . . Mutù wèndè. . . uvwa mutòòke bu mùdi. . . nêjè; ne mèsù èndè àvwa. . . ndimi yà kapyà;*

*Ne makàsà èndè àvwa bu. . . cyamù cyà kabanda pa cyòci, bu cyòsha mu cikùtù cyà kapyà;*

179 Tàngilàayi mpindyewu. Twafùmu ku dimona mùdiYe mubwikila, nudi bamanye's. Mpindyewu tàngilàayi. Mutù Wèndè, mèsù Èndè, mpindyewu ùdi ùpweka mutàngile ku makàsà Èndè aku bu cyamù cyà kabanda. Tàngilàayi dipangakana dyà cimfwanyi aci mwaba awu cyàkamòna Yone cyà Yesù aci, ne cyàkamòna Danyèlè cyà makalenge maalàbàle à buloba, mutù wà ngòlò ne bikwabo.

180 Tàngilàayi numòne cìvwa eci mwab'ewu, ciimàne mwab'awu, cyamù cyà kabanda. Cyamù cyà kabanda cidi cyàkula bwà cinyi? Cyamù cyà kabanda cidi cyàkula bwà cilumbulwidi, cilumbulwidi cyà Nzambi. Bidi bìleeja ne kiipacila Kèndè mu kaabujimà nkàà kulwa pa buloba apa bu Nzambi, bwà kuvwijibwa mubidi, ne Yèyè wàkatùfwila ne kwangata manyooka à Nzambi, cilumbulwidi cyà Nzambi,

ne mmupete Bukalenge bwikale bwà cyamù cyà kabanda, ne bukolakane, ne kabwena mwà kunyungishiibwaku to. Kakwena cintu citambe kupapa bu cyamù cyà kabanda nànsha, ne kacya kabàtuku banji kupeta cidi kàbìdì mwà kucitekesha nànsha.

<sup>181</sup> Cilumbulwidi! Cyamù cyà kabanda cidi cyàkula bwà cilumbulwidi cyà Nzambì cidi cyenzeke. Tàngilàayi nyoka wa cyamù cyà kabanda mu cipèèlà. Nyoka wa cyamù cyà kabanda awu ùvwa ùleeja cinyi? Nyoka ùvwa ùleeja mpèkaatù; kàdi, bu muvwaci cyamù cyà kabanda, mpèkaatù mumane kulumbulwisha.

<sup>182</sup> Mpindyewu, mònaayi kàbìdì mu matùkù à Eliyà, pàakabèngàbo Eliyà bu mupròfetà, kaanshinga kàà bwanda kakesè aku, cikondo cyà èkèleeziyà cyà kale. Dimwè dyà ku matùkù àdì panshi àà mèmè nèndwè bwà kunùleeja ne Izalèèlà ùvwa ne bikondo mwandamutekète byà èkèleeziyà, yèyè pèndè, ne bivwa cifwanyikijilu ànu menemene cyà ebi nùnkù. Ne mu cikondo cyàbò cyà èkèleeziyà, mu matùkù à Eliyà, kumubengabo nènku ke kulwaku bidimu bisàtu ne ngondo yisambòmbò yà kakùyikù mvùla nànsha wa kànà to. Ki mupròfetà wa kale awu kwambaye ne “maulu àvwa ne mmwenekelu wa cyamù cyà kabanda,” Cilumbulwidi cyà Nzambì pa matùnga bwà dibenga Nzambì ne ditèèleja Izabèlà.

<sup>183</sup> Cyamù cyà kabanda kàbìdì cidi cileeya cilumbulwidi cyà Nzambì ku cyoshelu kùvwa mulambu ùshipiibwa, cyoshelu cyà cyamù cyà mitàkù, ùshipiibwa. Nshindameenu menemene yìvwa yà cyamù cyà kabanda, cilumbulwidi. Wàkadyata cikaminu cyà ciiji cikolè cyà Nzambì ne kwambula cilumbulwidi cyètù pambidi Pèndè. Buululaayi mu Bwàkabuulwibwà 19.15, bwà katanci kakesè cyanààna, tumònaayibi cyàkenzaYe aci. Bwàkabuulwibwà 19.15, tubalàayibi katanci kakesè cyanààna bu mèmè mwà kucipeta. Èyo, tubangilàayi lwà ku . . . twànjiibi kumòna tũng, lwà ku mvensa wa 12:

*Mèsù èndè àvwa . . . bu ndimi yà kapyà, ne pa mutù wèndè pàvwa cifulu cyà butùmbi, bifulu byà butùmbi búngibi; ne ùvwa ne dìnà difùnda, divwà muntu nànsha umwe kàyi mumanye to, ànu . . . yèyè mwine.*

*Ne ùvwa muvwàle cinkùtu cizabika mu mashi, ne dìnà dyèndè divwà dibìikidiibwa ne Dìyì dyà Nzambì. (Mpindyewu, vùlukàayi ne, Dìnà Dyèndè kàvwa Dìyì dyà Nzambì to, Dìnà Dyèndè divwà dibìikidiibwa nànkù. Nwamònu anyi?) . . . dìnà dyèndè divwà dibìikidiibwa ne Dìyì dyà Nzambì.*

*Ne bilwilu . . . byà mu dyulu . . . bilwilu bivwà mu dyulu bivwa byenda bimulonda pa tubalù tutòoke, bivwale linà mufinùnye, mutòoke ne mukezùke.*

*Ne mukana mvèndè mùvwa mupatuka mwelè musakisha, bwà wàmòna mwà kutuuta nààwù ditùnga:*

*ne wàbàkòòkesha ne dikombo dyà cyamù cifiñke: ne yèyè neàdyate. . . (Ncinyi ciine aci?) . . . àdyate cikaminu cyà mvinyo wa lwonji wa ciji cicolè cyà Nzambi wa Bukolè bwònsò.*

<sup>184</sup> CyàkenzaYe ncinyi? Ciji cicolè cyà Nzambi cìvwa pambidi pèètù bwà mutùvwa bangènzàmpèkààtù. Ncyà bushùwà anyi? Muntu nànsha umwe kàvwa mwà kudìsùngila to. Kakwena cintu nànsha cimwè citùdi bafwanyine kwenza to, tudi bònsò “Balela mu mpèkaatù, bafwimba mu bubì, balwe pa buloba apa bìkale twakala mashimi.” Kàdi cyàkenzaYe ncinyi? Wàkalwa pa buloba, Àlèluuyàh, ne kudyata mu cikaminu cyà mvinyo! Ciji cicolè cyònsò cyà Nzambi wa Bukolè bwònsò cyàkapòngolodiibwa pambidi Pèndè. “Wèwè udi mukùmbanyine, Éyi Mwànà wa mùkòòkò wa Nzambi, bwalu Wàkashiipiibwa.” Kwangata mpèkaatù yà bàà pa buloba pambidi Pèndè, ne Yèyè wàkambula mpèkaatù wetù, mmùmwa ne Nzambi wàakapongolola lwonji lwà ciji Cyèndè cicolè aci pambidi Pèndè. “Ne Yèyè wàkatapiibwa mpùtà bwà dishipa dyètù dyà mikenji, muzaajìibwe bwà bubì bwètù, ne dinyooka bwà ditalala dyètù pambidi Pèndè, ne ku mibùndàbùndà Yèndè twàkondopiibwa.” Muntu nànsha umwe kààkafwaku bu Muntu awu to! Wàkakenga mu mùshindù wa ne mashi ne màyi byàkatàpuluka mu mubidi Wèndè. Ne mamata à mashi àpatuka mu mpàlà Wèndè kumpàla kwà lufù Lwèndè.

*. . . cikaminu cyà . . . ciji cicolè . . . lwà lwonji . . . lwà Nzambi wa Bukolè bwònsò.*

<sup>185</sup> Dìngà ditùkù makàsà à cyamù cyà kabanda awu (Butùmbi's wè!), pààlwaYe bu nzuji, Yèyè neàdyate mufwilakanyi ne Kilistò, ne beena lukuna Bèndè bònsò. Àlèluuyàh! Yèyè neèndelè pa buloba ne dikombo dyà cyamù mu cyanza Cyèndè. Amen! Kaa, nyingalala, wèwè mulunda wanyi ngènzàmpèkààtù, paucidi ne mpùnga wa kunyingalala apa. Udi uteetà, kuciladikija ne wèle meeji ne cidi ànu kaabwalu kakesè kiikala kakàyi mwà kwenzeka. Nebyenzeke! “Kabyàkungenzekelaku mèmè to.” Nebikwenzekele!

<sup>186</sup> Makàsà à cyamù cyà kabanda, udyatakaja beena lukuna Bèndè. Bwalu Yèyè wàkakenga ne wàkadyata mu cikaminu cyà lwonji lwà Nzambi bwà kufuta mpèkaatù yètù. Nènkù dîbà adi twètù, bapiishiibwe aba, bapèle, misàndà mikèngeledi mutùdi emu, tujuula kaadyùlù kèètù kakesè aka muulu ne tubala kaamukàndà kakesè kàà bavidì bàà Nzambi ne kuteeta kwela meeji ne “Nzambi katuku to,” kàdi kwamba ne “kakutu cintu nànsha cimwe cyà mùshindù ewu to, ne cilumbulwidi kacyèna mwà kulwa to.” Yèyè neàngate makàsà à cyamù cyà kabanda awu ne neàzaaze mwena lukuna Wèndè. Yèyè neàdyatè ku makàsà mufwilakanyi ne Kilistò. Neàngate èkèleeziyà mividi yà diitabuuja ne neàyikupe mu Cyèndèlèlèlè mwàmwa, mwaba kampànda mu kapyà kàdi kwòshà mwikalaye mwà kwòshika

ne kubutudiibwa. Ne Yèyè neàkòòkeshè pa buloba, Yèyè ne Èkèleeziyà Wendè kashidi. Butùmbi's wè!

<sup>187</sup> “Mutù, mutòòke bu myòsà yà mùkòòkò,” bwakane, dilabula, ne ngaakwilu wa kapelu, dikumbana, lungenyi. Bukulumpe, butòòke, bìdi byàkula bwà lungenyi, bukulumpe. Mmumanye cidiYe wenza. Yèyè's ke—Yèyè's ke Mpokolo wa lungenyi. Yèyè's ke Mpokolo wa dilabula. Yèyè's ke Mpokolo wa cintu cìmpè cyònsò, ki bwà cinyi Yèyè mmuleejìibwe mu eci nùнку bu Mwànà wa muntu, uvwa muvwale mwikale ne nsuki mitòòke milembèlele. Danyèlè wàkaMumòna kukaadi nkàmà yà bidimu, bidimu nkàmà mwandamutekète, ne kwambayè ne: “Yèyè ùvwa Mukulumpile matùkù. Ne muntu bu Mwànà wa muntu kulwa mu bukolè ne kudisanga ne Mukulumpile matùkù ewu, ke cilumbulwidi kubanga.”

<sup>188</sup> Mpindyewu ndi njinga ànu kunukonkaku cintu kampànda. Ndi nwwambila nwènù èkèleeziyà wa civumvu. Virgo dikumi yàkapatuka bwà kutwilangana ne Mukalenge, yitaanu yà ku yòyi yivwa yà lungenyi, yitaanu mikùtàkane; bu mutwàcyangaci mu dindà emu, mucì musomeka awu. Mpindyewu, vùlukàayi ne, pààkapatukayi bwà kutuutakeena ne Nzambi. . . Mpindyewu tàngilàayi, Bible mmwambe ne: “Mikàndà yàkabuuludiibwa.” Danyèlè 7:9: “Mikàndà yàkabuuludiibwa.” Ki mukàndà wa ngènzàmpèkààtù ngwòwò awu. “Ne mukàndà mukwàbò wàkabuuludiibwa.” Wàkalwa Nendè nganyi? Èkèleeziyà uvwa muya mu Dyambwibwa awu. Kaa! “Makumi à binunu kuvudija ku binunu kuvudija ku binunu ne binunu bààkalwa Nendè ne baMukwacila mudimu,” Mukàjèndè, Mukàjì-musèla. Kaa, butùmbi's wè! Mukàjèndè wàkalwa Nendè, Èkèleeziyà awu.

<sup>189</sup> Cilumbulwidi cyàkabanga, ne mikàndà yàkabuuludiibwa. Ne mukàndà mukwàbò wàkabuuludiibwa, ùvwa virgo mukùtàkane awu, ne muntu yònsò wàkàlumbulwishiiibwa bilondeshile mukàndà awu. Newikale mwenzejìibwe bwà kufila kabingila kàà cyùvwa kùyì mucyenzele, nènku dìbà adi newambe cinyi's? Udi mumanye cidi citambe bwìmpè mpindyewu, udi mumanye cidi citambe bwìmpè. Uvwa mufwànyine kwikala kùyì muCìmanyè kumpàla to, kàdi udi muCìmanyè mpindyewu's. Nwamònu anyi? Ambààyaaku tũng pìkàla mwakane ùsũngidiibwa ne lutatu, ngènzàmpèkààtù ne muntu mubì nebiikale penyi? Ewu udi ubenga awu, mmumanye cidi citàmbe bwìmpè kàdi pashìishe kuCìbenga. Nebiikale penyi? Makàsà Èndè bu cyamù cyà kabanda, cilumbulwidi cyà Nzambi.

<sup>190</sup> Mpindyewu, twànjì tumònebi, netwikale. . . too ne ku ndekeelu kwà dibeji mpindyewu:

. . . nsuki bu myòsà yà mùkòòkò, . . . ne mèsù èndè àvwa. . . ndimi yà kapyà;



*Ne makàsà èndè bu—makàsà bu...cyamù cyà kabanda,...mwôsha mu cikùtù cyà kapyà; ne dîyì dyèndè...bu dîyì dyà mâyì àbúngì.*

191 “Dîyì dyà mâyì àbúngì.” *Mâyì* àdi àleeja cinyi? Nwènu bàswè kucifunda, buulùlaayi mu Bwàkabuulwibwà 17.15, nènku nenüsangane ne Bible mmwambe ne: “Mâyì awámònu awu mmintùtá, ne misùmbà, ne bantu, ne myakulu.”

Èyo, *Dîyì*. Ncintu kayipu cyà cyenza bwôwà bwà musùukà munkaci mwà kupàmbuka pa mbû wa mwoyi, kàyì mwendeshi wa kumulombola, mupàmbùke, mupulumuna kùdì nkwa, bwà kuumvwa dikungula dyà bisàbàsabà, bibila! Ncintu kaayi cyà cyenza bwôwà cidì cifwanyine kwikala bwà musùukà munkaci mwà kupàmbuka’s! “Dîyì dyà mâyì àbúngì.” *Dîyì* Dyèndè ncinyi? Ncilumbulwidi, dîyì dyà bambi, ku Nyumà Mwímpè, didì dikobola kùdì bantu mu cikondo cyònsò, biimane mwab’awu, Dîyì dyà mâyì àbúngì dyàkakòbola, mintùtá ne misùmbà, dîyì dyà mìtootò mwandamutekète mu cyanza Cyèndè ayi, bwà cikondo cyònsò cyà èkèleeziyà, bàyiisha dibatiiza dyà Nyumà Mwímpè, dibatiiza mu Dìná dyà Yesù, dyakula dyà mu myakulu, bukòlè bwà Nzambì, dibìika dyà ku lufù dyà Kilistò, Dilwa Diibìdì, Cilumbulwidi cyà Nzambì. Dîyì dyà mâyì àbúngì dyàkapatuka kùdì ewu ùvwa mufwanangane ne Mwànà wa muntu, mâyì àbúngì.

192 Cìikalaci bwà kumanya ne udi musòmbe mu masangisha ne umvwa ne udi ne cyà kuditéeka mu bulongame ne Nzambì bwà upete Nyumà Mwímpè, ne musùukà munkaci mwà kupàmbuka bwà kuumvwa dîyì adi dyàkula patòòke mu disangisha mùdì musòmbe adi amu, ne muumvwe manyooka à Nzambì ayiishiibwa, kàdi kuCibenga. Cibila cinène cidì ànu pabwipi neebè apu, bisàbàsabà binène bìikala mwà kuya neebè ku kabùtù kèèbè kàà Cyendèlèlè.

193 Dîyì dyà mâyì àbúngì, buumùntù Bwèndè bwinàayi. Dîyì dyà mâyì àbúngì. Nenücyènzè bishi pàdidi dikwaciibwè mu Butùmbi, pàdì dîyì dilòòlò edi dikwaciibwè pa mukàbà wà mèyi? Dîyì dyèbè ndikwata pa mukàbà. Meeji èbè mmakwata pa mukàbà. “Ànu mudi muntu wèla meeji munda mwà mwoyi wèndè amu, ki mudiye.” Mònaayi, dîyì dyèbè didi ne mwadi mukolè mu Dyulu kutamba dyèbè...Ndi nswa kwamba ne, meeji èbè àdi ne àkula bikolè mu Dyulu kupita dîyì dyèbè pa buloba. Ncyà bushùwà, ke mùdibi’s. Nzambì mmumanye meeji ne mapàngadika à mu mwoyi, Yêyè mmumanye byònsò abi’s.

194 Wàkambila Bàfaalèsà ne: “Nwènu beena lubombo aba, mmunyi munùdì mwà kwakula bintu bímpè, pàdibi ne bìdì byule tètè mu mwoyi ke bìdì mukana mwàkula? Numbiikila ne: ‘Mulongeshi, mwímpè,’ kàdi ndi mumanye ne, ndi mwà kutangila ànu munda mwènu mene amu ne kumòna ne nudi beena lubombo. Kì ncinùdì nuswa kwamba to.”

195 Kaa, aci neciikale cinyi mu ditùkù adi pàakungula Dìyì dyà mâyi àbùngi adi, bikondo byàbùngi byà èkèleeziya munkaci mwà kudifwimba?

196 Mpindyewu ndi njinga kunukonkaku cintu kampànda cikwabo. Lekelaayi nnwàmbilèku cintu kampànda nwènù bàdi basùngidiibwe, anyishaayi nnwàmbilè bwalu ebu.

197 Mpindyewu, wêwè musùukà mupàmbuke, wêwè mupàmbuke mukwate ne byà luse udi munkaci mwà kupàmbuka mutangile ku cisàbàsabà cinène kwaka wàwa, wàdimuka's. Neciikale cintu cyà cyenza bwôwà paùdi mumanye ne kakwakwikala disùngidiibwa bwèbè dîbà adi to. Kwena mwà kusùngidiibwa dîbà adi to, udi mumanye ne kabùtù kèèbè kàdi ànu kumpàla kwèbè aku's. Pèbè mumanye ne mu tusuna tukesè cyanàànà neùmvwè Dìyì adi dyàkula ne: "Ngumukilaayi apa, nwènù beena mudimu bàà bubi, mu kapyà kàà kashidi kàdi kàlongolwela dyabùlu ne banjèlò bèndè aku." Neùmanye paùmvwà bibila binène abi bikungula ne mèyi à masangisha awu, pawikala munkaci mwà kupicila ku cintu aci. Kaa, ncintu kaayipu cyà cyenza bwôwà, ncilòòtálòòtà kaayipu's wè! Kanwitabiku bwà cinwenzekele to, nwènù cisàmbà. Nyingàlàlaayi, ditèèkaayi mu bulongame ne Nzambì mpindyewu, panùcidiku mwà kuditèèka mu bulongame apa.

198 Mpindyewu ndi njinga kunukonkaku cintu kampànda cikwabo. Ncinganyi cidiku citambe kusheema bwà muntu udi mwèle lwongo, bu kudyadija lwà mwinshi mwà mucì mubishi, bwà kuumvwa mùdi kasùlù kakesè kàsàba? Kaa! Ki Èkèleeziya awu musòmbèle mu myaba yà mu dyulu ne Dìyì dyà Nzambì munkaci mwà kusàba ne kalolo kònsò ne dyàkulangana naabo dîbà adi. Nudi numòna cidi bwalu anyi? Ndipiisha dyà ngènzàmpèkààtù, ne dibènesha dyà musùngidiibwe. Muntu udi mwèle lwongò lwà bwàtù bwèndè pa Lubwebwe Kilistò Yesù, ne musòmbè ànu cyanàànà ne ùtèèleja, mùshindù mwine ùdiye mwà kwikisha's wè! Kubwela mu diikisha adi's.

199 Mùshindù mene ùntù njinga kufika mwaba ùtù mâyi apweka's. Twètù bayè mu dilòba anyi nî ncinyi cyònsò, ntu ànu nteeta misangu yònsò bwà kupeta mwaba ùtù mâyi àsàba, bwalu bìdi ànu bikwikishisha. Nudi nucyumvwa ànu cyàkula bufùku bujima. Kaa, ekèlekèlè!

200 Kî mbilenga anyi paùdi bulelèlè mwà kwela lwongò lwà musùukà wèbè munda mwà Kilistò, mu mwaba bu nàнку too ne paùdi mwà kushààla mupùwe kumpàla Kwèndè? Nènku kutèèleja Dìyì Dyèndè dyàkula neebè ne: "Mémè ki Mukalenge udi ukwondopa. Mémè ki Mukalenge udi ukupa Mwoyi wa Cyendèlèlèlè. Ndi mukunange. Mvwa mukumanye kumpàla kwà difùka dyà dyulu ne buloba. Ndi mufunde dîna dyèbè mu Mukàndà, wêwè udi Wanyì. Kùciinyi to, m'Mémè. Kùumvu bwôwà to, Ndi neebè." Pashiishe ndi gimba ne:

Ndi mwèle lwongo lwà musùukà wànyì mu mwaba wa diikisha,  
Ncyàkwendela kàbìdì pa mbû yà lwonji to;  
Cipeepèlè cìkolè cìdì mwà kutuuta eku ne eku cyà lwonji, cyà cipùpu cìkolè;  
Kàdì mu Yesù ndi mu dikùbiibwa kashidi ne kashidi.

201 Vùlukààyi ne, Dìyì mene dìdì dyàkula neebè ne kalolo, nedìpiishe ngènzàmpèkààtù. Mvùla wa cipùpu mene wàkasungila Noà awu, wàkabùtula ngènzàmpèkààtù. Nudi buumvwe cìndì muswe kwamba aci anyi? “Dìyì dyà màyi àbùngì.”

202 Tàngilààyi mpindyewu ne: “Nsuki bu myòsà yà mùkòòkò, ne mèsù bu ndimi yà kapyà, makàsà bu cyamù cyà kabanda, ne Dìyì dyà màyi àbùngì.”

*Ne ùvwa ne mìtootò mwandamutekète mu cyanza cyèndè cyà dyàbalùme: . . .*

203 “Mìtootò mwandamutekète.” Mpindyewu twàngatààyi mvensa wa 20 mwaba ewu mene:

*Ne bwalu busokoka bwà mìtootò mwandamutekète yiwàmònu mu cyanza cyànyì cyà dyàbalùme ayi, ne bitèekedi byà myèndù byà ngòlò mwandamutekète. Mìtootò mwandamutekète ayi yidi banjèlò mwandamutekète (anyi mìsànjeelà mwandamutekète, bambi mwandamutekète) bàà èkèleeziyà mwandamutekète: ne bitèekedi byà myèndù mwandamutekète byùdì mumòne abi bìdì ng'èkèleeziyà mwandamutekète.*

204 Ùdì ùmuumvwijacì bwà kakwikadiku ntùpàkànyì nànsha mikesè to. Mwanjèlò bwà cikondo ne cikondo cyà èkèleeziyà. Kaa, aci's neciikalè cilenga be, lumingu elu, patwàlukilà mu maalù-malonda mwàmwa bwà twètù kwangata banjèlò abu ne kumòna mudimu mwine wa bwambi ùvwabo naawu awu. Bavwa ne mudimu wa bwambi ùmwèùmwe awu. Byà mwomùmwe ànu menemene munda mwà cikondo cijimà aci mu Èkèleeziyà mukesè awu.

205 Kukaadi cikondo kampànda, muntu mukwabo kwamba ne: “Udi mumanye's, èkèleeziyà wa Kàtòlikè, kùtu kasùmwinù kîmpè, kàa ne: ‘Ng'èkèleeziyà mulelèlè bwalu mmutwè makàsà panshi munda mwà bikondo byònsò.’”

206 Mèmè ne: “Aci kî mbwalu busokoka to, pavwayi ne bukalenge bwònsò ne bikwàbò byònsò abi paanyimà apu, nènku's kî mwàkatwayi makàsà panshi ne kutamba bipùpu bikolè. Kàdì bwalu busokoka kùndì mèmè mmùshindù ùvwa kasumbù kakesè, kancing aku mwà kutamba cipùpu cìkolè aci, bòbò bàvwa basaaya ne nsî, ne bakùpila nyama yà ntambwe, ne basunsulula, ne badya, ne bwosha, ne kùdì nyama yà

ntambwe...ne bashebeya ne bikwabo byònsò, ne mùshindù wàkapandukabokù.” Bidi bìleeja ne cyanza cyà Nzambi cívwa naabo. Kwajiki. Kàdi nànsha leelù ewu Bukênkè bwèndè bùcidi ànu buteema. Amen! Èyowà’s, mukalenge!

<sup>207</sup> Mpindyewu: “Mitootò mwandamutekète yìvwà mu cyanza Cyànyì cyà dyàbalùme ayi.” Ûvwa ne mitootò mwandamutekète mu cyanza Cyèndè cyà dyàbalùme, cidi cyumvwija bambi mwandamutekète bàà bikondo mwandamutekète. Kaa, abi’s—abi’s mbilenga be. Mùshindù utùdi twalukila bwà kwangata mwambi awu—awu wàkatwadila èkèleeziyà wa Efeso Mukenji awu’s. Nèngu mwambi wàkatwala Mukenji ne kuWàmbula too ne ku lufù, too ne ku èkèleeziyà wa Seemùnà mwàmwa, ne kùdi èkèleeziyà wa Peegàmo, wa Twatilà, ànu nàngu mu bikondo byònsò, nànsha ne mu cikondo eci patudi twakulangana apa. Bambi bààkalama ne kutwala Bukênkè abu, ne kuBùlama ànu muvwabu bwà ku muji ku cibangidilu amu, ne kutwalabo Bukênkè mu yèyè amu.

<sup>208</sup> “Ûvwa mubakwate mu cyanza Cyèndè cyà dyàbalùme.” Elàayibi meeji’s! Cyanza cyà dyàbalùme kî mbwena kwamba menemene bu ne Kilistò mmusòmbe ku cyanza cyà dyàbalùme cyà Nzambi nànsha. Kî mbwena kwamba ne Nzambi ùdi ne cyanza cyà dyàbalùme to, bwalu Nzambi n’Nyumà. Kàdi Kilistò nguvwa cyanza cyà dyàbalùme cyà bukolè. Muntu udi ku cyèbè cyanza cyà dyàbalùme, mmukwènù—mukwènù udi mwimane ku luseke lwèbè aku, udi mutambe kwikala pabwipi neebè awu’s.

<sup>209</sup> Nèngu, vùlukàayi ne, mitootò mwandamutekète ayi yìvwà mu cyanza Cyèndè cyà dyàbalùme. Anji elàayibi ànu meeji, bàvwa basunyina nzembu yàbò, Bukênkè bwàbò kùdiYe. Bavwa mu kaabujimà mu bukòntononyi Bwèndè, mu cyanza Cyèndè cyà dyàbalùme. Kaa! Musadidi yònsò mulelèlà wa Nzambi ewu ùdi mùshindù ùmwèùmwè awu. Mukwata mu...Nganyi udi mwà kubenzela bibi? Nganyi udi mwà kubenzela bibi? Bu mwàkeela umwe wa banjèlò lubila kale ku cibangidilu aku. Vùlukàayi ne *mwanjèlò* ùdi ùmvwija ne “mùsànjeelà.” Tudi tubwela mu maalu à ndondo awu pashùshe mu lumingu emu. *Mwanjèlò* mbwena kwamba ne “mùsànjeelà.” Ki yèyè ne: “Ncinyi cidi mwà kutùpandulula ne dinanga dyà Nzambi didi mu Kilistò? Ke disaamà anyi? Ke njiwù anyi? Ke butakà anyi? Ke mwelè wa mvità anyi? Ke lufù anyi? Ndi mutwishìbwe” mwàkamba Pòlò, “ne kakwena cintu nànsha cimwè cidi mwà kutùpandulula ne dinanga dyà Nzambi didi mu Kilistò to,” bwalu tudi badilambule mu kaabujimà ku cyanza Cyèndè cyà dyàbalùme.

<sup>210</sup> Muntu kampànda wamba ne: “Munsantu mubunguluki wa mu malaba! Munsantu mubunguluki wa mu malaba!” Aci kaciyena cimutàcisha to nànsha kakesè. “Wèwè’s udi mukoleshi wa maalu wa mu ntèndeleeleu!” Kabeena nànsha bacitèeeleja to. Mbadilambule mu kaabujima ne basunyina Mwoyi wàbò ku dibòkò Dyèndè dyàbalùme dyà bukolè, uleeja Bukênkè Bwèndè

mu kalolo, ne musàngèelu, ne bupolè, ne lutùulu; bimanyinu, ne maalu à kukema, ne bishima. Bàà pa buloba baCìbìikile ne “mmupongo,” cyònsò cìdìbo baswè aci, kabyena ne cìdìbi bishintulula to, bwalu tudi bamanye ne tudi badìlambule ne tudi mu cyanza Cyèndè cyà dyàbalùme. Abi kí mbilenga bilayà anyi? Ekèlekèle!

<sup>211</sup> Mpindyewu tulwìjakajààyaaku, bwalu katwena baswè kunùcyòkesha to. “Mu cyanza Cyèndè cyà dyàbalùme, mìtootò mwandamutekète.”

<sup>212</sup> Mpindyewu cimfwanyi cyà mwandamutekète ne cyà ndekeelu cyà mupersona Wèndè:

*. . . ne mukana mwèndè muvwa mupatuka mwelè wà mvità mutwisha nseke yìbìdì. . .*

Mvwa muswe kwamba ne, aci ki ciisambòmbò.

*. . . mukana mwèndè muvwa mupatuka mwelè wà mvità mutwisha nseke yìbìdì. . .*

<sup>213</sup> Mpindyewu, Dìyì dyà màyi àbùngì, ne mukana Mwèndè. . . Mu cyanza Cyèndè cyà dyàbalùme Ùvwa ne mìtootò.

*. . . ne mukana mwèndè muvwa mupatuka mwelè wà mvità mutwisha nseke yìbìdì. . .*

<sup>214</sup> Mpindyewu, nudi bamanye cìdì mwelè wà mvità musakisha nseke yìbìdì wa mu Bible awu anyi? Twànjì tucìbàkùlaayi ànu bwà nwènu kumanya. Twàngatàayi Ebèlu 4.2, alùkilaayibi ànu dìbeji dìmwe paanyimà anyi àbìdì nènku nenùcìpete, nwamònu's. Ebèlu ùdì úsanganyiibwa ànu paanyimà pàà Bwàkabuulwibwà apa; Yuda, ne pashìishe ng'Ebèlu's. Mpindyewu, cyumvwaayi bìmpè mpindyewu. Anyi. . . Ebèlu, nshapità mwi4 wa Ebèlu, ki cyòci eci. Eyo, Ebèlu nshapità mwi4 ku mvensa wa 12:

*Bwalu dìyì dyà Nzambì dìdì ne mwoyi ne nditamba bukolè, ne nditambà kusakisha kupita mwelè wà mvità kanà ónsò wà nseke yìbìdì ewu, dibwela mene too ne ku ditapulula dyà musùkà ne nyumà, ne manungu ne bwòngù bwà mifùba, ne dìdì dìjinguludi dyà meeji ne mapàngadika à mu mwoyi.*

<sup>215</sup> Nènku dìbà adi bàdì bàkubìikila ne “mubadi wa meeji.” N'Dìyì dyà Nzambì dimwènèshùbwe mu Èkèleezìyà Wèndè's wè! Ditamba kusakisha kupita mwelè kanà ónsò wà mvità wa nseke yìbìdì ewu. Amba túng, s'nyewù ngèdì meeji ku cintu cikwabo mwab'awu. Ncyèna mumanye ní ndi mufùnde Mufùnd-. . . Twàngatàayi Bwàkabuulwibwà 19, bwà katancì kakesè cyanààna. Twàngatàayi cyàkàbìdì eci, ngeela meeji ne ncyà bushùwà. Ndi pàmwàpa . . . Bwàkabuulwibwà 19, lwà ku 11 aku:

*Ki mèmè kumòna maułu munzùlùke, ne mònaayi kábalu katòoke; . . . (Ki katòoke kálwalwà aka*

cyàkàbìdì, cilumbulwidi.) . . . *ne ewu uvwa mushikàmepù uvwa ubùikidiibwa ne Wa lulamatu ne Mulelèlè, ne mu bwakane ke mùdiye. . . ulumbulwisha ne wenza mvità.* (S'nudi bamanye ne nganyi mwine awu, kî mmwômô anyi? Èyo.)

*Mèsù èndè àvwa . . . bu ndimi yà kapyà, . . . (Yèyè ùvwa nganyi?) . . . ne pa mutù wèndè pàvwa . . . bifulu byà butùmbi; . . . (Ah-kaa. Yèyè ùkaadi mumane kubwela mu bukalenge mpindyewu.) . . . ne yèyè ùvwa ne . . . ne—ne ùvwa ne dìnà difùnda, divwà muntu nànsha umwe kàyì mumanye to, pakuumusha . . . yèyè mwine.*

*Ne ùvwa muvwàle cinkùtù cizabika mu mashi, ne dìnà dyèndè didi dibùikidiibwa ne Dìyì dyà Nzambì.*

216 Cyàkapatuka mukana Mwèndè ncinyi? Cyàkapàtukà ncinyi? Mubàndi wa pa kabalu katòòke awu. Ne Bwàkabuulwibwà, kàbìdì, 7, pàvwa . . . ngeela meeji ne 8. Pàvwa kabalu katòòke . . . to, m'mwi6. Pààkapatukà mubàndi wa kabalu katòòke, Wàkapèèbwa bu—butà, bwà kukòòkesha ne kucimuna.

217 Ki mwelè wà mvità kupatukawu mukana Mwèndè. Ùvwa cinyi? Mubàndi wa kabalu katòòke wa Bwàkabuulwibwà awu's. Mònaayi mwelè wà mvità. “Mukana Mwèndè mupatuka mwelè wà mvità musàkisha nseke yìbìdì,” Dìyì adi. Nènku, ndekeelu wa byònsò, ku Dìyì Dyèndè, pàdìDì dimwènèshìibwe kùdì bàna bònsò bàà Nzambì, Yèyè neadyatakajè ditunga dyònsò ku makàsà ne Dìyì Dyèndè, ku mwelè wà mvità musàkisha ewu's. Tàngilàayi kuneeku cyàkenzekà, patùdì tucyàngata apa:

*Nènku . . . cyanza cyèndè cyà dyàbalùme . . . ne mukana mwèndè mùvwa mupàtuka mwelè wà mvità musàkisha nseke yìbìdì: ne mpàla wèndè ùvwa bu mùtù dìbà dikenka mu bukolè bwàdì.*

218 “Mwelè wà mvità musàkisha nseke yìbìdì.” Cìvwà cipatuka mukana mwà muntu ewu ncinyi? Dìyì dyà Nzambì. Mwelè wà mvità musàkisha nseke yìbìdì. Ùvwa wenza cinyi? Ùjingulula meeji à mu mwoyi, mapàngadika; ùbwela too ne mu ndòndò mene kupita munyiinyi, musunya, tubulubulu twà mashi, ùbwela ne mu mufùba, too ne mu bwóngù bwà mufùba, ùya too ne dyàmwamwà dyà aci, nànsha ne ku dìjinguludi dyà meeji ne mapàngadika à mu mwoyi. Ki cìdì Dìyì dyà Nzambì dyenza ncyòcì aci.

219 “Ne Dìyì dyàkavwijiibwa mubidi ne dyàkasòmbela munkaci mwètù.” Nènku mpindyewu Dìyì ndivwijiibwe mubidi mu Èkèleeziyà Wèndè, disòmbè munkaci mwètù. Banjèlò Bèndè mu cyanza Cyèndè, bàkwata mudimu wà bwambi. Nzambì mmutangidile Èkèleeziyà Wèndè. Nzambì mmutweyèmene twètù bàà cikondo eci bwà kutwala Bukènkè bwà Èvànjeeliyò ebù kùdì bukwa panu bùdì bùpùnga ne lufù, buswikiibwe ku cimpàngaanu, ne ku bilelè ebù's. Nzambì mmutwambike bujitu

abu wêwè ne mêmè. Dyàkabi dyètù pìikala bampàngaanu mwà kufwa kabàyi bamanye. Kaa, bààkabatwadila dibala, difùnda, ne dilonga dyà makumi a bishifèri, ne malòòshìilè makesè à butèndeledi, kàdi's mbalwe kwenza ànu mûngà mushiki wà beena kwitabuuja bààbò. Ndi ngàmba mêmè Èvànjeeliyò's wè! Èvànjeeliyò kèna ànu Dìyi nkààyaadi to. Pòlò ngwákamba nànkù. Pòlò wákamba ne: “Èvànjeeliyò kàakalwa kutùdi ku Dìyi nkààyaadi to, kàdi ku Dìyi adi dimwènèshìibwe.” Pàdi Dìyi, ku Nyumà Mwímpè, diikale. . . Dìyi ndikùna munda mwà mwoyi ùdi ne Nyumà Mwímpè ne dìdi dipatula cìdi Dìyi dyàmba ne Dyòdi nedipàtule. Ne Dìyi didi mwà kujingulula meeji à mu mwoyi! Butùmbi's wè! Kaa, ekèlekèle! Kaa! Dijinguludi dyà meeji ne mapàngadika à mu mwoyi, s'ki cìdi Dìyi.

<sup>220</sup> Dipàtuka mukana Mwèndè, mwelè wà mvità musàkisha nseke yìbìdi, ùtàbuluja bampàngaanu's. Bikèngela bwà cintu kampànda cyenzeke dimwè dyà ku matùkù àdi panshi aa. Èyowà! Dìyi dyà Nzambì, Dìna Dyèndè dìvwa Dìyi dyà Nzambì, Dìyi dimwènèshìibwe. Tàngilàayi, Yesù wákamba ne: “Ndaayi pa buloba bujima,” Maako 16, Mèyi Èndè à ndekeelu à dilayangana ne èkèleeziyà kumpàla kwà kupinganaYè bwà kuDibuulula mu cikondo cyà èkèleeziyà. Wàkatùma Èkèleeziyà ne mudimu ne: “Ndaayi pa buloba bujima nùkayiishè cifùkùibwà cyònsò Èvànjeeliyò.” Cinyi? Kuyiisha Èvànjeeliyò. Maako 16: “Nuyiishe cifùkùibwà cyònsò Èvànjeeliyò.” Ncinyi ciine aci? Mu ngaakwilu mukwàbò ne: “kuleeja patòòke bukolè bwà Nyumà Mwímpè,” bivwa bikèngela bìikale nànkù's.

<sup>221</sup> Mpindyewu tàngilàayi, “kùdi yònsò. . .” Ki ng'anu kulongesha Dìyi to; Kàakambaku ne: “Ndaayi nukalongshe Dìyi to.” Yèyè wákamba ne: “Ndaayi nukayiishe Èvànjeeliyò.” Kì nkulongshe Dìyi to, kuyiisha Èvànjeeliyò. “Ne bimanyinu ebi nebifile aba bìtabuuja Èvànjeeliyò ewu; mu Dìna Dyànyi bòbò nebìipate badémòns, nebàakule myakulu mipyamipyà, bòbò mwà kukwata nyoka anyi kunwa cintu cyà cishebeyangana kì ncifwanyine kubenzela bwalu bubi to; bòbò batentèkele babèedi byanza, babèedi nebàsàngale.”

<sup>222</sup> “Ki kupàtukabò,” mwàkambà Mufùndu, “banyiisha myaba yònsò; Mukalenge ukwata naabo mudimu, ùshindika Dìyi ne bimanyinu byènda bilonda.” Ki Èvànjeeliyò nyèyè awu, Èvànjeeliyò dileeja patòòke.

<sup>223</sup> Bimanyinu ebi nebifile búngi kaayi? Too ne ku ndekeelu kwà buloba, ku cikondo ne cikondo cyònsò. Ki banyààbanyà abu benda bàtùngùnùka, balame Bukènkè abu. Kabyena bìkemesha to pàakamba Yesù ne: “Kanùciinyi to, nwènu kasùmbù kakesè kàà mìkòòkò, ndisya dímpe dyà Taatù wenù bwà kunùpèesha Bukalenge.” Kasùmbù kakesè kàà mìkòòkò; mbanyààbanya misangu yònsò, kì nciibúngi nànsha.

<sup>224</sup> Èyo, mpindyewu dìyi dyamba dikwabo dìmwèpelè. Nènku

tudi twangata wa 20, nàнку mpindyewu twánji tumònààyiibi mwaba ewu ku mvensa ewu mwaba ewu. Mpindyewu wa 16:

*Nènku ùvwa ne mítootò mwandamutekète mu cyanza cyèndè cyà dyàbalume: . . .*

225 Mpindyewu twàngatàayi. . . ne kùdi. . . Mpàla Wendè:

*. . . mukana mwèndè mùvwa mupatuka mwelè wà mvità musàkisha nseke yìbìdi: ne mpàla wendè ùvwa bu dìbà dikenkesha mu bukole bwàdi.*

226 Nwènu babuululè mu. . . twánjibi kumòna tǔng, Maatàayi 17. Twàngatàayi ànu mwaba ewu mene patùcidipu apa; pa nàнку tudi ànu tucikenketa, ne bààbúngì bàà ku bantu bàdi bàcyàngata abu, túbàlekela. . . anyi bàcìfùnda, netúbàlekele ànu bàcìbalè bwà twamòna mwà kumanya.

227 Maatàayi 17, èyo:

*. . . paanyimà pàà matùkù àsambòmbò Yesù kwangata Peetèlo, Yakòbò, ne Yone. . . ku mukuna mutùmbùke kule,*

*Ne wàkakùdimuka mpàla mwìsù mwàbo: ne mpàla wendè wàkakenka bu dìbà, ne civwàlù cyèndè civwà citòoke bu bukènkè.*

228 Wàkashintuluka. CyàkenzaYe ncinyi? Kuditwa Yèyè mwine mu dishintuluka, kubwela ne mu ditùkù dyà dilwa Dyèndè. Mpindyewu tàngilàayi, ànu mèbà makesè kumpàla kwà cyòci eci, Yesù wàkatèèla díyi dyamba edi kaaba aka mu nshapità udi ulonda ewu, “Bulelèlà Ndi nnwàmbila ne, bakwabo bàdi biimane mwab’ewu aba. . .” Mbanganyi bàdi bamanye cìndì njinga kwamba aci? “Bàmwè bàdi biimane mwab’ewu, kabààkufwa to, too ne pààmònàbo Mwànà wa muntu ùlwa mu Butùmbi.” Ncyà bushùwà anyi? Ki kwangataYe Peetèlo, Yakòbò, ne Yone, bantemu bàsàtu abu, bwalu mu Dipungila Dikulukulu mu byònsò, díyi ne díyi dyònsò dikesè, òvwa dìjaadikiibwa kùdi bantemu bàsàtu, ne kubànda nààbò ku mukùna.

229 Mònaayi cyàkenzekà dyàmbedi. Kaa, ncyèna ànu mwà kwimanyina mwab’ewu to, bìdi bikèngela ànu bwà mèmè kafika ku eci. Tàngilàayi! Cintu cyà kumpàla cyàkamunabo ncinyi? Bààkaya ne Yesù ku mukùna. . . anyi Yèyè ngwakabànda naaboku, ne Wàkakùdimunyiibwa mpàla mwìsù mwàbo, mushintuluke. Civwàlù Cyèndè kukenkaci bu dìbà munkacinkaci mwà bukole bwàdi, ne kùdiYe aku kwàkamweneka Mòsà ne Eliyà. Mmu mmwenekelu kaayi mulwalwà Mwànà wa muntu mpindyewu? Nènku dyàmbedi, neàmwèneke, nekwikale Mòsà ne Eliyà.

230 Mpindyewu, mònaayi, kumpàla kwà Yesù kwalukila pa buloba. . . Mpindyewu, eci ndambù kumpàla kwà dìbà, kàdi Nyumà wa Eliyà neàpingane pa buloba bwà kwaluja myoyi yà bàna kùdi baataatù. Bible ngudi mwambe nàнку.



Yesù wàkamumòna kaaba aka, bapostòlò bàakamumòna kaaba aka, dilondangana dyà dilwa dyà Mwânà wa muntu mutumbishiiibwe. Bikèngela Yêyè àtumbishiiibwè ne àlukile. Cintu cyà kumpàla, bangabanga ne kuMumònabo, cívwa ncinyi? Eliyà. Pashiishe cinyi? Mòsà; Izalèèlè munkaci mwà kwalukila kuntu kwàka, balami bàà mikenji. Ne pashiishe Mwânà wa muntu mutumbishiiibwe. Àlèluuyàh! Nudi numòna dilondangana dyà dilwa Dyèndè anyi? Nyumà wa Eliyà, anyi bujaadiki bwà cikondo cyà ndekeelu cyà èkèleeziyà. Nwamònu's, ulwa mu bukòlè bwà kuMumwènesha.

<sup>231</sup> Pashiishe beena Yuda binunu lukàmà ne makumi anaayi ne binaayi bwà kudisangabò pa Mukùnà wà Sinàayi, mwaba ùdi Izalèèlè mushàala ditùnga yêyè mwine; ditùnga dyà kale ne kalèèle pa buloba, dibèndelà dyà kale ne kalèèle ku wònsò à pa buloba; bàdi ne ditùnga dyàbò sungasunga, dibèndelà dyàbò sungasunga, cilwilu cyàbò sungasunga, mfranga yàbò sungasunga, ne bikwàbò byònsò. Bàkaadi cimwè cyà ku bidimba byà nsangilu yà matùnga bwalu bàkaadi ditùnga. Yesù wàkamba ne kabìvwa bikèngela bwà kwikalabò biimanshiibwe too ne piikalà bintu byònsò byùle to.

<sup>232</sup> Bwalu busokoka bwà mùshindù ùvwà musumbà wà beena Yuda, mukèngèshiibwe myaba yònsò, ne biipaciibwe, ne beediibwe mbilu ne biimanshiibwe, bu mùvwà Èkèleeziyà munda mwà bikondo byà dibèngiibwa ebi, kàdi Yesù wàkamba kàbìdi ne: “Panwàmòna mucì wà mfigi wela ntòngà, ditùnga adi dyàlukila cyàkàbìdi bwà kwikala ditùnga, cikondo cikaadi pabwipi, nànsha ku ciibi mene. Bulelèlè Ndi nzwàmabila ne, lukòngò Elu kalwàkujimina bintu byònsò ebi kabiyi byùle to.” Dilubakana edi. . . Bantu aba kabàakujiminaku to. Hitler wàkateeta kubashipa, Mussolini wàkateeta kubashipa, Stalin wàkateeta kubashipa, bantu bakwabo bònsò, kàdi kabàakwikala ne katòba to, anyi babùtula pa buloba nànsha, nebiiikalè cisàmbà ne ditùnga biimane kuntu kwàka. Amen!

<sup>233</sup> Nekùlwe Mòsà ne Eliyà. Kaa! Ndi ntèkemena ne nudi bacyūmwè.

<sup>234</sup> Èyo, “Dìbà dikenkesha mu bukòlè bwàdi,” mpàla Wendè, mushintùlùdiibwe, mukùdimuke. Mpindyewu cikwàbò cintu, mu Bwàkabuulwibwà 21:23, panwikala baswè kucifùnda. Mu Yelusàlèlà Mupyamùpyà, 21:23, Yêyè m'Mwânà wa mùkòòkò udi mu Cimenga, udi Bukènkè bwàci, bwikale bùkenka; bwalu kabavwa dijinga ne bukènkè mu Cimenga aci to, dìbà kadyàkujuukamu to, bwalu Mwânà wa mùkòòkò udi munkaci mwà Cimenga awu ki wìkala Bukènkè bwàci. Ne matùnga àdi masungidiibwe neèndele mu Bukènkè bwà Mwânà wa mùkòòkò! Amen! Yêyè ki Bukènkè bwà Mwânà wa mùkòòkò. Kaa, kanwenaayiku ne disànkà bwà bwalu abu anyi?

<sup>235</sup> Kaciyi ànu aci to, kàdi Yêyè ùdi kàbìdi, mu dilwa adi

(Yone wàkaMumòna mu ditùkù dyà Mukalenge), Dìbà dyà bwakane. Tuyaayi ku Maalàkì. Maalàkì, mupròfeta wa ndekeelu wa Dipungila Dikulukulu. Maalàkì, nshapità mwi4.

<sup>236</sup> Mvwa ne kaabwalu kakesè kàà kulonda bwà mukàjàànyì wa mushinga mukolè udi musòmbe paanyimà pààpa wàwa. Ngákamunwìshila màyi ku lusona kumpàla kwà twètù kuselangana, ngákateeta bwà kucilongolola paanyimà pàà bamane kuselangana. Nènku ncìvwa mumanye ne mvwa muswè kusela kàbìdì anyì to, ki nànkù awu yèyè kucìbuluka yèyè yònsò. Nènku mvwa ndyambidila ne ùvwa mwànà wa bakàjì mwìmpè bikolè bwà kumulekela aye, bwà mulùme kampànda mwìmpè kumusèlaye uvwa mufwànyine kumukòwelela. Nènku mème kudyambidila ne ncìvwa mene mucikumbànyine to; ne ncyèna ànu mukumbanyine to, bwà bwìmpè bwèndè abu, mu mìshindù yònsò. Pa nànkù yèyè wàkacìbuluka yònsò ne kààkamanya cyà dyenza to. Eci's nkukaadi bidimu, kukaadi bidimu bitwè ku makumi àbìdì. Wàkatàmba kucìbuluka bikolè, kubangaye kudila butùku ne muunyà. Nènku mvwa nteeta bwà kukosa nendè malanda, kabiyi ne mbwalu ncìvwa mumunange to, bwalu ncìvwa muswè kumupìcìshila dìbà dyèndè to; bwa, kumulekela apete muntu kampànda, muntu mwìmpè, bwalu yèyè mmwànà wa bakàjì mutambe bwìmpè bikolè ànu bwà kutungùnuka nànkù, nènku mèmè kwangata...ànu bwà kupatuka nendè ne bintu byà mùshindù awu. Ki mèmè—mèmè kudyambidila ne yèyè ùvwa munnange, ne mvwa mumanye ne mvwa mumunange. Ki dìbà adi mèmè kudyambidila ne: “Èè, nènditàcìshè ànu bwà...Nènkebè ditùkù kampànda bwà kupàtuka ne nsongààkaji mukwàbò, bwà kumufikisha ku dinguumvwila bibi.” S' mvwa kwikala mumushipe, byàkantonda bibi bikolè paanyimà pàà matùkù; yèyè wàkacìbuluka yònsò. Mèmè kumwambila, kwamba ne: “Wèwè udi ànu mwànà wa bakàjì mwìmpè be, ncyèna—ncyèna muswè kukupicìshila dìbà dyèbè mùshindù awu to.”

<sup>237</sup> Ki yèyè ne: “Kàdi mèmè—mèmè ndi mukunange ànu wèwè, Bill, ne wèwè's ki umwèpelè ùndì mwà kunanga.” Yèyè ne: “Ntu—ntu ànu mukunange misangu yònsò.”

Mèmè ne: “Mèmè—mèmè ntu mwanyshe ciine aci. Kàdi,” mèmè ne, “udi mumanye's,” mèmè ne, “mèmè ntu mudyambike wa mu cipèèla.” Mèmè ne: “Mèmè—mèmè nèngiikalè ànu ne nsòmbelu bu wa mudyambike wa mu cipèèla. Wamònu's, mèmè—mèmè ncyàkuselanganaku to nànsha kakesè.”

<sup>238</sup> Nènku ùvwa musùminyinekù bikolè, nudi bamanye's, mukwàcìkwètù. Ki kupàtukayè kuya ku—ku kaacisaasa aku. Nènku kufikaye kuntwaku, ne kutwaye binù, ki kwambaye ne: “Mukalenge, mèmè ncyèna mumanye cyà dyenza to. Ncyèna—ncyèna muswè kuKushìkukila to, kàdi pàànyì munange Bill, ne ncyèna mumanye cyà dyenza to. Mukalenge, Udiku mwà kumpa ndambù wa disambiibwa anyì? Udiku mwà kunkwacisha

ndambù anyi? Kacya ncitu mwanji kuKulòmba bwalu ebu kwònsò ne kwònsò eku to kacya bandela, Mukalenge, ne ndi ntèkemena ne kabyàkukengela bwà mèmè kuKulòmba kàbidì to,” yèyè ne: “kàdi bu Wèwè ànu mwà kunkwacishaku, ne kundekela nkangula Bible ewu, ne Wèwè kumpa Mufundu kampànda. Ntu muumvumvwe bantu bàmba ne Wèwè utu mwenze nànkù.” Nènku mmwenze ànu uwùkangula, cìvwa m’Maalàkì 4:

*Mònaayi, Ndi nnupa...anyi nnutumina Eliyà  
mupròfetà kumpàla kwà ditùkù dìdì—dìdì dikwacisha  
bwòwà dyà MUKALENGE adi:*

239 Yèyè ne: “Mèmè kujuuka mwaba awu mwikale ànu mutwishiiibwe ne netùselangane ànu bu cintu kanà cyònsò eci.” Nwamònu anyi?

*Bwalu, mònaayi, ditùkù dilwalwa, diikalà mwà  
kwòsha bu mfuulu; ne baditambishi bònsò, èyo,...aba  
bònsò bàdì beena lwonji, nebùkale nsona: ne ditùkù  
dilwalwà nedùkale mwà kubòòsha, mùdì MUKALENGE wa  
bilwilu wàmba, ne kadyàkubashùlaku nànsha muji anyi  
ditàmbà nànsha.*

*Kàdi bwènù nwènù bàdì baciina dìnà dyànyì...  
Dìbà (D-ì-b-à) Dìbà dyà bwakane nedìjuuke diikale ne  
lwendapu mu mapwapwà àdì;...*

240 “Dìbà diikale dikenka mu dikàndà dyàdì.” Kaa! Dikàndà dyà Mwànà wa Nzambì diikale dikenka munkaci mwètù dilòòlò edi. Mwimane munkaci mwà bitèekedi byà myèndù mwandamutekète mu buumuntù Bwèndè misangu mwandamutekète mwab’ewu bu nzuji. Bu Ewu wàkakènga ne wàkatùfwila awu, ne wàkambula cilumbulwidi cyà Nzambì pambidi Pèndè, ne wàkadyata ku makàsà cikaminu cyà mvinyo, wa ciji cikolè cyà Nzambì awu. Bwà ngènzàmpèkààtù Yèyè ùdì cisàbàsaba cyà cikwàcishà bwòwà, bwèbè wèwè musùukà mujimine ùdì pa mbù wa mwoyi. Nènku bwà Ekèleeziyà, m’Musùngidi wa kalolo, mwele lwongo mu diikisha, ne munkaci mwà kutèeleja kasulù kàà màyi kàsàba paùdì mudyàdije ne mwikishe musankishiiibwe menemene mu Kilistò. Cikondo kaayipu’s wè! Mwikale utukenkeshila ne nsesà Yèndè yà luuya ne: “Kanùciinyi to, Ndi Ewu wàkadiku, udiku, ne wàlwa awu. Ndi wa Bukolè bwònsò, pa kuumusha Mèmè kakwèna mukwàbò nànsha umwe to. Ndi byònsò bibidì Alpha ne Omega, ne kùdì ewu udi ne nyòtà Mèmè nèmupèèshè mishimi yà màyi à Mwoyi cyanààna.” Kaa, mulayi kaayipu’s ne mwandà wà dinanga kaayipu’s wè! Ne Mwànà wa mùkòòkò munkaci mwà Cimenga cidì kaciyi cikèngela bukènkè aci, ne Yèyè ùdì Dìbà dyà bwakàne ne dyondopa mu mapwapwà Èndè.

Yèyè ke Mbata wa mu Cibanda, Mùtootò ùdì  
ùbàlakana wà mu Dindà,

Yéyè ki udi mutàmbe bulenga mu binunu dikumi bwà musùukà wànyì;  
 Mu tunyinyinganya Yéyè ke bwànyì busàmbi, mu lutatu Yéyè ke cisokomenu cyànyì, Mmungambile bwà mmupwile ntatu yànyì yònsò.  
 Àlèluuyàh!  
 Yéyè ke Mbata wa mu Cibanda, Mùtootò ùdì ùbàlakana wà mu Dindà,  
 Yéyè ki mutambe bulenga ku binunu dikumi bwà musùukà wànyì.

<sup>241</sup> Èyowà's, mukalenge! Kaa, Mùtootò munène wà mu Dindà awu pàdìwu wùpàtuka bwà kukenka, usekeleela ditùkù dilwalwà adi, wàkula ne civuma, wàmba ne: “Ditùkù didì pabwìpì ne kumweneka, Mwànà awu wátambi kuseemena,” ne Ùdi ùDikokela paanyimà pàà mitootò mikwabo yònsò (Kaa, ekèlekèle.) ne dyondopa mu mapwapwà Èndè.

<sup>242</sup> Mpindyewu twàlukilàayi ku mukenji wètù. Nènku tukàadi tujikija mpindyewu, bwà kudilongolola bwà màalaba dilòlò, bwalu nkushààle tusunsa dikumi ne tutaanu bwà dîbà citèemà, katwena baswe kulama muntu nànsha umwe ntanta mupitepite bule to, ànu bwà twàmòna mwà kwikala kaaba aka.

<sup>243</sup> Èyo, Dîbà dyà bwakane ne dyondopa mu mapwapwà Àadi. Mpindyewu mmwenekelu Yèndè. Yéyè uvwa nzuji, anyi cintu cikwabo bwà kuleeja ne ùvwa mubwele mu ditùkù dyà Mukalenge. Nudi nwitabuuja nànu anyi? Wàkaya kabwela mu ditùkù dyà Mukalenge ne kumònaye Mukalenge bu nzuji; kàyì bu mwakwidi to, kàyì bu mfùmù to, kàdi bu nzuji. Yéyè n'Nzuji. Kanwena nwitabuuja aci anyi? Bible ùdì wàmba ne Yéyè n'Nzuji. Kàdi's ki Yéyè ewu muvwale bilàmbà ànu bu Nzuji, uleeja cyàkenzaYe aci; civwàYe aci: civwàYe bwà ngènzàmpèkààtù, civwàYe bwà mwena Kilistò. Nènku ke Yéyè ewu mwimane mpindyewu ne Diyì dyà màyi àbùngi, ne mpàla Wendè ùvwa bu mùdì dîbà dikenka mu dikàndà dyadi.

<sup>244</sup> Mpindyewu bipeta, mvensa wa 16. “Nènku...” To, mfwilaayiku luse, mmvensa wa 17:

*Nènku pàngàakamumòna, ngàkapòna ku makàsà èndè bu mufwè.*

<sup>245</sup> Ekèlekèle! Mupròfeta kavwa mwà kutwala kàbidì cintu nànsha cìmwè to, pakumòna cìkèènà-kumòna bu nànu awu. Ùvwa—Ùvwa mumukama ànu bukolè bwèndè bwònsò, ne kuponaye ànu panshì ku makàsà Èndè aku bu mufwè. Mpindyewu tàngilàayi:

*Ne yéyè wàkantentekela cyanza cyèndè cyà dyàbalùme pambidi pànyì, ùngambila ne: Kùcìnyì to; mèmè ndi wa kumpàla ne wa ndekeelu.*

<sup>246</sup> Kaa, ekelekele! Kayi muprofeta to, Nzambi! “Mémè ndi wa kumpala ne wa ndekeelu. Mémè ndi wa kumpala wa Dibuuulula, wa ndekeelu wa Dibuuulula. Mémè ki Yèyè wàkadiku awu, Mémè ki Yèyè ùdiku awu, Mémè ki Yèyè wâlwa awu.” Twánjì kumònaayibi:

*Mémè ndi . . . Ndi . . .*

*Ne yèyè wàkantentekela cyanza cyèndè cyà dyàbalùme pambidi pàanyi, ùngambila ne: Kùcìnyì to; mémè ndi wa kumpàlà ne wa ndekeelu:*

*Ndi ewu udi ne mwoyi, ne uvwa mufwe; ne, mònaayi, ndi ne mwoyi bwà kashidi ne kashidi, (Mpindyewu mene. Ki díbà adi kwelayè lubilà lukolè ne:) Amen; ne ndi ne nsapi yà iferno ne . . . lufù.*

<sup>247</sup> Mpindyewu, kanuumvu bwòwà to. Mbwà cinyi butùdi bafwanyine kuciina’s? Bwà cinyi Èkèleeziyà mmufwanyine kupangila bwà kulama Dyèndè . . . bwà kwela meeji ku Díyì Dyèndè? Twánjì twìmanàayi mwab’ewu bwà katanci kakesè cyanààna, bwalu tukàadi tujikija. Mbwà cinyi bùdì Èkèleeziyà ewu mufwanyineku kuciina’s? Ncinyi cìdìYe kacya mulaye cìtùYe kàyì mumweneshe kumpàlà kwètù? Bwà cinyi bunùdi bafwanyine kuciina dinyoka anyi cikondo cyà pashiishe? “Kucìnyì to! Ndi Ewu wàkadiku, Ewu udiku, ne wâlwa awu. Mémè ki wa kumpàlà ne wa ndekeelu. Mémè ndi ne nsapi yà iferno ne yà lufù kaaba aka mene.” Bwà cinyi? “Ndi mucimùne ne mucimùne byònsò bibidi iferno ne lufù (Abi’s mbyònsò bibidi lukita ne ngenà; lufù lwine, ngenà mwine’s.) bwèbè wèwè. Ndi mucimùne byònsò’s. Ndi mucimùne iferno, lufù, lukita.” PavwaYe pa buloba, Yèyè uvwa ànu mutambe bun- . . .

<sup>248</sup> Bantu bààbùngì bààkapatuka bwà kucimuna. Nuvwaku bamanye nànkù anyi? Napoléon wàkapatuka bwà kucimuna buloba bujima, ne wàkacyenza pavwaye ne bidimu makumi asatu ne bisatu. Mu bidimu dikumi ne mwandamutekète too ne makumi àbìdì ne bitaanu, Napoléon ùvwa mukandikyanganyi wa maalà, kàvwa witabuuja dìnwa dyà maluvu anyi ní ncinyi ní ncinyi to. Wàkaya ku France. Kàvwa mwena France to, ùvwa mufumine ku cisanga kampànda, kuyaye kuntwaku bwà kasombwela France mene bwalu kavwa mumuswe to, kavwa muswe France to. Kàdi yèyè wàkacimunyibwa’s. Nènku kutungunukaye ne kucimunaye France, ne kwangataye beena France abu ne kucimunaye buloba bujima. Nènku pààkakumbajaye bidimu makumi asatu ne bisatu yèyè kusòmbela panshi e kwasaye mwadi bwalu kakuvwa muntu mukwabo nànsha umwe wa kucimuna to, kàdi kufwaye kanwayi wa maalà à kapyà. Mucimunyibwe, kàvwa nànsha mwà kudicimuna yèyè mwine to. Nwamònu anyi? Nènku pashiishe kutwilanganaye ne waterloo wèndè ku Waterloo, bwalu bwèndè kudikoselabu ku Waterloo. Ntu mukafike

kuntwaku ne mumòne bimanyinu bikulukulu byà kale abi byà bishààdila ne bintu kuntwaku, patùvwà tusanganyibwa mu ditùnga amu. Mpindyewu, tudi twangata mucìmunyi awu, wàkabanga ùcìdi nsongààlùme ne kwangataye luseke lubi bwà kucìmuna, kàdi kufwaye, bu cintu cyà bundu.

<sup>249</sup> Kàdi kwàkalwa mukwàbò Nsongààlùme pa buloba musangu kampànda. Wàkafwà ne bidimu makumi asatu ne bisatu ne Wàkacìmuna byònsò bìvwà mwà kucìmunyiibwa abi. PavwaYe pa buloba Yèyè wàkacìmuna nkuka, budìsu, Wàkacìmuna bubèèdi, Wàkacìmuna baadémons. PààkafwaYe, Wàkacìmuna lufù. PààkabiikaYe, Wàkacìmuna iferno. PààkabandaYe ke kucìmuna bintu byònsò bìvwà bilwisha bukwabantu, byàkaya mu cikaminu cyà mvinyo wà Nzambì ne kucìzaazaye ne kucìmuna lufù, iferno, lukita, disaamà, bintu byà kwìsùkwìsù, bikwabo byònsò, ne kubìcìmuna byònsò, ne kubìika mu ditùkù dísààtu ne kucìmuna byuluulu byònsò byà muulu, ne kukosa difwima òvwà pankacì pàà Nzambì ne bantu adi, kàdi kutwangaja Dyulu ne buloba pàmwè. Butùmbi's wè! Kaa, ekèlekèlè! Yoyòyò!

<sup>250</sup> S'ki Yèyè udi mwimane wàwa Mucìmunyi wa Bukolè kacya ànu wàpanda cilàmbà cikudika bipese bìbìdì, s'ki Yèyè awu. Nsapi yà lufù ne yà iferno yònsò mìlembelele ku luseke Lwànyì aku: "Kucìinyi to." KutèèkaYe cyanza Cyèndè cyà dyàbalùme (bukolè Bwèndè) pambidi pèndè, ne kumubiisha ku bukolè bwà cyanza Cyèndè cyà dyàbalùme, yèyè ne: "Kucìinyi to, Ndi Ewu wàkadiku, ne Ewu udiku, ne wàlwa awu. Mèmè ndi wa kumpàla ne wa ndekeelu. Ndi Ewu wàkadi ne mwoyi, ne wàkafwà, ne udi cyàkàbìdì ne mwoyi kashidi ne kashidi. Amen!" Kaa!

Mònaayi! Mònaayi Mucìmunyi wa Bukolè,  
Mònaayi! Mumònaayi patòòke tòò,  
Ki Yèyè awu mwimane, Mucìmunyi wa Bukolè,  
Kacya ànu Wàpanda cilàmbà cikudika aci  
bipese bìbìdì.

<sup>251</sup> Amen! Kuumushila bantu cipumbishi cyònsò, bwà bààmòna mwà kwikala batwangajiibwe bu mu budimi bwà Edènà. Mpindyewu, muntu...Nkaavwa muswe kucìlama, kàdi nèncyàmbè. Muntu ùtu wa bukolè bwònsò. Kanwèna nwitabuujja aci to, kàdi ke cìdiyè. Muntu mudìlekelele kùdì Nzambì mu byònsò ngwa bukolè bwònsò. Yèyè kààkambaku, mu Maako 11.22 ne: "Bintu byònsò byùdì wamba, ne kuyi wela mpatà mu mwoyi wèbè to, necyènzeke. Udi mwà kupeta ciwàmbì aci" anyi?

<sup>252</sup> Cìdì cyenzeka ncinyi pàdì bàà bukolè bònsò bàbìdì batwilangana? Pàdì Nzambì ne muntu basangila, bààbukolè bònsò bàbìdì, cintu kampànda cìdì ne cyà kunyukuka. Cikampà-...Cyònsò cyùdì mufwanyine kwamba ne bukolè bufuki bwà bukolè bònsò bwà Nzambì abu, mumanye ne

Yèyè mmucilaye, ne mMucyàmbe mu Dìyi Dyèndè, cidì cifuka bukolè kampànda bùdì bupátuka kwaka ne bufikisha bintu ku dyenzeka, bintu bitù kabìyìku abi, bùdì bubìvwija, bu ne bìdiku, bwalu bààbukolè bõnsò bàbìdì mbatwilangane. S'ki Yèyè awu mwimane! Kaa, Yèyè kî mmulenga wa dikema anyi!

253 Twǎnjì tumònààyibi tǔng ní tudi ne bikwàbò bintu bìmpè. Mvensa wa 18, mpindyewu mvensa wa 19. Yone's; Cyakenzeka ncinyi pààkamònaye mmwenekelu Wendè? Cipeta civwa cinyi? Wàkaponà ku makàsà Èndè; kàvwaku kàbìdì mwà kwimana kuulu to, mwoyi wèndè wa buntu awu wakuuminyina, kavwaku ànu mwà kwimana to. Yèyè ùvwa Mucìmunyi, Úkaavwa mumane kucìmunà.

254 Mpindyewu Yèyè ùdì ùtùma dìyi, ne pashìshe tudi tubanga kujikija nshapìtà, mvensa wa 19 ewu:

*Fùnda bintu byùdì mumòne, ne bintu bìdiku, ne bintu bìikalaku pashìshe;*

255 Tudi twangata mvensa wa 20:

*Bwalu busokoka bwà mìtootò mwandamutekète iwàmònu mu cyanza cyà dyàbalame ayi, . . . mbitèèkedi byà myèndù byà ngòlò mwandamutekète. Mitootò mwandamutekète ayi yidi banjèlo mwandamutekète bàà èkèleeziyà mwandamutekete: ne bitèèkedi byà myèndù mwandamutekete biwàmònu abi ng'èkèleeziyà mwandamutekète.*

256 Kaa! Ncyà cifwanyine kwimanyika mweyelu's, mulunda wanyi. KuMumòna mwimane mwaba awu mu butumbuke . . . butumbuke bwà Bunzambi Bwèndè's. Yèyè n'Nzuji, Mwakwidi, Mfùmù, Mukanku, Mwànà wa mùkòòkò, Ntambwe, Alpha, Omega, Taatù, Mwànà, Nyumà Mwímpè; Ewu wàkadiku, udiku, ne wâlwa awu. Mudyatakaje cikaminyi cyà mvinyo wa ciiji cokolè cyà Nzambì, ne musankishe mu bintu byònsò, mu mùshindù wà ne Nzambì (Kwamba ku nkùruse), pààkajuukulukaYe (KwambaYe ne: "Kwajiki."), musankishe Nzambì bikolè, mu mùshindù wà ne Nyumà wàkapatuka mu Yèyè awu wàkaalukila mu dindà dyà Paasàkà ne kuMujuulaye ne kuMubiishaye cyàkàbìdì bwà dibingishiibwa dyètù.

257 Ki Yone kubandishaye mèsù e kuMumòna mwimane mwaba awu ne makàsà à cyamu cyà kabanda, mèsù bu ndimi yà kapyà atwa eku ne kwaka pa buloba bujima. Danyèlè wàkaMumòna bidimu nkàmà mwandamutekète kumpàlà kwà cyòci aci, mu mwaba wùm wèwùm wè awu, mùshindù wùm wèwùm wè awu, muntu umweumwe awu mwimane mwaba awu, Mukulumpile matùkù, ne kampànda wa mufwànàngane ne Mwànà wa muntu wàkàdisanga Nendè pàmwè, ne bààkaMoomekela cilumbulwidi cyònsò, mwimane ku Cilumbulwidi cyà Nkwasa Mutòòke.

258 Pa kumòna bintu ebi, bìvwa bikèngela bwà twètù kwikala bantu bàà mùshindù kaayi, balunda bàanyi? Nzambì

ànùbènèshe ki dyànyì disambila. Nwamònu anyi? Nudi baMunange anyi? Nudi nuMwitabuuja anyi? Nudi beele lwongò lwà musùùkà wènù munda Mwèndè anyi?

<sup>259</sup> Twìnyikààyaaku mitù yètù bwà katanci kakesè cyanàànà.

<sup>260</sup> Ànu bitekètebitekète ne bitùùlùbitùùlu, patwìkala mwà kwimba bitekètebitekète ne, *Ndi Mwele Lwongo Lwà Musùùkà Wànyì Mu Mwaba Mutalale Wà Diikisha*, “Ncyàdyàkuumvwaku bisàbàsaba bìdì bikungula abi bwà kuya ne musùùkà wànyì kule to, kàdì Cyôci necìtwadile musùùkà wànyì ditalala dyà kalolo’s.” Bitekètebitekète mpindyewu, ne kaneemu kònsò, muntu ne muntu.

Ndi mwele lwongo lwà musùùkà wànyì mu mwaba mutalale wà diikisha,  
Ncyàkwendelakù kàbìdì ne màzuwà pa mbù mutombòke awu to;  
Cipeepà cicolè cìdì mwà kajuuka ne cikisu,  
cipèpele cicolè cyà ndondo,  
Mu Yesù mèmè ndi mu dikùbiibwa bwà kashidi.

Ndi mwele lwongo lwà musùùkà wànyì mu mwaba mutalale wà diikisha,  
Ncyàkwendelakù kàbìdì ne màzuwà pa mbù mutombòke ewu to;  
Cipeepà cicolè cìdì mwà kajuuka ne cikisu,  
cipèpele cicolè cyà ndondo,  
Mu Yesù mèmè ndi mu dikùbiibwa bwà kashidi.

Nkenkèshilèku, (lekelaku Nsèsà yà Butùmbi ayi, Mukalenge,) Mukalenge, nkenkèshilèku,  
Enzàku bwà Bukènkè bwà ku Kaleyì bünkenkèshilèku;  
Kaa, nkenkèshilèku, Mukalenge,  
nkenkèshilèku,

Tubandishàayi byanza byètù kudiYe.

Bukènkè bwà ku Kaleyì bünkenkèshilèku.

Kwikala bu Yesù, (Èyowà’s, Mukalenge.)  
kwikala bu Yesù,  
Pa buloba ndi njinga bwà kwikala bu Yèyè;  
Mu lwendu lwònsò lwà mwoyi wànyì pa buloba too ne ku Butùmbi,  
Ndi ndòmba ànu bwà kwikala bu Yèyè.

. . .Éyì Musùngidi wa ukemesha,  
Pa buloba ndi njinga bwà kwikala bu Yèyè;  
Mu lwendu lwònsò lwà mwoyi wànyì pa buloba too ne ku Butùmbi,



<sup>261</sup> Nudiku baswe kwikala ne Mwoyi Wèndè awu munda mwènù, mwikale uleeja Bwikadi Bwèndè anyi? Bu nwènù mwà kuswa, ne kanùyi banji kuwùpeta to, nudiku mwà kujuukila kuulu bwà disambila anyi? aba bàdi bàswè bwà kubàvulukabò mu disambila. Nzambi ànùbènèshè.

Mu cidiilu cyà Betèlèhèma . . .

Shààlaayi ànu biimane mpindyewu, ànu biimane's.

. . .kupatiukamu Mwenyi, (Newikalè mwenyi kùdì bàà pa buloba.)

Pa buloba ndi njinga bwà kwikala bu Yèyè;  
Mu lwendu lwònsò lwà mwoyi wànyì pa buloba  
too ne ku Butùmbi,  
Ndi ndòmba ànu bwà kwikala bu Yèyè.

Ànu kwikala bu Yesù, kwikala bu Yesù, (Ke dyànyì dijinga ndyòdì adi.)

Pa buloba ndi njinga ànu kwikala bu Yèyè;  
Mu lwendu lwònsò lwà mwoyi wànyì pa buloba  
too ne ku Butùmbi,  
Ndi ndòmba ànu bwà kwikala bu Yèyè.

. . .wa mmwenekelu mupwekele, wa didipwekesha ne wa mmwenekelu mupwekele.

<sup>262</sup> Mpindyewu, Taatù wa mu Dyulu, bantu bààbùngì bàdi bàswè kuKupeta mbòbò aba biimanyine kuulu. Mbacyòke ne dipambuka, kabàyi bamanye kuyaayabo to, bapulumuna kùdì nkwaka wa mwoyi; ne bamanye ne pàmwàpa kumpàla kwà kucyabu mwoyi newikalè mulekele dituuta, dîbà adi cisàbàsaba cinène, bibila, kumpàla kwabo aku, kwà musùùkà mupambuke. Bàvwa ànu mùdìbò bòbò biine, bàvwa bu mùdì bàà pa buloba, kàdi mbaswè kwikala bu Wèwè mpindyewu, Mukalenge. Bàkidileku mu Bukalenge Bwèbè, mbèèbè Wèwè, Taatù, bwalu Wèwè udi mumanye myoyi yàbo ne meeji à mu myoyi yàbò. Ne Wèwè udi mucifunde nènku, ne mucyàmbè ne mishiku Yèbè wèwè mwine ne: “Ewu udi umvwa Mèyi Àànyì, ne witabuujà Ewu wàkantùma Mèmè, ùdi ne Mwoyi wà Cyendèlèlèlè.” Mukalenge, Wàkamba kàbìdì, ne: “Wa disànka ng'ewu udi ubala ne ewu udi uteeleja mèyi à cipròfeta cyà Mukàndà ewu, bwalu cikondo cikaadi pabwìpi.” Bààkafika ku dyumvwa ne cikondo cikaadi pabwìpi. Kabèèna kàbìdì mwà kutungunuka ne kupambuka to, Mukalenge. Pwekesha nshinga wa disùngila, ubabweja Wèwè nkààyebè, Mukalenge. Swàku bwà kupatukabo kubangila ànu dilòòlò edì, biikale baleeja Bukènkè bwà Yesù Kilistò. Ndi mbalambula kùdì Wèwè, Taatù Nzambi, mu Dìnà dyà Yesù Kilistò. Swàku bwà balondeku Mukalenge ne didipwekesha dyònsò mu dibatiiza mwab'ewu mu èkèleeziyà emu; bambike Nyumà Mwimpè mu nsòmbelu wabo

bwà bààmòna mwà kwikala bu Yesù matùkù abo ònsò à mwoyi.  
Tudi tulòmba nùnkù mu Dìna Dyèndè.

Ànu kwikala bu Yesù, kwikala bu . . .

<sup>263</sup> Bàmwè bàà ku nwènù bònsò bàdì biimane pabwípì anyi basòmbe pabwípì ne bantu abu, bàdì biikale beena Kìlistò, ololaayi cianza nukwateku cianza cyàbò nubalabule ku cianza. Nubatentèkele cianza ne: “Nzambi àtumbe bwà musùukà wèbè.” Byoshedi byètù mbyule byònsò mwab’ewu ne bânà ne bikwabo, katwakukùmbana bwà kubatwala kuneeku to.

. . . mu lwendu lwà mwoyi wànyì pa buloba too  
ne ku Butùmbi,  
Ndi ndòmba ànu bwà kwikala bu Yèyè.

Nkenkèshilèku, kaa, nkenkèshileku,  
Kaa, Bukènkè bwà ku Kaleyì,  
bunkenkèshilèku;  
Kaa, nkenkèshilèku, Mukalenge,  
nkenkèshilèku,  
Bukènkè bwà ku Kaleyì, nkenkèshilèku.

<sup>264</sup> Nudi badyūmvwè bilenga byà menemene anyi? Kanwenaayiku nudyumvwa bimpè anyi? Kwenaku ne disànkà dyà ne udi mwena Kìlistò anyi? Labulanganaayi ku byanza ne muntu udi musòmbe pabwípì neebè mpindyewu awu, patùdì twimba musambu wà kasàlà apa, “Netwèndele mu bukènkè, Bukènkè bulenga ebu,” Bukènkè bwà Mukalenge Yesù Kìlistò munkaci mwà kumwèneshiibwa mu mubidi.

Netwèndelè mu Bukènkè, Bukènkè bulenga be,  
Bùlwa mwaba wùdì mamata à lumuma à luse  
àbàlakana;  
Kenkèshàku mu nyūngulukilu wetù mwònsò  
muunyà ne butùku,  
Yesù, Bukènkè bwà bàà pa buloba.

Wimbàayi, bantu bònsò!

Netwèndele mu Bukènkè ebu, m’Bukènkè  
bulenga be,  
Bùlwa mwaba wùdì mamata à lumuma à luse  
àbàlakana;  
Kenkèshàku mu nyūngulukilu wetù mwònsò  
muunyà ne butùku,  
Yesù, Bukènkè bwà bàà pa buloba.

Lwàyi, nwènù bansantu bònsò bàà Bukènkè  
kobolàayi,  
Yesù, Bukènkè bwà bàà pa buloba;  
Dìbà adi ngonga yà mu Dyulu neyidilè,  
Kaa, Yesù, Bukènkè bwà bàà pa buloba.

Elaayi byanza byènù muulu mpindyewu.

Netwèndelè mu Bukênkè ebu, Bukênkè  
bulenga be,  
Bùlwa mwaba wùdì mamata à lumuma à luse  
àbàlakana;  
Kenkèshàku mu nyungulukilu wetù mwônsò  
muunyà ne butùku,  
Yesù, Bukênkè bwà bàà pa buloba.

Netùtùngunukè ne kwenda mu Bukênkè ebu,  
M'Bukênkè bulenga bwà kacya's,  
Bùdi bùlwa mwaba wùdì mamata à lumuma à  
luse akenkesha;  
Bùkenkeshè mu nyungulukilu wetù mwônsò  
muunyà ne butùku,  
Yesù, Yèyè's ki Bukênkè bwà bàà pa buloba.

Netwèndele mu Bukênkè ebu, (Bukênkè bwà  
Èvànjeeliyò) Bukênkè bulenga be,  
Bùlwa mwaba wùdì mamata à lumuma à luse  
àbàlakana;  
Kenkèshàku mu nyungulukilu wetù mwônsò  
muunyà ne butùku,  
Yesù, Bukênkè bwà bàà pa buloba.

<sup>265</sup> Kale ku cibangidilu, ku Mpenta pàakapona Nyumà Mwímpè pa Èkèleeziyà. Mukenji kupwekelawu mu Seemunà; ke Irénée kwimanaye, munsantu munène wa Nzambì awu, wàkula mu myakulu, bukolè bwà Nzambì, bubìisha bafwè, bwondopa babèèdi, ùvwa wendela mu Bukênkè. Paanyimà pèndè kulwaku Colomban, munsantu munène wa bukolè wa Nzambì. Bààbúngì bàà ku bansantu banène bambule Mukenji benda bapweka, benda mu Bukênkè, Bukênkè bwà Èvànjeeliyò, Bukênkè bùmwebùmwe bwàkakenkeshà mu Ditùkù dyà Mpenta abu; Kilistò mwimane munkaci mwà cisàmbà Cyèndè, ne bitèèkedi byà myèndù byà ngòlò mwandamutekète abi bileeja nsèsà Yèndè ànu mutù díbà mu nkankalà amu's.

<sup>266</sup> S'ki twètù aba mu cidimu cyà 1961:

Tudi twendela mu Bukênkè ebu, M'Bukênkè  
bulenga bwà kacya's,  
Bùdi bùlwa mwaba wùdì mamata à lumuma à  
luse àbàlakana;  
Kaa, bùkenkeshè mu nyungulukilu wetù  
mwônsò muunyà ne butùku,  
Éyì Yesù, Bukênkè bwà bàà pa buloba.

Tujuukilààyì kuulu.

Tudi batungunuke ne kwendela mu Bukênkè  
ebu, M'Bukênkè bulenga bwà kacya's,  
Bùdi bùlwa mwaba wùdì mamata à lumuma à  
luse àbàlakana;

Kenkèshàku mu nyùngulukilu wetù mwônsò  
muunya ne butùku,  
Yesù, Bukênkè bwà bàà pa buloba.

Nudi baMunangè anyi?

Ndi muMunange, ndi muMunange,  
Bwalu (ànu bwalu) Yèyè wakannanga  
kumpàla,  
Ne wakampetela lupàndu  
Pa mucì wà Kàlvaryò.

<sup>267</sup> Nciyikù kàbìdi mwà kukùdimukila ku maalu à pa buloba to. Ndi mufwe ku maalu à pa buloba ne maalu à pa buloba mmawé bwanyi mémè. Mémè ndi ànu ngendela mu Kilistò, mulombola kùdi Nyumà Mwimpè. Ndi muMunange bwalu Yèyè mmunangè, ne ùkenkèshila mabènesha Èndè pambidi pàanyi, undabula ne cyanza cyà dyàbalùme cyà bwobùmwe umbweja mu Bukalenge Bwèndè. Mpindyewu tudi bânà bàà balùme ne bàà bakàji bàà Nzambì, kàdi citwikalà ku ndekeelu kí ncyanji kumweneka to; kàdi tudi bamanye ne netwikale ne mubidi mufwanangane ne mubidi Wèndè Yèyè wà butùmbi awu, bwalu netùMumòne ànu mùdiYe amu.

Pashiishe netwèndelè mu Bukênkè, Bukênkè  
bulenga be,  
Bùdi bùlwa mwaba wùdi mamata à lumuma à  
luse àbàlakana;  
Kenkèshàku mu nyùngulukilu wetù mwônsò  
muunya ne butùku,  
Yesù, Bukênkè bwà bàà pa buloba.

<sup>268</sup> Nudi baMunange anyi? Nudi bamanye's, paanyimà pàa diyiisha dyà ditapa ne bikwabo byônsò, ntu muswe kuumvwa bantu bādītwa mu misambu yà tusalà ne batukina mu dikuukwila ne dimba mu Nyumà. Kakwena cintu nànsha cimwè citambe bwimpè kupita ngimbilù wà kale to. Ncyà bushùwà. Mémè ntu munange ngimbilu wa cyena mpenta mwimpè wa cyena kale awu; kí mmèyi matwisha ngwèngwèngwe àdìbo balaminyina myeyelu mu mùshindù wà beela mikunda kwisù kwônsò kushààla bleu, kàdi kabàyi bamanye cidibo bimba aci ne ncinyi to. Ntu munange muntu udi pàmwàpa kàyi mwà kwakaja cyonà cyà diyi to kàdi nànsha nànkù mwikale ne Dibènesha dyà Mpenta, mpindyewu mwikale wimba cyôci aci. Kaa, mùshindù—mùshindù mwine ùdi misambu yà miyenga yà ku nkùruse ayi yà butùmbi's wè! Kaa, ekèlekèle!

Musambu wètù wa ditangalajangana naawu awu mpindyewu's:

Angata Dìna dyà Yesù wèndè naadi,  
Wèwè mwànà wa tunyinyanya ne dikènga;  
Nedikupè disànkà ne busàmbi,  
Nda naaDi kwônsò kúyaaya.

Mààlabà dilòòlò pa dîbà mwandamutekète, pa dîbà mwandamutekète jaajaaja, masangisha neàbange.

Twinamina mu Dîna dyà Yesù,  
Tupòna mikookwela ku makàsà Èndè,  
Mfùmù wa bamfùmù mu Dyulu netùMwasè  
cifulu cyà butùmbi,  
Pààjika lwendu lwètù.

Twĩmbààyi bõnsò mpindyewu.

Angata Dîna dyà Yesù wëndè naadi,  
Wèwè mwànà wa tunyinganyinga ne dikènga;  
Nedikupè disànkà ne busàmbi,  
Kaa, ndà naaDì kwõnsò kùyaayà.

Dîna dyà mushinga, Éyì dyà bupolè be!  
Ditèkemena dyà buloba ne disànkà dyà Dyulu;  
Dîna dyà mushinga, Éyì dyà bupolè be! (Dyà  
bupolè be!)

Ditèkemena dyà buloba ne disànkà dyà Dyulu.

<sup>269</sup> Mpindyewu, tudi bacjikije dilòòlò edi. Kùdì . . . wàkankonka ànu mpindyewu ne: “Ní twikala mwà kwenza masangisha mu dindà?” To, kí mmààlabà to, ikishaayi bîmpè mààlabà. Pàmwàpa mààlabà dilòòlò, ncyakukumbana mwà kujikija diyiisha adi to, pa nàнку nëndyangatè ditùkù dìdì dilondà. Dîbà dyõnsò dindì mpangila kujikija . . . diyiisha edi dijima, ndi nya naadi too ne mu ditùkù dìdì dilondà adi. Kàdi twàjikiji edi, ngeela meeji ne nukàadi badilongolole bwà Bikondo Byà Èkèleeziyà. Ki mmwòmò anyi?

Èyo, twinyikàayi mitù yètù patùdì twimba bitekètebitekète mpindyewu apa:

Twinamina mu Dîna dyà Yesù, (Ludimi lwõnsò nelùDijikùle.)

Tupòna mikookwela ku makàsà Èndè,  
Mfùmù wa bamfùmù mu Dyulu netùMwasè  
cifulu cyà butùmbi,  
Pààjika lwendu lwètù

Dîna dyà mushinga, Éyì dyà bupolè be!  
Ditèkemena dyà buloba ne disànkà dyà Dyulu;  
Dîna dyà mushinga, Éyì dyà bupolè be! (Dyà  
bupolè be!)

Ditèkemena dyà buloba ne disànkà dyà Dyulu.



60-1204E Cikhèna-Kumona Cyà Paatèmò  
Branham Tabernacle  
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)